

Ixra juinche e sen kuinche e ndo Jesús

Ndachro ndo Jesús tsii Espíritue ndo Dio

¹ *Tjua anta Teófilo, xroon sa ó ikjín, nti a ikjin kain nge e juinchekuajina ndo Jesús ko ixra juinche e ndo ó sa ó

² kuijija nchakon sakjui ndo ngajní. Ko ti xrasatji a ndo kuinche e ndo sen sinche e ixra ko Espíritue ndo Dio bingijna ndo kuetuen en ndo sen ixí tsono e sen nge e ixra sinche e sen.

³ Nchakon juexin kuen en ndo Jesús, tjume e konoxin ndo ixí jichón ndo, ko yuu kán nchakon nanaó konoxin ndo ngajin sen. Itsjé nge e juako ndo ixí tsono e sen nduaxin jichón ndo ko juinчекuen en ndo sen ti tituan an ndo Dio.

⁴ *Ti xra jii ndo ngajin sen chrikao ndo, je e ndo ndache ndo sen satsjixin a sen tjajna Jerusalén. Ja in ndachro ndo:

—Nti i chon énnata tsaye enta nge e tsajon Ndotána, ti nge e ntatjunta ndo sa ó.

⁵ *Nduaxin ndo Juan bikitée ndo chujni ixí inda. Ko tsjé a nchakon ja anta tsaye enta Espíritue ndo Dio.

Sakjui ndo Jesús ngajní

⁶ Tjume e sen chrikao ndo Jesús, juanchangi e sen ndo:

1:1 Lc. 1:1-4. **1:4** Lc. 24:49. **1:5** Mt. 3:11; Mr. 1:8; Lc. 3:16; Jn. 1:33.

—Ja anta Nchánana, ¿á tsajonnta juachaxin jai ixi ni tñajnaína tsetuan an tñajna íjngo?

⁷ Ko juatingíexin ndo Jesús:

—Na i. Ja anta chonda inta juachaxin tsono anta ngisa tson en ji i. Je o Ndotána no e ndo ngixe e nchakon.

⁸ *Ko nchakon tsii Espíritue ndo Dio tsaye enta, me e xrochondanta juachaxin tsachrjenta ko xrochronganta nge e ixra junta a, nguixin tñajna Jerusalén, ko nunte Judea, ko nunte Samaria, ko nchijíi nunte xasintajni.

⁹ *Ko juexin nichja ndo Jesús ji i, xrastetsje e sen ndo, tuinxin je e ndo kuaxi bajin in ndo nui, sakjui ndo ko kuintsía ndo naa tñui ko í bikon a sen ndo íjngo.

¹⁰ Ko xrastetsje e sen ti sakjui ndo Jesús ngajní, tuinxin bikon sen yuu xi tjenka ti no ste sen, steýá xa manta tjúá.

¹¹ Ko xi me e ndachro xa:

—Ja anta chujni nunte Galilea, ¿sonda stetsje enta ngajní? Xranchi bikonta sakjui ndo Jesús, jaña xrokjan ndo íjngo.

Ndo tsitu e ixra banche e xi Judas

¹² Tjume e kjanxin sen ijna ndatin in Olivo ko kuiji sen tñajna Jerusalén. Cha o me e kjín a xranchi naa kilómetro, xranchi jii juachaxin taji ni judío nchakon tjoké e na.

¹³ *Ko kuiji sen tñajna nti a ko kuajin in sen ti jii piso noi nchia tsikjen sen ti bake e sen seno, ndo Pedro, ndo Jacobo, ndo Juan, ndo Andrés, ndo

1:8 Mt. 28:19; Mr. 16:15; Lc. 24:47, 48. **1:9** Mr. 16:19; Lc. 24:50, 51. **1:13** Mt. 10:2-4; Mr. 3:16-19; Lc. 6:14-16.

Felipe, ndo Tomás, ndo Bartolomé, ko ndo Mateo. Kaxon ndo Jacobo, ndotée ndo ndatin in Alfeo, ko ndo Simón, ndo me e ndo kuarue e ni Cananista, ko kaxon ndo Judas, ndosaué ndo Jacobo.

¹⁴ Kain sen xra o sen nti a xronichje e sen ndo Dio, ko kaxon jan María, janée ndo, ko sen kichuu ndo ko kaxin nchri.

¹⁵ Ko nchakon me e, ndo Pedro bingatjen ndo ko bake exin tutée ndo ngusine ti ste sen titikaon Ncháina Jesús, je e sen xranchi naa ciento ko kán sen tsixra o nti a. Tjume e ndachro ndo:

¹⁶ —Kichuuna, xrokonda tson en xranchi nichja xroon chijnie ndo Dio ti tsinichja ndo David ó sa ó tsichronga Espíritue ndo Dio nge e sinche e xi Judas, xi bika o ni itsé ndo Jesús.

¹⁷ Je e xa kaxon kuajiku una xa ko xraje o ixra kuayé e xa.

¹⁸ *Tjume e je e xa sakjui xa bike na xa naa nunte ixí tomi juacha xa ixí ti ndako a juinche e xa. Ko nti a juinxin jaa xa, me e chringa xa ko kuachrje tse e xa.

¹⁹ Jaña kono e kain ni tjajna Jerusalén, ko nunte me e kuin in ngigue e na Acéldama, me e xron-dachro naa nunte ijñi.

²⁰ Ja in jitaxin naa Salmo chijnie ndo Dio:

Je o ndo a xa tsitu e,
ko xro an ngisen tsake e nti a.

Ko kaxon ndachro:
Inaa chujni tsayé e ixra kuanche e xa.

²¹ *Nti i ste ni kuajiku una kain nchakon ti bake e Ncháina Jesús,

²² xranchakon bikona ndo Juan bikitée ndo ndo Jesús ko ti kuijija nchakon bikona sakjui ndo Jesús ngajní. Méxin, jai xrokonda tsjéena inaa sen tsajiku una, ixi sen me e kaxon xronichja sen ixi nduaxin xechón Ncháina Jesús.

²³ Ko tjume e kuinche e sen yuu sen, ndo José, ndatin in ndo kaxon Barsabás ko kaxon Justo, ko inaa ndo ndatin in Matías.

²⁴ Tjume e nichje e sen ndo Dio ko ndachro sen:
—Ncháina, ja anta chuxinnta aséen kain chujni. Tjako nananta ngisen kuinche enta

²⁵ tsayé e ixra xranchi apóstol, ixra kuintu e xi Judas, ixi ndako a juinche e xa ko sakjui xa ti no tikinixin en xa.

²⁶ Tjume e sondaonxin sen ixro ixi jaña tsono e sen ngixe e xi tsayé e ixra, ko juacha ndo Matías, ko hora me e kuayé e ndo ixra ko bajikao ndo sen tenaá kuinche e Ncháina Jesús.

2

Kuij Espíritue ndo Dio

¹ Tjume e kuij kia Pentecostés ko kain sen titikaon ndo Jesús xra o sen, naakua no ste kain sen.

² Ko tuinxin kuin en sen naa nge e séen ndachro kuixin ngajní xranchi naa chrinto soji. Kuixin in chrinto nguixin ngaxin in nchia ti ste sen.

³ Ko bikon sen naa nge e xranchi nejen xro i. Ko xro i chjeya ko baketa a xro i ngujngu jaa sen.

⁴ Ko kain sen kuayé e sen Espíritue ndo Dio, ko tjume e kain sen kuaxi sen nichja sen inaa ngigua ixi Espíritue ndo Dio kuajon xronichja sen.

⁵ Ko nchakon me e t̄ajna Jerusalén bake e ni judío, ni titikaon ndo Dio, tsik̄i x̄in n̄a nchijíi nunte xasintajni.

⁶ Ko kueya n̄a tsikin en n̄a ti chrinto méxin konchjiñe e n̄a. Ko noe a n̄a nge e xroxraxaon n̄a ixi ngujngu n̄a kuin en n̄a nichja sen titikaon ndo Jesús ngujngu ngigue e n̄a.

⁷ Méxin, xronka n̄a, ko xrakon n̄a ko tjao kichuu n̄a:

—¿Á je a kain ni nichja ji i, ni nunte Galilea?

⁸ ¿Xranchi chao tienxinna nichja n̄a ngujngu ngigua ina?

⁹ Nti i jii ni tsik̄i x̄in t̄ajna Partia, Media, Elam, Mesopotamia, Judea, Capadocia, Ponto, Asia,

¹⁰ Frigia, Panfilia, Egipto ko kaxin ni nunte Africa ícha tjenka t̄ajna Cirene. Ko kaxon ni romano ste n̄a nti i. Kaxin n̄a judío n̄a xrajongiexon n̄a, ko ikaxin n̄a je o titikaon n̄a ndo Dio xranchi ni judío.

¹¹ Kaxon jii ni tsik̄i x̄in Creta, ko Arabia. Ko kaina kuin anna ngujngu ngigua ina nichja n̄a ixr̄a ijié juinche e ndo Dio.

¹² Ko xronka n̄a, noe a n̄a nge e xroxraxaon n̄a me e juanchangi e kichuu n̄a:

—¿Nge e xrondachro kain ji i?

¹³ Ko ikaxin n̄a juano n̄a ko ndachro n̄a:

—Tsikuan kain ni ji i.

Ndo Pedro ndo nichja ngajin ni ste nti a

¹⁴ Tjume e je e ndo Pedro bingatjen ndo ko kao sen tenaá apóstol ko séen nichja ndo ko ndachro ndo:

—Ja anta ni judío ko ni ste tjajna Jerusalén. Kainnta stenta nti i tin ennta nge e xronichja.

¹⁵ Sen ste nti i je a tsikuan sen xranchi ndachronta, ixi jai xranduyo, nandá las nueve.

¹⁶ Ti stetikonnta me e tsichronga ndo profeta Joel:

¹⁷ Ndachro ndo Dio: Nchakon tsjexin me e xroxruan an Espírituna tsayé e kain chujni. Ichjan, xjan xi ko xjan nchri, xrochronga xjan chijnina.

Ko sen chajan tsikon sen ixra ijié tsjako jan an ko sen ó tachríi, tsoxienxin nge e xrontatjan sen.

¹⁸ Nchakon tson en kain ji i, jan an xroxruan an Espírituna tsayé e kain sen nche e xra, nchri ko xi,

ko je e sen xrochronga sen chijnina.

¹⁹ Ko jan an tsjako ixra ijié tsikonni ngajni, ko kaxon ngata a nunte xasintajni tsjako kaxin ixra ijié:

ijnj, xro i ko i nchi xranchi itjuj tsikon na.

²⁰ Chjiixro tsonaxixe e chjiixro.

Ko nchanitjao tsikonni xranchi injj.

Jaña tson en ko tjume e tsij Ncháina.

Ji in naa nchakon tsango ijié ko tsango chaxro.

²¹ Ko kain sen tsiye e Ncháina, sen me e tsitjáña i sen,

tsehón sen kain nchakon.

²² Ja anta ni israelita, tin ennta nge e xron-dachrjan. Ndo Jesús, ndo tjajna Nazaret, ndo Dio tsixrua an ndo ndo ngajinnta ko je e ndo juinche e ndo itsjé ixra ijié bikonta, me e juakoxin ndo ixi ndo Dio tsikajon ndo juachaxin ngajin ndo. Me e jian no anta.

23 *Maski jaña bikonta, ja anta ndakua i juinchekuunta ndo xranchi tsixraxaon ndo Dio ó sa ó. Ko ja anta kuajonnta ndo ngajin ni ña i, ko kuenitonta ndo ntacru.

24 *Ko ndo Dio juinhexechón ndo ndo Jesús ko ndo Dio kuantsje ndo kain juachaxin chóna xichononte;* í jua i tsetuan an xa ngajin ndo.

25 Ko sa ó ndo rey David tsichronga ndo ixi ndo Jesús ko ndachro ndo:

Jan an xraxa on Nchána
ko je e ndo tjenkana jii ndo.

Je e ndo jii ndo ndatsjonxin jian,
méxin, xro an nge e tsónna.

26 Méxin, tsango juaxruxin bake e aséenna

ko ro a chaxro itsje,

ixi nóna jan an maski tsen enna, xro an nge e
tsónna.

27 Ixi nóna tsintue anta aséenna ti no ste ni
tsiken en,

ko tsajon anta juachaxin ixi xrorenga ntau na
ngaya tuye ixi jan an jian nta a xráanta.

28 Ja anta juako nanta cha o tsechónxixini,
ko jan an juaxruxin tsake e ti ritjén ja anta.

29 'Kichianna, chjánanta juachaxin xron-
dachrjan ixi ndo David, ndo kuachrjenixinna,
tsiken en ndo ko tsixrabaa ndo. Ko ti no tsixrabaa
ndo xra jii nti i nchakon stena jai.

30 Ko ndo David, naa ngisen tsichronga chi-
jnie ndo Dio, ó no e ndo ixi nduaxin ndo Dio
chronga ixi naa ngisen tsachrjenixin ndo xrokjan

2:23 Mt. 27:35; Mr. 15:24; Lc. 23:33; Jn. 19:18. 2:24 Mt. 28:5, 6;
Mr. 16:6; Lc. 24:5. * 2:24 *xichononte* muerte

ndo rey, ndo Cristo tsetuan an xranchi je e ndo baketuan an ndo.

³¹ Jaña ndo David ó bikon ndo sa ó, ko chronga ndo ixi xroxechón ndo Cristo ko ndachro ndo ixi aséen ndo Cristo tsitue a ti jii ni tsiken en ko xrorenga i ntau e ndo.

³² Méxin, ndo Dio juinchexechón ndo ndo Jesús, ko bikona kaina ko chrongana ixi nduaxin ji i.

³³ Jai ndo Dio bikao ndo ndo Jesús ko jii ndo Jesús ndatsjonxin jian ti jii je e ndo. Ko kuayé e ndo Jesús Espíritue ndo Dio, ti tsindachro ndo Dio xroxruan an ndo, me e jai xruan an ndo kuaye ena. Ko kain ji in ti bikonta ko ti kuin ennta.

³⁴ Noína ixi ndo David jui a ndo ngajní xranchi ndo Jesús, ixi je e ndo David ndachro ndo:

Ncháina† Dio ndache Ncháina Jesús:

“Take é ndatsjonxin jian ti ritjén jan an,

³⁵ tsake eja kain ni ningakon an ngangi tutáa ixi ja a tsituen en na.”

³⁶ Méxin, kainnta ni israelita xrokono anta nduaxin ixi je e ndo Jesús, ndo juankanitonta ntacru, ndo me e ndo Dio juinchéña ndo Ncháina, ndo Cristo.

³⁷ Ko kuin en na ji i, tjume e tsango koni e aséen na. Ko juanchangi e na ndo Pedro ko sen kaxin kuinche e ndo Jesús ko ndachro na:

—Kichianna, jai, ¿inge e sinta ana?

³⁸ Tjume e juate e ndo Pedro ko ndachro ndo:

—Tintu enta ti ndako a nche enta ko titikaonnta ndo Dio. Ko tjume e tikitéxinnta nombrée ndo Jesucristo ko ndo Dio sinchemé e ndo jíanta ko tsajon ndo Espíritue ndo tsaye enta.

† **2:34** *Ncháina* Señor *Ncháina* Jesús o *Ncháina* Dio

³⁹ Ndo Dio tajon ndo Espíritue ndo tsayé e ja anta ko chjan anta ko kaxon kain ni ste ikjín. Je e ndo tsajon ndo Espíritue ndo ngajin kain sen tsinche e je e ndo.

⁴⁰ Jaña ndachro ndo Pedro ko ikaxin nge e ndachro ndo. Ko nichje e ndo na íjngo, ko ndachro ndo:

—Tintu enta ti ndako a ixi tsikaon anta xranchi tsikaon kain ni ndako a nche e jai.

⁴¹ Tjume e kain ni kuitikaon nge e ndachro ndo, bikitée na ko ni konchjiñe e nchakon me e ní mil na.

⁴² Kain sen kuitikaon sen nge e juinçekuen en sen sen apóstol tsikinche e ndo Jesús, ko juento kichuu sen, ko juinekao kichuu sen ko kaxon konchrinjin sen nutja ixi jaña xroxraxaon sen ti kuen en ndo Cristo, ko kain sen nichje e sen ndo Dio.

Xranchi kuintee sen titikaon Ncháina

⁴³ Ko tjume e kain chujni xronka na ixi sen apóstol kuinche e ndo Jesús juinche e sen itsjé ixra ijié.

⁴⁴ *Ko tjume e kain sen titikaon ndo Jesús naakua naa nge e xraxaon sen ko kain sen tonchjeye e kichuu sen ti sine sen.

⁴⁵ Ko nchakon kuançekji sen xrojan nge e kuachóna sen, tomi me e chjeye e ngujngu sen chóna i.

⁴⁶ Ko ngujngu nchakon xra o sen ni ngo ko ngujngu ndo a sen, chaxro nekao kichuu sen. Ko konchrinjin sen nutja ixi xraxaon sen ti kuen en ndo Jesús ko nchejié a aséen sen.

⁴⁷ Kuajon sen juasaya ngajin ndo Dio. Ko itsjé chujni tjue e na sen. Ko ngujngu nchakon Ncháina bakinche e ikaxin sen ixi itsjé sen tsi-tikaon sen ko xrochónnda sen juachaxin tsechón sen kain nchakon.

3

Koxruen en naa xi jua i itji

¹ Naa nchakon ndo Pedro ko ndo Juan sakjui sen ti jii ni ngo. Kuiji sen ó kóndo xranchi hora ní, hora me e nichje e sen ndo Dio.

² Nti a jii naa xi jua i itji xratsijongíexión xa. Kain nchakon tikao na xa ni ngo ixi tsake e xa ngandangi nduja ni ngo ndatin in Ntáchja Chaxro. Nti a tjanchiaka a xa ngajin ni tixin in ni ngo.

³ Nchakon bikon xi ni e ixi ndo Pedro ko ndo Juan xrokuixin in sen ni ngo juanchiaka a xa ngajin sen.

⁴ Tjume e ndo Pedro ko ndo Juan tsje e sen xi me e ko ndachro ndo Pedro:

—Tikonntana.

⁵ Ko xi me e jian tsje e xa ixi xrojan nge e tsajon sen ngajin xa.

⁶ Ko ndo Pedro ndachro ndo:

—Chonda i chika plata ko oro, ko ti chonda xrotjá a. Juachaxien ndo Jesucristo, ndo tajna Nazaret, tingatjen ko itjia.

⁷ Ko ndo Pedro itsé ndo itja xa ti jian ko tjume e juinchengatjen ndo xa. Ko tuinxin konsoji tutée xa.

⁸ Ko chrinka xa bake exin tutée xa ko kuaxi xa kuaji xa. Tjume e je e sen ko je e xa kuixin in sen ngaxin in ni ngo ko je e xa jitji xa ko jichrinka xa ko tajon xa juasaya ngajin ndo Dio.

⁹ Tjume e kain ni jii tjajna nti a bikon nā ixi chao itji xa ko tajon xa juasaya ngajin ndo Dio.

¹⁰ Ko xronka nā ixi jaña koxruen en xa ixi kuichúxin nā xa ixi xi me e bakake e xa tjanchi-aka a xa tomi ngandangi nduja ni ngo ndatin in Ntächja Chaxro.

Nichja ndo Pedro ngajin ni jii ngaxin in ndasin ndatin in Salomón

¹¹ Xi jua i bakji tintue a xa ndo Pedro ko ndo Juan. Tjume e kain ni ste nti a xronka nā ikjui nā sakuitsje e nā ntasien ni ngo, ndasin Salomón ixi nti a ste sen ko je e xa kaxon.

¹² Ko hora bikon ndo Pedro kujj nā, je e ndo ndache ndo nā:

—Ja anta ni israelita, ¿sonda xronkanta ko sonda nchexruanninta? ¿Á xraxaonnta ixi jan onna chondana ijié juachaxin o tsango titika onna ndo Dio, méxin koxruen en xi ji i?

¹³ Na i. Ndo Dio, Nchée ndo Abraham, ndo Isaac, ko ndo Jacob, tsango kuajon ndo ijié juachaxin ngajin Chjen en ndo ndatin in Jesús. Ko ja anta kuajonnta xjan ngajin xi Pilato ko je e xa tjaun xa xrokuajanda xa ndo Jesús ko ja anta chro anta.

¹⁴ *Ko ja anta xrojuanchianta xrokuajanda xa ndo tjúá aséen. Ko chro anta. Ko cháña juanchi-anta kuajanda xa naa xi naatóñaxón chujni.

¹⁵ Ko ja anta naakóñaxónnta ngisen tajon juachaxin tsechón chujni, me e ndo Jesús, ko ndo Dio juinchexechón ndo ndo. Jaña bikona jan anna ko me e ndachrjanna.

16 Ko juachaxien ndo Jesús chuntiana, me e koxruen en xi jua i bakaji, xi tikonnta ko chuxinta. Ko je e xa nduaxin chuntia xa ko kuitikaon xa, méxin koxruen en xa. Me e stetsje enta jai.

17 'Ko jai kichianna, nónana ixi nchakon ja anta ko ni tetuan an kon inta ndo Jesús, noa inta nge e juinche enta.

18 Ko jaña juexin kon en ixi tsindachro ndo Dio tsinichjixin ndo sen tsichronga chijnie ndo ixi ndo Cristo xrokonda tsen en ndo.

19 Méxin, tintu enta ti ndako a nche enta ko titikaonnta ndo Dio ko je e ndo sinchemé e ndo kain ijie chondanta ko Ncháina Jesús sinchesoji ndo asáanta.

20 Ko tjume e je e ndo Dio xroxruan an ndo ndo Jesucristo, ndo tikinixin en sinchemé e jíanta.

21 Ko jai ndo Jesucristo xrokonda tsitu e ndo ngajní tsijija nchakon sinchekonchjian ndo Dio kain nge e xranchi tsichronga ndo jitaxin chijnie ndo ó sa ó.

22 Ó seno ndo Moisés tsindachro ndo: “Ncháina ndo Dio xroxruan an ndo naa ngisen tsachrjenixina ko ndo me e xrochronga chijnie ndo Dio xranchi jan an. Ko ja anta titikaonnta kain nge e xrondachro ndo.

23 Ko ngisen tsitikaon a ti xronichja ndo, sen me e ísikinxien a sen tjajna Israel.”

24 'Xrangíxin ndo Samuel ko kain sen tsichronga chijnie ndo Dio: chronga sen kain ti jiton en jai.

25 Ja anta tikinixin annta tsiton anta ti tsindachro ndo Dio tsinichjixin ndo sen tsichronga chijnie ndo, ko kaxon tsaye enta naa chijni tjintee ti tsindachro ndo Dio ngajin sen tachrí anta. Ixi

tsindache ndo Abraham ja in: “Kain ni nunte xasintajni tsonchaonxin n̄a naa ngisen tsachrjenixinta.”

²⁶ Nchakon ndo Dio juinchexechón ndo Chjen en ndo sa ó xruan annta ndo chjen en ndo ngajinnta ja anta ni israelita ixi sintanchaonnta ndo ngujngunta ko tsintuenta ti ndako a nche enta.

4

Ndo Pedro ko ndo Juan ste sen ngajin ni tetuan an

¹ Ndo Pedro ko ndo Juan xranichje e sen ni ste nti a ko tuinxin kujj xitaana ko xi tetuan an ni ngo ko xi saduceo.

² Tsango koñao n̄a ixi ndo Pedro ko ndo Juan stenchekuen en sen ni tsixra o nti a xranchi xroxechón chujni tsiken en xranchi jaña xechón ndo Jesús.

³ Tjume e je e n̄a itsé n̄a sen ko sabikao n̄a sen, xraxin in n̄a sen ndo achjiso. Nti a kuitu e sen tiie me e ixi nchakon me e ó kóndo.

⁴ Ko kueya n̄a kuin en n̄a chijni juako sen, ko kuitikaon n̄a. Kō kain xi kuitikaon, na ó mil xi.

⁵ Ko ndúyaxin xra o kain ni tetuan an ni judío ko ni tjako ley ne e ndo Moisés nti a tjajna Jerusalén.

⁶ Kaxon nti a jii xi Anás, me e xitaana ícha tetuan an, ko xi Caifás, ko kaxon xi Juan, ko xi Alejandro, ko kain ni kichuu xitaana tetuan an.

⁷ Tjume e kuetuan an xa kuixrakua ndo Pedro ko ndo Juan. Ko bake e xa sen ngusine ko tjume e juanchangi e xa sen:

—¿Ngisen kuajon juachaxin o ngisen nombrée nche exinnta kain ji i?

⁸ Ko ndo Pedro tsango chónnda ndo juachaxien Espíritue ndo Dio, juate e ndo ndachro ndo:

—Ja anta ni tetuan an tjajna ko ja anta xi tachríi tjajna Israel,

⁹ ja anta tjanchangínta xranchi koxruen en naa xi ni e ixi tjaunnta tsono anta xranchi kon en ji in.

¹⁰ Méxin, tin ennta jian nge e xrondachrjan ixi kainnta ni tjajna Israel tsono anta ixi xi jii nti i koxruen en xa ixi juachaxien ndo Jesucristo, ndo tjajna Nazaret, ndo kuenitonta ntacru, ko tjume e ndo Dio juinhexechón ndo ndo.

¹¹ Ja anta juinche enta xranchi ni nchekonchjian nchia kuitikaon a na ixro ko tjume e ikjan xro ícha jian ko tjintee tonsojixin nchijíi nchia me e ndo Jesús me e ti ixro kuíntuenta ti juinchekonchjiannta tjatu o ko jai ikjan ndo ixro tjintee.

¹² Ixi je o ndo Jesús chónnda juachaxin sinchemé e ndo ijię ko je o je e ndo tsixrua an ndo Dio ngata a xasintajni ixi ko a inaa ngisen tsitikaon na ixi tsomé e jíee na.

¹³ Ko xi tetuan an bikon xa ixi ndo Pedro ko ndo Juan nichja sen ixi nchijíi aséen sen ko kono e xa ixi sen me e xranchi ngixe i inaa sen ko je a ni ícha no e xroon. Tjume e xronka xi ixi kuichúxin xa ixi sen me e tsikajikao ndo Jesús.

¹⁴ Ko xi tsikoxrue en nti a stekao sen xa. Méxin, jua i tsjankata a xa ijię ngajin sen.

¹⁵ Ko kuetuan an xa ixi ndo Pedro ko ndo Juan tsachrje sen nduja ko tjume e je o xa kuitu e xa ngaxin in nchia juintejaao kichuu xa.

¹⁶ Ko tjume e ndachro xa:

—¿Nge e sinchekuuna xi ña? Ixi kain ni tjaína Jerusalén bikon na ixi ndo Dio bingijna ndo xi ji i, me e koxruen en xi ni e ko jua i xrondachrona ixi nduaxin a.

¹⁷ Ko ítjaun ana xronichja xi ji i ngajin kain na. Méxin, xrondachena xa íxronichjaxin a xa nombrée ndo Jesús.

¹⁸ Me e kuiye e xa sen íjngo ko kuetuen en xa sen ixi xronichja i sen ko ítjsako a sen ixi nombrée ndo Jesús.

¹⁹ Ko tjume e ndo Pedro ko ndo Juan juate e sen ko ndachro sen:

—Xraxaon ja anta, ¿á xrobake e ndo Dio juaxruxin siá xrokuitika onna nge e ndachro ja anta o xrokuitika onna nge e tituan an je e ndo?

²⁰ Ko jan anna jua i tsintu ana xronichjana nge e bikona ko nge e kuin anna.

²¹ Ko tjume e je e na kuyakutee na sen ko kuintu e na sen sakjui sen ixi kuitja i na xranchi chao xrobikaon sen ixi kain ni tjaína nti a tajon na juasaya ngajin ndo Dio ixi ti nge e jian juinche e sen.

²² Ko xi koxruen en ixi juachaxien ndo Dio, xi me e chóna xa ícha ixi yuu kán nano.

Sen titikaon ndo Jesús tjanche e sen ndo ixi xrorakon a sen

²³ Tjume e ndo Pedro ko ndo Juan ó tsikajánda na sen, me e ikjui sen ti tsixra o kain sen chúxin sen. Ko chronga sen kain ti kuetuan an xitaana tetuan an ko sen tachríi tetuan an.

²⁴ Ko juexin kuin en sen, me e kain sen nichje e sen ndo Dio ko ndachro sen:

—Ncháina, ja anta juinchekonchjianta ngajní ko nunte xasintajni ko ndachaon ko kain nge e jii.

²⁵ Ja anta ixi Espíritue ndo Dio nichjaxinnta ngajin ndo David, ndo juinche e ixra ngajinnta me e ja in ndachro ndo:

¿Sonda toña ko tjakaxin kain ni tjajna chuxin anta?

Xro an tjintee kain ti xraxaon na.

²⁶ Sen rey jii nunte xasintajni ko kain ni tjajna naakua xraka na ningakon en na Ncháina Dio ko ndo Cristo.

²⁷ *Nduaxin xi Herodes, ko xi Poncio Pilato, ko ni tsikjixin ikjín, ko ni israelita tsixra o tjajna nti i ixi ningakon en na Chjan an ndo Jesús, ndo chóna i ijié, me e ndo kuinche enta tsóña ndo Mesías.

²⁸ Jaña juinche e na nge e ó sa ó tsindachronta ixi jaña xrokonda xrokon en.

²⁹ Ncháina, tsje enta ti juinchexronka na sen ko tingijnanta sen nche e xráanta ixi xrochronga sen chijnianta ko xroxakon a sen.

³⁰ Ko ixi juachaxiannta sinchexrjuen en sen ni ni e ko sinche e sen ijié ixra ixi nombrée chjan anta, ndo tsango tjúa, ndo Jesús.

³¹ Ko juexin nichje e sen ndo Dio, bengi nunte ti ste sen. Ko kain sen kuayé e sen juachaxien Espíritue ndo Dio ko kuaxi sen chronga sen chijnie ndo Dio ko xrakon a sen.

Sen titikaon tonchjeye e kichuu sen ti chóna sen

³² *Kain sen kuitikaon ndo Jesús naakua nge e xraxaon sen ko kain sen tonchjeye e kichuu sen ti

chónda sen ko xro an ngisen ndachro ixi je e sen tituan an sen xrojan nge e.

³³ Sen kuinche e ndo Jesús ixi juachaxien ndo Dio kuachronga sen ixi xechón Ncháina Jesús ko ndo Dio ícha juinchenchaon ndo sen.

³⁴ Ko xro an sen nóa bake e ngakjen en sen ixi kain sen kuachónda jngi e ko ndo a kuancheckji sen ko me e tika o sen tomi

³⁵ ko bakajon sen ngajin sen kuinche e ndo Jesús ko je e sen bakonchjeya sen ngajin ngujngu sen xrokonde e.

³⁶ Xranchi juinche e naa xi levita ndatin in José. Je e xa tsiki x̄in xa nunte Chipre ko sen kuinche e ndo Jesús juincheckin in sen xa Bernabé, me e xrondachro ngisen tajon juaxruxin.

³⁷ Je e ndo Bernabé juincheckji ndo naa ijngi kuachónda ndo ko bika o ndo tomi ngajin sen kuinche e ndo Jesús.

5

Ti ndako a juinche e xi Ananías ko nchri Safira

¹ Ko naa xi ndatin in Ananías, ko janchri e xa, Safira, juincheckji sen naa ijngi kuachónda xa.

² Ko xi ji i kuitu e xa tu ya tomi ko tu ya tomi bikaan xa ngajin sen kuinche e ndo Jesús xranchi xrokjui kain tomi. Ko janchri e xa no e jan kaxon.

³ Méxin, ndo Pedro ndachro ndo:

—Ananías, ¿sonda chje é juachaxin Xixron anxrée kuixin in xa ntakuian ixi xrojuincheye é Espíritue ndo Dio ko xrokuitua a tu ya tomi tsincheckjixian nunte?

⁴ ¿Á je a jngi a? Ko siá ó juinчекjia ijngi, ¿á je a tomia? ¿Sonda xraxaoan juinche e ja in? Ja a juincheye é ndo Dio, je a juincheye é chujni.

⁵ Ko kuin en xi Ananías ji i, tuinxin kuitsinga xa ko ndakuen en xa. Ko kain sen kuin en ji i, tsango xronka sen.

⁶ Tjume e kaxin chajan kuintsía chán manta cuerpoe xi Ananías ko sabikao chán xa, xroxrabaa xa.

⁷ Níi hora tjume e kuixin in janchri e xi Ananías ti ste sen. Ko noe a nchra nge e kon en nti a.

⁸ Ko ndo Pedro juanchangi e ndo nchra:

—Ndachijiana, ¿á juinчекjixinta ijngi ixi ti tomi ndachronta?

Ko juatingíexin nchra:

—Jaán, jaña kochjixin ijngi.

⁹ Ko ndo Pedro ndachro ndo:

—¿Sonda juintejaonta xrojuincheye énta Espíritue ndo Dio? Nduja ste chajan bikao ndoxi a kuixrabaa ndo ko jai ja a satiko a chán tsixrabaa kaxon.

¹⁰ Ko tuinxin kue é nchri Safira nunte tjenka tutée ndo Pedro ko ndakuen en nchra. Tjume e kuixin in chajan nchia ko bikon chán nchra ndatsiken en nchra ko kuantsje chán nchra, ko bijabaa chán nchra ndatsjonxin nango ti no jixrabaa ndoxi e nchra.

¹¹ Kain sen ni ngo ko ikaxin sen kuin en sen nge e kon en, me e tsango xronka sen.

Itsje ixra ijié juinche e sen ixi juachaxien ndo Dio

¹² Tjume e sen kuinche e ndo Jesús juinche e sen kueya ixra ijié ngajin ni ste nti a ixi juachaxien

ndo Dio ko kain sen xra o sen ngaxin in ndasin ndatin in Salomón.

¹³ Ninaa n̄ tjaun a n̄ xrokonchjiñe e n̄ tjenka sen titikaon Ncháina Jesús. Ko chujni tjanya chaxro kuanichja n̄ ixi je e sen.

¹⁴ Ko kueya xi ko nchri kaxon kuitikaon n̄ Ncháina Jesús.

¹⁵ Ko itsjé n̄ bakantsje n̄ ni ni e ko bake e n̄ ni ni e ngatja cha o, ngata a camé n̄ ko kanie e n̄ ixi tsatsinga ndo Pedro ko maski je o tsauen ndo tsatsinga ti ste n̄, tsoxrue en n̄.

¹⁶ Itsjé ni ikaxin tjanya nti a bakii n̄ tjanya Jerusalén bika o n̄ ni ni e ko ni chóna espíritue xiña i ko kain n̄ koxrue en n̄.

Ni toñao barué e n̄ sen kuitikaon ndo Jesús

¹⁷ Ko tjume e xitaana tetuan an ko xi saduceo tsango kochjuye e xa ngajin sen kuinche e ndo Jesús,

¹⁸ ko itsé xa sen xraxin in xa sen ndo achjiso.

¹⁹ Tjume e naa ndo ángel ne e Ncháina Jesús kuii tiie kuantje e ndo ntachja ndo achjiso ko kuantsje ndo sen. Ko ja in ndache ndo sen:

²⁰ —Itjinta ni ngo ko nchekuen ennta kain ni ste nti a chijni tsehónxin chujni.

²¹ Ko juexin kuin en sen ji i, ndúyaxin sakjui sen kuixin in sen ni ngo ko juinchekuen en sen ni ste nti a.

Ko xitaana tetuan an ko ni chrikao xa kueya xa ixi xroxra o ni tetuan an Israel. Ko kuetuan an n̄ ixi tsixrakua sen ste ndo achjiso, sen kuinche e Ncháina Jesús.

²² Tjume e kuiji xi soldado ndo achjiso ko kuitja i xa sen ko ikjan xa

²³ ko ndachro xa:

—Juasona nti a ko bikona jije e jian ndo achjiso ko nti a ste xi jindaa ntachja. Ko kuantjan ana ndo achjiso ko kuitja ina sen jije e nti a.

²⁴ Ko kain xi tetuan an xitaana ko xi tetuen en xi policia ne e ni ngo ko ikaxin xitaana tetuan an kuin en xa ji i ko me e xraxaon xa ixi nge e icha xrokron en.

²⁵ Ko tuinxin kuiji naa ngisen ndachro:

—Ni xraxin innta ndo achjiso o ste na ngaxin in ni ngo, nti a stenchekuen en na chujni.

²⁶ Ko tjume e xi tetuen en xi policia bikao xa xi policie xa ko jian bika o xa sen ixi xronka xa ba ni tjajna tsaxi na xa ixro.

²⁷ Ko hora bika o xa sen, bake e xa sen ngajinxin* xi tetuan an, ko xitaana tetuan an ndachro xa:

²⁸ *—Jan anna kuajon ana juachaxin ixi tsjakonta nombrée xi Jesús ko ja anta kuitikaon anta ko nchiji tjajna Jerusalén juako enta na ko tjaunnta tjankata antana ijie ixi jan anna kon ina xi me e.

²⁹ Tjume e ndo Pedro ko kaxin sen kuinche e ndo Jesús ndachro sen:

—Jan anna xrokonda tsitika onna ndo Dio sa o ko tjume e tsitika onna chujni.

³⁰ Ndo Dio, tsikitikaon sen kuachrjenixinna, ndo Dio me e juinchexechón ndo Jesús, ndo kuenitonta ntacru.

³¹ Ko jai bake e ndo Dio ndo Jesús ngajni ndat-sjonxin jian ti jii je e ndo ko kuajon ndo juachaxin ixi je e ndo tsituan an ndo ko tsantsje e ndo na ijie

* **5:27 ngajinxin** delante de **5:28 Mt. 27:25.**

ixi ni t̄ajna Israel xrokjan n̄a xrokuitikaon n̄a ndo Dio, ko me e xrokuitj̄aña ijiē chón̄da n̄a.

³² Ko kaxon jan anna nichjana kain nge e bikona ixi juachaxien Espíritue ndo Dio, Espíritu me e tajon ndo Dio tsayé e kain sen nduaxin tsitikaon ndo.

³³ Ko xi tetuan an kuin en xa kain ji i ko tjume e ícha koñao xa ko tjaun xa xrokóña xa sen.

³⁴ Ko tjume e naa xi fariseo, xi me e kaxon tituan an xa, ndatin in xa Gamaliel. Je e xa naa xi maestro juinchekuen en xa ley kain ni t̄ajna nti a ko ni t̄ajna chón̄de e n̄a xa juasaya. Bingatjen xa ko ndache xa sen kuinche e Ncháina ixi tsachrje sen nduja naa nchion.

³⁵ Tjume e nichje e xa kain xi tetuan an ko ndachro xa:

—Ja anta ni israelita, xraxaonnta nge e sinchekuunta sen ji i.

³⁶ Xraxaonnta ixi ó sa ó bake e naa xi ndatin in Teudas ko bandachro xa ixi tsango tituan an xa. Ko noó ciento n̄a barué e n̄a xa. Tjume e íkaxin chujni kóña n̄a xa ko kain ni barué e xa chjeke e n̄a ko kuitj̄aña n̄a ko tjume e ndajuexin ixr̄a juinche e xa.

³⁷ Tjume e nchakon kueki n̄a chujni t̄ajna, kuii inaa xi ndatin in Judas, naa xi t̄ajna Galilea, ko itsjé n̄a rué e n̄a xa. Ko tjume e kaxon kóña n̄a xa ko kain ni barué e xa juexin n̄a.

³⁸ Méxin, tintu enta sen ji i ko tingakuen anta sen. Siá jinche e sen ixr̄a ne e chujni, ixr̄a ji i tsjexin xr̄a.

³⁹ Ko siá nduaxin nchekuen en sen chujni juachaxien ndo Dio, ja anta jua i tsingakon ennta

sen. Méxin, tintu enta sen, siá na i, ja anta ritetoku unta ndo Dio.

⁴⁰ Tjume e kain xi tituan an kuitikaon xa ko kuiye e xa sen tsikinche e ndo Jesús ko kóna na sen ko kuetuan an xa ngajin sen ixi íxronichja i sen ixi nombrée ndo Jesús ko tjume e kuajanda xa sen, satsji sen.

⁴¹ Tjume e sen kuinche e ndo Jesús kuachrjexin sen ti ste xi tituan an, ko maski jaña kon en sen, bake e sen juaxruxin ixi ndo Dio kuajon ndo juachaxin tangi kon en sen kondee nombrée ndo Jesús.

⁴² Ko kuintue a sen ti tjako sen chijnie ndo Jesu-cristo kain nchakon ngaxin in ni ngo ko ngujngu ndo a chujni.

6

Juée sen yaato ni tsingijna ixra

¹ Nchakon me e ícha konkueya sen titikaon Ncháina Jesús. Tjume e sen nichja ngigua griego bajakaxin sen ngajin sen nichja ngigua hebreo. Ndachro sen ixi nchri ka an tjajnée sen griego tayé a nchra itsjé nge e tonchjeya sen sine nchra ngujngu nchakon.

² Tjume e sen teyuu kuinche e ndo Jesús kuiye e sen kain sen titikaon ndo ko ndachro sen:

—Jaina jua i tsintu ena ti nchekuen enna chujni chijnie ndo Dio ko itsjina tsonchjeyana nge e sine nchri ka an.

³ Méxin, ja anta kichianna tinche enta yaato xi ste ngakjen ennta, sen jian chuxinnta ko sen no e ko sen ícha chóna Espíritue ndo Dio, sen me e xrochje énta ixra ji i.

⁴ Ko jan anna xronichja ana ndo Dio ko tsjakona chijnie ndo.

⁵ Kain sen kuin en me e ko naakua naa nge e xraxaon sen. Ko kuinche e sen ndo Esteban, ndo tsango chuntia Ncháina ko ícha chóna ndo Espíritue ndo Dio, ko kaxon ndo Felipe, ndo Próculo, ndo Nicanor, ndo Timón, ndo Parmenas ko ndo Nicolás. Je e ndo me e ndo tjajna Antioquía ko ó sa ó tsikitikaon ndo xranchi ni judío.

⁶ Ko juexin kuinche e sen sen sinche e xr̄a me e, bika o kichuu sen ti ste sen tsikinche e Ncháina Jesús. Ko je e sen nichje e sen ndo Dio ko bake e itja sen ngata a ngujngu sen kuayé e xr̄a me e.

⁷ Chijnie ndo Dio tsango binga nunte nti a ko kueya n̄a kuitikaon n̄a Ncháina tjajna Jerusalén. Kaxon itsjé xitaana judío kuitikaon xa Ncháina.

Itsé n̄a ndo Esteban

⁸ Ndo Esteban, ndo kuachóna juachaxin ne e ndo Dio, kuanche e ndo itsjé ixr̄a ijié ngajin n̄a.

⁹ Tjume e kaxin ni tsik̄i x̄in ni ngo judío, ni sa ó bake e esclavo, ni me e tsik̄i x̄in n̄a tjajna Cirene, ko Alejandría, ko Cilicia, ko nunte Asia, ni me e juakaxin n̄a ngajin ndo Esteban.

¹⁰ Ko jua i juacha n̄a ixi Espíritue ndo Dio kuanichjixin ndo Esteban.

¹¹ Tjume e je e n̄a juenge e n̄a n̄a ikaxin n̄a ixi xrondachro n̄a kuin en n̄a nichjangí e ndo Esteban ndo Moisés ko ndo Dio.

¹² Me e tsango koñao kain ni tjajna ko xi tetuan an ni ngo ko xi tjako ley. Tjume e itsé n̄a ndo Esteban sabikao n̄a ndo ngajin ni tetuan an.

¹³ Kaxon juée n̄a ni ncheya ixi ndachro n̄a ndako a juako ndo Esteban ko ndachro n̄a:

—Xi ji i tsango nichjangí e xa ningoina ko ley kuetuan an ndo Moisés.

¹⁴ Kuin anna chronga xa ixi xi Jesús, xi tjanya Nazaret, sinchetjáña xa ningoina nti i ko tsindoxin xa nge e titikaonna ti tsinichja ndo Moisés.

¹⁵ Tjume e xi tetuan an ko kain ni ste nti a stet-sje e nã ndo Esteban ko bikon nã ixi ikon ndo Esteban ikjan xranchi ikon naa ndo ángel.

7

Ti juatingéxin ndo Esteban

¹ Tjume e xitaana tetuan an juanchangi e xa ndo Esteban ko ndachro xa:

—¿Á nduaxin kain ti ndachro nã ixi ja a?

² Tjume e je e ndo juate e ndo ko ndachro ndo:

—Kichianna xrotjanya Israel ko sen tachríi tin ennta nge e xrondachrjan. Ndo Dio titika onna chóna juachaxin, ndo me e juako ndo juachaxien ndo ngajin ndo Abraham, ndo kuachrjenixinna nchakon bake e ndo tjanya Mesopotamia, xrasatji a ndo nunte Harán.

³ Ndo Dio ndache ndo ndo Abraham: “Tintu é tjanáa ko kain sen ndúia ko satjia naa nunte tsjako a.”

⁴ Tjume e ndo Abraham kuachrjexin ndo nunte Caldea ko sakjui ndo ko bake e ndo nunte Harán. Ko ó juexin kuen en ndotée ndo, tjume e ndo Dio bikao ndo ndo Abraham ti no stenta jai.

⁵ Ko ndo Abraham kuayé a ndo nitu o nunte ti no tsake e tutée ndo. Tjume e chronga ndo Dio ixi nchakon tsen en ndo Abraham, nduaxin sen tsachrjenixin ndo tsayé e sen nunte ji i. Maski xrachóna i ndo ichjan, jaña ndachro ndo Dio.

⁶ Kaxon tsindachro ndo Dio ixi sen tsachrjenixin ndo Abraham, sen me e tseta a sen jée nunte, ko sinche exin sen xrée n̄a, nti a chjinga sinchekao n̄a sen ko xroxenge a sen n̄a ko nti a tsintee sen noó ciento nano.

⁷ Kaxon ndachro ndo Dio: “Tjume e jan an sintaña ijie ngajin ni juincheni e chjan an ti no juinchenche e n̄a xjan xra. Ko tjume e sintakjan chjan an ko xrochjiana xjan juasaya nti i.”

⁸ Tjume e ndo Dio tsijao ndo ndo Abraham ixi kain xjan xi tsachrjenixin ndo tsaa xjan chji e xjan ne e sen israelita. Ko jaña nchakon jongí e chjen en ndo Abraham, xjan sa ó, xjan Isaac, ndo Abraham chjée ndo xjan chji e xjan nchakon kuitja xjan ijní nchakon. Kaxon jaña juinche e ndo Isaac nchakon kuichónnda chjen en ndo, xjan Jacob, ko tjume e ndo Jacob jaña juinche e ndo ngajin ti teyuu chjen en ndo. Sen me e kóña ndotée ti teyuu tjajna Israel.

⁹ Ko chjen en ndo Jacob, sen kuachrjenixinna ó sa ó, sen me e kochjio sen ngajin xjan kichuu sen xjan José, ko juinчекji sen xjan ngajin kaxin xi, ko sabikao n̄a xjan tjajna Egipto, ko ndo Dio bingijna ndo xjan

¹⁰ ko kuantsje ndo ti tangi bake e ndo. Ko ndo Dio kuajon juachaxin ixi tsango kono e ndo kain nge e. Me e bikon xi Faraón, rey tjajna Egipto, ixra jian juinche e ndo José, ko kuajon xa juachaxin ixi tsetuan an ndo José tjajna Egipto ko ndo a xa.

¹¹ Tjume e kuij jinta ngata a tjajna Egipto ko nunte Canaán ko tangi kuintee n̄a ko sen tsikachrjenixinna chónnda i sen nge e sine sen.

12 Ko tsikin en ndo Jacob ixí tjanya Egipto jitochji noa trigo ko kuetuen en ndo chjen en ndo ixí tsintekji xjan nti a tse na xjan noa, ko je e xjan me e sen tsikachrjenixinna. Ji i sa ó ikjui xjan nti a.

13 Tjume e yuxin ikjan sen nti a ko ndo José juincheno e ndo sen ixí je e ndo ndo kichuu sen. Ko juako e ndo José xi Faraón kain ndo saóé ndo.

14 Tjume e kuetuan an ndo José ixí tsjirué e sen ndotée ndo, ndo Jacob, ko kain sen kichuu ndo, xranchi ní ikán ko tena ó sen.

15 Jaña kon en ko ndo Jacob, sakjui ndo bake e ndo tjanya Egipto ko tjume e nti a kuenxin ndo. Ko kaxon sen tsikachrjenixinna nti a kuenxin sen.

16 Ko tjume e kuantsjengí sen nte e ndo Jacob ko sabikao sen nte e ndo nunte Siquem, ko nti a juabaa sen ntaā ti naa nunte tsike na ndo Abraham, tsijinçekji chjen en xi Hamor tjanya Siquem.

17 Tjume e kuii nchakon tson en nge e tsindachro ndo Dio tsijao ndo ndo Abraham, ko sen Israel tsango konkueya sen tjanya Egipto.

18 Tjume e tuinxin inaa xi rey baketuan an tjanya Egipto kuachúxin a xa ndo José.

19 Ko xi rey me e juincheye e xa sen tjanajina ko chinga juinçekao xa sen. Kuetuan an xa ixí chjen en sen xjan xi nandá tsjongí e, tsintu e sen xjan ixí tsinteken en xjan.

20 Ko tjume e nchakon tsijongí e ndo Moisés tsango bake e juaxruxin ndo Dio ixí xjan me e. Ko ndotée xjan ko janée xjan kuachónda sen xjan ndo a sen níi nchanitjao.

21 Tjume e jua i tsemá sen xjan ícha, me e bijánka sen xjan. Ko nchrichje en xi rey tjanya Egipto

kuitja nchra xjan ko sabikao nchra xjan ko juinchekangi nchra xjan xranchi chjen en nchra.

²² Ko tjume e ndo Moisés kuangi ndo kain nge e no e ni Egipto ko tsango chóna ndo juachaxin ti nge e ndachro ndo ko nge e kuanche e ndo.

²³ Ko nchakon kuichóna ndo Moisés yuu ikán nano xraxaon ndo tsitsje e ndo ni israelita, ni kichuu ndo.

²⁴ Nti a bikon ndo ixi naa xi tjajna Egipto jitoña xa naa ni kichuu ndo. Me e bingijna ndo ni kichuu ndo ko naakóñaxón ndo xi Egipto.

²⁵ Xraxaon ndo ixi ni kichuu ndo, ni israelita, xrokono e na ixi ndo Dio tsixrua an ndo je e ndo tsingijna ndo na. Ko je e na juatsuan i na ndo.

²⁶ Tjume e inaa nchakon ndo Moisés bikon ndo ixi yuu ni israelita steteto na. Ko tjaun ndo xrojuike e ndo ixi íxrokueto a na. Ko ndachro ndo: “Ja anta kichuunta, ¿sonda stetetonta?”

²⁷ Tjume e xi chóna ije koñao xa ko kuncheka xa ndo Moisés. Ko ndachro xa: “¿Ngisen kuajon juachaxin ixi ja a tsituannana ko sinchéña ije ngajin na?”

²⁸ ¿Á tjaun tson iana xranchi naakóñaxuan xi Egipto najna?”

²⁹ Ko kuin en ndo Moisés ji i ko sabinga ndo tjajna Madián ko nti a bake e ndo xranchi naa ni tsiki xin jée nunte. Ko tjume e nti a kute e ndo ko kuachóna ndo yuu xjan xi.

³⁰ Tjume e kuatsinga yuu kán nano ko tjenka jna ndatin in Sinaí bikon ndo naa ndo ángel tjenka naa ntaa yaa xro i.

³¹ Ko ndo Moisés xronka ndo ixi jaña bikon ndo ko konchjiñe e ndo ixi xrotsje e ndo ti xro i ko

kuin en ndo tée Ncháina Dio ndachro:

³² “Jan an ndo Dio titikaon sen tsikachrjenixin ndo Abraham, ko ndo Isaac, ko ndo Jacob.” Ko ndo Moisés kuaxi xranga ndo ko xronka ndo ko tjaun a ndo xrotsje e ndo.

³³ Ko ndachro Ncháina: “Tantsje kateá ixi nunte ritingatjanga, nunte tjúá.

³⁴ Jan an bikon ixi ni tjajnána tsango tangi ste na tjajna Egipto ko ó kuin an ixi teya na. Ko jai jui i ixi tsingijna na. Méxin, xroxruan an ja a itsjia tjajna Egipto.”

³⁵ ‘Ko ni israelita juanoa na ndo Moisés ko tsindachro na: “¿Ngisen tjáa juachaxin ixi ja a tsituannana ko sinchéñanana ijié?” Ko ndo Dio xruan an ndo ndo Moisés ixi tsetuan an ndo ko tsingijna ndo ni israelita ko ixi juachaxien ndo ángel bikon ndo ngaka a ntáa yaa xro i.

³⁶ Ndo Moisés kuantsjexin ndo ni tsikachrjenixinna tjajna Egipto. Tsango itsjé ixra ijié juinche e ndo ko itsjé nge e juakoxin ndo tjajna Egipto, ko ndachaon tin in Ndachaon Játse, ko no ntajie kuaji na yuu kán nano.

³⁷ Je e ndo Moisés ndache ndo ni israelita: “Ndo Dio xroxruan an naa ngisen xronichja chijnie ndo xranchi xruan anna ndo jan an ko ndo me e tsachrjenixin ndo ni kichuunta. Titikaonnta ndo.”

³⁸ Ndo Moisés bake e ndo ngajin ni israelita nchakon bake e na ntajie. Ko juao ndo ndo ángel ne e ndo Dio ijna Sinaí ko ni kuachrjenixinna kuayé e na chijni tajon juachaxin tsechón chujni, ko chijni me e kuaye ena jai.

³⁹ ‘Tjume e ni kuachrjenixinna kuitikaon a na ko juanoa na ndo Moisés ko tjaun na íjngo xrokjan

na t̄ajna Egipto.

⁴⁰ Ko ndache nā ndo Aarón: “Tja onna xrochondana naa dio tsitaonana nti a ixi ínona ina nge e kon en ndo Moisés, ndo bingijna kuachrjexinna t̄ajna Egipto.”

⁴¹ Ko juinchéña nā naa kuxintachjan ko naakóñaxón nā iko kuajon nā kuayé e kuxintachjan me e, ko tsango bake e nā juaxruxin ixi bikon nā nge e tsikóñaxin itja chujni.

⁴² Tjume e ndo Dio kuintu e ndo nā ixi tsitikaon nā nchanotsé jii ngajní.* Ji i tsikjin naa ngisen kuachronga chijnie ndo Dio ko ndachro ja in:

Ja anta ni Israel, ¿á naakóñaxónnta iko xrokuaya a
jan an
ti yuu kán nano bake enta ntajie?

⁴³ Na i, ja anta biku unta iko me e ti jii ningue xi dio Moloc ko kaxon biku unta nchanotsé ne e xi dio Renfán. Ja anta juinkekonchjiannta kain ji i ixi xrochje énta juasaya xranchi xrokjui ndo dio na anta.

Méxin, jan an tsantsjexinnta t̄ajnánta

ko xroxruan annta t̄ajna Babilonia ko ícha nta a.

⁴⁴ 'Xrabake e ni kuachrjenixinna ntajie, nti a chónda nā naa ni ngo tsikonchjianxin manta ti no jii ley tsiketuan an ndo Dio. Ji i juinchéña nā xranchi tsiketuen en ndo Dio ndo Moisés sinchéña ndo xranchi tsikikon ndo.

⁴⁵ Tjume e ni tsikachrjenixinna kuayé e nā ni ngo manta kuitu e nā. Tjume e ni chrikao ndo Josué bikao nā ni ngo me e nchakon juacha nā kuayé e nā nunte e ikaxin t̄ajna, ni me e

* **7:42 ngajní** cielo

kuantsjexin ndo Dio. Jaña kon en kuijija nchakon kuaxi kuetuan an ndo David.

⁴⁶ Tsango juinchenchaon ndo Dio ndo rey David ko ndo David tjaun ndo sinchekonchjian ndo naa ningue ndo Dio, ndo tsikitikaon ndo Jacob.

⁴⁷ Ko je e ndo juinchekonchjian i ndo ni ngo. Ndo Salomón, chjen en ndo David, juinchekonchjian ni ngo me e.

⁴⁸ Ko ndo Dio jii ngajní ji a ndo ngaxin in naa ni ngo tsikonchjianxin itja chujni. Ndachro naa xi nichja chijnie ndo Dio:

⁴⁹ Jan an ndo Dio ngajní nti a tetuanxin ko nunte xasintajni nti a jita a tutéena. ¿Ngixe e nchia sinchekonchjiananta?,
o, ¿ti no tsake e tsjokéena?

⁵⁰ ¿Á je a tjáana juintañaxin kain nge e?

⁵¹ 'Ko ja anta icha asáanta ko titikaon anta. Ja anta tin ennta ko nche enta xranchi ni chúxin a ndo Dio. Kain nchakon tetoku unta Espíritue ndo Dio. Ja anta nche enta xranchi ni tsikachrjenixinnta ó sa ó.

⁵² Ni tsikachrjenixinnta chinga juinchekao nã sen chronga chijnie ndo Dio. Ko naakóñaxón nã sen kuachronga ixi tsii ngisen xrochóna i ijie. Ko ó kuij ndo me e ko ja anta juinchekjinta ndo ko tjume e naakóñaxón nã ndo.

⁵³ Ja anta kuaye enta ley kuetuan an ndo Dio, nge e chronga ndo ángel, ko ja anta kuitikaon anta.

Ndakuen en ndo Esteban

⁵⁴ Ko hora kuin en nã nge e ndachro ndo Esteban, tsango koñao nã, ncheketo neno nã ixi koñao e nã ndo.

⁵⁵ Ko ndo Esteban ícha jichónnda ndo juachaxin Espíritue ndo Dio ko tsje e ndo ngajní ko bikon ndo juachaxien ndo Dio ko kaxon bikon ndo ndo Jesús siin ndo ndatsjonxin jian ti jii ndo Dio.

⁵⁶ Ko ndachro ndo Esteban:

—Bikon xitje e ngajní ko nti a jii Chjen en ndo Dio, xjan jongí e xranchi chujni, ndatsjonxin jian ti jii ndo Dio.

⁵⁷ Ko je e na bje e ndatsjon na ko séen koyaku e na ndo,

⁵⁸ ko sabikao na ndo ngande e tjajna ko ixro kónaxin na ndo, ko ni tjangi e ndo Esteban kuantsje na ti jitsáa na ko bake e na tutée naa chajan ndatin in Saulo ixi xrotsje e chán manta.

⁵⁹ Ko je e na yaxin na ixro ndo Esteban ko je e ndo tinóatée ndo ngajin Ncháina Jesús ko ja in ndachro ndo:

—Ncháina Jesús taye énta aséenna.

⁶⁰ Ko bake exin ntatuchi in ndo ko séen nichja ndo:

—Ncháina Jesús, ja anta tjankata inta ije ngajin ni stetónana.

Jaña ichro ndo ko ndakuen en ndo.

8

Ndo Saulo tjaun ndo tsóna ndo sen titikaon ndo Jesús

¹ Ndo Saulo naxraje o xraxaon ndo xranchi ni kóna ndo Esteban.

Ko nchakon me e juangíxin na tóna na sen titikaon ndo Jesús tjajna Jerusalén ko kain sen titikaon ndo Cristo kuaxi chjeke e sen sakjui sen

nchijíi nunte Judea ko nunte Samaria. Ko je o sen apóstol tsikinche e ndo Jesús kuitu e sen Jerusalén.

² Kaxin sen tsango titikaon ndo Dio juabaa sen ndo Esteban ko tsjangaxin sen ndo.

³ *Ko xi Saulo ningakon en xa sen titikaon ndo Cristo. Ko kuaxi xa kuixin in xa ngujngu ndo a sen ko itsé xa sen xi ko sen nchri ko bingakjin xa sen ko xraxin in xa sen ndo achjiso.

Juako sen chijnie ndo Cristo nunte Samaria

⁴ Ko sen sajuixin tjajna Jerusalén stetjako sen chijnie ndo Cristo nchijíi ti no kuintekji sen.

⁵ Naa ndo ndatin in Felipe sakjui ndo naa tjajna nunte Samaria ko kuaxi ndo chronga ndo chijnie ndo Cristo.

⁶ Ko tsango tsjé n̄a xra o nti a ko kuin en n̄a nge e ndachro ndo Felipe ixi ó bikon n̄a ixr̄a ijié juako ndo.

⁷ Ko itsjé ni chón̄da espíritue Xixron anxrée koxruen en n̄a ko espíritu me e kuyako kuachrjexin je e chujni me e. Kueya ni jua i tingatjen kuaxi n̄a itji n̄a ko ni ntarengo chao itji n̄a kaxon.

⁸ Ko kain ni tjajna ijié tsango juaxruxin bake e n̄a.

⁹ Tjajna me e bake e naa xi ndatin in Simón, xi me e tuso xa ko bancheye e xa ni nunte Samaria ko je e xa ndachro xa tsango tetuan an xa.

¹⁰ Kain n̄a jian stetin en n̄a, xjanchínchín ko ni tachríi ko ndachro n̄a:

—Xi ji i tsango chón̄da xa juachaxien ndo Dio.

¹¹ Kain n̄a bakitikaon n̄a xa ixi ti ixr̄a ijié banche e xa me e juincheye e xa n̄a itsjé nano.

12 Ko nchakon kuitikaon na chijni juako ndo Felipe kondee juachaxien ndo Dio ko ndo Jesucristo, tjume e ni xi ko ni nchri bikitée na.

13 Ko kaxon xi Simón, kuitikaon xa ko bikitée xa kojuangín xa rué e xa ndo Felipe ko tsango kuitekaon xa ixi bikon xa ixra ijié juako ndo Felipe.

14 Tjume e sen apóstol, sen tsikitu e tjajna Jerusalén, kuin en sen ixi itsjé ni nunte Samaria ó kuitikaon na chijnie ndo Dio. Ko tjume e kuetuen en sen ndo Pedro ko ndo Juan satsji sen nti a.

15 Ko nchakon kuiji sen juanche e sen ndo Dio ixi ni titikaon ndo Cristo nti a xrokuayé e na Espíritue ndo Dio

16 ixi xratayé a na Espíritue ndo. Je o tsikikitexin na nombrée Ncháina Jesús.

17 Tjume e ndo Pedro ko ndo Juan bake e itja sen ngata a jaa na ko kuayé e na Espíritue ndo Dio.

18 Ko xi Simón bikon xa ixi sen apóstol bake e itja sen ngata a jaa ni tsikitikaon ko kuayé e na Espíritue ndo Dio, ko tjume e xi Simón tjaun xa tsajon xa tomi ngajin sen apóstol

19 ko ndachro xa:

—Chjánanta juachaxin ixi kaxon jan an tsakée tjána ngata a jaa chujni ko tsayé e na Espíritue ndo Dio.

20 Ko ndachro ndo Pedro:

—Ja a ko tomia xroche ti xroi tanga i ixi xraxaoan tse na juachaxien ndo Dio.

21 Ja a jua i sinche e ixra ji i ixi ndo Dio no e ndo ixi ja a tjúa i asán.

22 Ko tintu é ti ndako a nche e ko tinóatáa ngajin ndo Dio ixi sinchemé e ndo ijie chonda.

23 Ó bikona ixi tsango chjuye e asáan ko kueya ijie chonda.

24 Ko tjume e xi Simón juate e xa ndachro xa:

—Tjanche enta Ncháina Jesús ixi ti ndachronta tsoen a ji in ngajin jan an.

25 Tjume e juexin chronga sen apóstol chijnie ndo Jesús, sakjui sen itsjé tjajna tikinixin en nunte Samaria ko juinchekuen en sen na chijni tajon juachaxin tsechón aséen chujni. Ko tjume e ikjan sen tjajna Jerusalén.

Ndo Felipe ko xi tsikj xjn tjajna Etiopía

26 Tjume e naa ndo ángel ne e Ncháina Dio ndache ndo Felipe:

—Tingatjen satjia no níjin, ti jii cha o xingajinxin chujni tjajna Jerusalén ti tjixin ni tjajna Gaza.

Cha o ji i tatsinga no ntajie.

27 Ko ndo Felipe bingatjen ndo ko sakjui ndo no cha o me e. Nti a kuetan ndo naa xi tjajna Etiopía. Je e xa naa xi eunuco ko xi me e tja o xa tomie jan Candace, naa jan reina tetuen en tjajna Etiopía. Je e xa tsikji xa tjajna Jerusalén, nti a kuajon xa juasaya ngajin ndo Dio.

28 Tjume e je e xa kjanxin xa tjajna Jerusalén ko satsji xa tjajnéé xa ko je e xa jiyá xa naa carreta me e jincheckuanxin xa naa xroon tsikjin ndo profeta Isaías, ndo kuachronga chijnie ndo Dio ó sa ó.

29 Ko Espíritue ndo Dio kuetuen en ndo Felipe:

—Itjia tonchjiñe e tjenka carreta me e.

³⁰ Ko konchjiñe e ndo Felipe ti jii carreta, ko kuin en ndo ixi xi me e jincheckuanxin xa xroon tsikjin ndo Isaías. Ko juanchangi e ndo xa:

—¿Á tienxian nge e rincheckuanxian?

³¹ Tjume e juate e xa ko ndachro xa:

—¿Xranchi tsianxin siá xro an ngisen tingijnana tsianxin nge e jichro xroon ji i?

Ko juanche e xa ndo Felipe tsajin in ndo carreta tsake e ndo tjenka xa.

³² Ko xroon chijnie ndo Dio jincheckuanxin xa, ja in ndachro:

Sabikao na ndo xranchi naa kutuchjon tsóña na.

Xranchi naa kutuchjon tenko ba nchakon kjin en na ba,

jaña je e ndo kaxon xro an nge e ndachro ndo ko xro an nge e nichja ndo.

³³ Juanoa na ndo ko juincheñe a na ndo ijie.

Ko sen kuachrjenixin ndo, ¿ngisen tseki ji i?, ixi je e ndo kuen en ndo ngata a nunte nti i.

³⁴ Tjume e xi eunuco juanchangi e xa ndo Felipe ko ndachro xa:

—Ixudio ndachijiana ngisen kon en kain ji in.

¿Á ndo tsikjin xroon ji in o á inaa ngisen?

³⁵ Tjume e ndo Felipe kuaxi ndo chronga ndo ti no jincheckuanxin xa ko juako e ndo xa chijnie ndo Jesús.

³⁶ Ko stetatsinga sen ti no jii inda, me e ndachro xi eunuco:

—Nti i jii inda. ¿Á jua i tsikitéexinna nti i?

³⁷ Ko ndachro ndo Felipe:

—Siá nduaxin titiká oan ngaya asáan, chao tsikitée.

Ko je e xa juate e xa:

—Titika on ixi ndo Jesucristo, Chjen en ndo Dio.

³⁸ Ko kuetuan an xi me e tsíxin carreta ko kayui sen xingajin sen ti jii inda ko ndo Felipe bikitée ndo xa.

³⁹ Tjume e juexin kuachrjexin sen inda, Espíritue ndo Dio sabikao ndo Felipe íjngo. Ko xi bikitée, í bikon a xa ndo Felipe. Ko tsango juaxruxin kua xa chaoé xa.

⁴⁰ Ko ndo Felipe konoxin ndo tjajna Azoto ko bakatsinga ndo ngujngu tjajna ko kuachronga ndo chijnie Ncháina Jesús, jaña juinche e ndo ko kuiji ndo tjajna Cesarea.

9

Ndo Saulo kuitekaon ndo ndo Jesús (Hch. 22:6-16; 26:12-18)

¹ Xi Saulo tsango ningakon en xa sen titikaon Ncháina Jesús ko tjaun xa naatsóñaxón xa sen. Méxin, sakjui xa bijée xa xitaana tetuan an

² ko juanchia xa naa xroon chóna juachaxin satsji xa ningo tjajna Damasco tsjée xa sen titikaon chijnie ndo Jesús ixi tsikao xa sen nchri ko sen xi tjajna Jerusalén xroxruxin in xa sen ndo achjiso.

³ Ko yaa xa cha o ko ó xrokuiji xa tjajna Damasco, tuinxin kuij naa xro i kuixin ngajní bin-gasáña ngandajin xa.

⁴ Ko xi Saulo kuitsinga xa nunte, ko kuin en xa nichja naa ngisen ko ndachro:

—Saulo, Saulo, ¿sonda ningakonnana ko tengiana?

⁵ Ko tjume e xi Saulo juanchangi xa:

—¿Ngisen ja anta?

Ko tée sen nichja, ndachro:

—Jan an ndo Jesús, ndo tsango ningakon én.

⁶ Je e xa xranga xa ko xronka xa, ko ja in ndachro xa:

—Ja anta, ¿nge e tjaunnta sinta a?

Ko Ncháina Jesús ndachro ndo:

—Tingatjén, tixin ia tjajna Damasco, ko nti a tse-tuan an nge e sinche e.

⁷ Ko tjume e ni bijikao xi Saulo tsango xronka nā ixi kuin en nā tée naa ngisen nichja ko xro an ngisen bikon nā.

⁸ Ko bingatjen xi Saulo ko kuantje e ikon xa ko xro an nge e bikon xa. Ko ni tikao xa ngatsé e nā xa ko sabikao nā xa tjajna Damasco.

⁹ Ko nti a bake e xa ní nchakon, bikon a xa ko juine a xa ko xro an nge e kui i xa.

¹⁰ Ko tjajna Damasco bake e naa ndo titikaon Ncháina Jesús ndatin in Ananías, ko juachaxin espíritue ndo Dio tsikikonxin ndo ndo Jesús ja in kuituan an ndo Jesús ngajin ndo:

—Ananías.

Ko ndo Ananías juate e ndo:

—Nti i ritjén, Nhána.

¹¹ Ko ndachro Ndo Jesús:

—Tingatjén satjia cha o ndatin in Nao. Ko tjée ndo a naa ndo ndatin in Judas ko nti a tsinchía naa xi ndatin in Saulo tsikí x̄in tjajna Tarso ko je e xa jinichja na xa,

¹² ixi je e xa bikon xa naa xi ndatin in Ananías tixin in xa nchia ko tsake e itja xa ngata a jaa je e xi me e ko chao tsikon xa íjngo.

¹³ Ko ndo Ananías juate e ndo:

—Nchána, ó kuin an nge e ndachro kueya chujni, ixi xi me e ndako a nche e xa ngajin sen titikaon ngajinnta, sen ste tjajna Jerusalén.

¹⁴ Ko jai kuji xa nti i ixi tsikayé e xa juachaxien xitaana tetuan an ixi tsikao xa kain sen titikaonnta.

¹⁵ Ko Ncháina Jesús ndachro ndo:

—Itjia ixi jan an kuincha a xi me e ixi tsjako xa chijnina. Sinchekuen en xa ni ste jée tjajna ko xi rey ko kaxon ni israelita,

¹⁶ ko jan an tsjako a xa ixi tsango tangi tson en xa ixi tsitikaonna xa.

¹⁷ Tjume e ndo Ananías sakjui ndo nchia ti jii xi Saulo ko bake e itja ndo ngata a jaa xa ko ndachro ndo:

—Ja a kichian Saulo, Ncháina Jesús, ndo bikuan ngatja cha o, kuetuanna ndo jui i ixi tsikuan íjngo ko tsaye é Espíritue ndo.

¹⁸ Ko tuinxin kuintjixin ikon xi Saulo naa nge e xranchi kjo e kucheg, ko chao bikon xa íjngo. Ko bingatjen xa ko bikitée xa.

¹⁹ Ko tjume e juine xa ko chao konsoji xa íjngo. Ko kuitu e xa kaxin nchakon ngajin sen titikaon Ncháina Jesús tjajna Damasco.

Ndo Saulo juinchekuen en ndo na tjajna Damasco

²⁰ Ko tjume e juangixin ndo Saulo juako ndo ngaxin in ni ngo Israel ixi ndo Jesús, Chjen en ndo Dio.

²¹ Kain ni jitin en tsango xronka na ko ndachro na:

—¿Á je a xi ji i barué e ko bakoña kain ni titikaon ndo Jesús tjajna Jerusalén? ¿Á me e kuji xin xa nti i

ixi tsikao xa ni titikaon ndo Jesús ngajin xitaana tetuan an?

²² Ko ícha xrakon a xa juako xa ixi nduaxin ndo Jesús ndo Cristo. Ko ni judío bake e tjajna Damasco jua i nichjangí e na ndo.

Xi Saulo satinge e xa ni judío

²³ *Ko ó kuatsinga itsjé nchakon ko ni judío stexraxaon na xranchi naatsóñaxón na xi Saulo.

²⁴ Ko ó kono e ndo ti stexraxaon na. Ko tiie ko nchakon stechón en na ngandangi nduja tjajna ixi tjaun na naatsóñaxón na ndo.

²⁵ Ko naa tiie sen titikaon Ncháina Jesús bake e sen ndo Saulo ngaya naa ntaxra ijié ko tjume e juinchexingajin sen ntaxra jiá ndo tuenxin tjatu o jii ngandajin nduja tjajna. Me e chao sabinga ndo.

Ndo Saulo sakjui ndo tjajna Jerusalén

²⁶ Ko nchakon kuiji ndo Saulo tjajna Jerusalén tjaun ndo xrokui ndo ngajin sen titikaon Ncháina Jesús. Ko kain sen xronka sen ixi kuitikaon a sen á nduaxin kaxon je e ndo ó titikaon ndo Ncháina Jesús.

²⁷ Ko tjume e ndo Bernabé sabikao ndo ndo Saulo ti ste sen apóstol ko chronga ndo ixi ndo Saulo tsikikon ndo Ncháina ngatja cha o ko Ncháina tsinichje e ndo ndo. Ko tjajna Damasco juako ndo Saulo nombrée Ncháina Jesús ko xronka i ndo.

²⁸ Tjume e ndo Saulo kuitu e ndo tjajna Jerusalén ko chrikao ndo sen apóstol. Ko xrakon a ndo tjako ndo chijnie Ncháina Jesús.

29 Ko je e ndo tjaun ndo tsjao ndo ni judío nichja griego ko je e na tjaun na naatsóñaxón na ndo.

30 Tjume e sen titikaon ndo Cristo tsikin en sen nge e xrokon en ndo ko sabikao sen ndo tjajna Cesarea ko kuetuen en sen ndo satsji ndo tjajna Tarso.

31 Ko tjume e sen titikaon Ncháina nchijí nunte Judea, nunte Galilea ko nunte Samaria juaxruxin bake e sen ko ícha kuitikaon sen ndo Jesús. Kuachóna sen juasaya ngajin Ncháina ko Espíritue ndo Dio bingijna sen ko ícha konkueya señ.

Xi Eneas koxruen en xa

32 Tjume e ndo Pedro kuitsje e ndo kain sen titikaon Ncháina Jesús. Kaxon sakjui ndo kuitsje e ndo sen titikaon Ncháina ste tjajna Lida.

33 Nti a kuitja ndo naa xi ndatin in Eneas. Ijní nano jitsingata a xa kania ixi tsiken en yui tutée xa.

34 Ko ndachro ndo Pedro:

—Eneas, ndo Jesucristo syntaxruan an ndo jai. Tingatjen tatsían kania a.

Ko tjume e xi Eneas tuinxin bingatjen xa.

35 Ko kain ni jii tjajna Lida ko tjajna Sarón bikon na ixi koxruen en xa ko kaxon je e na kuitikaon na Ncháina Jesús.

Xechón nchri Dorcas

36 Ko nchakon me e bake e naa nchri tjajna Jope titikaon nchra Ncháina ko ndatin in nchra Tabita ko ngigua griego xrondachro Dorcas. Ko je e nchra jian juinche e nchra ko bingijna nchra ni nóa.

³⁷ Tjume e naa nchakon tsango koni e nchra ko ndakuen en nchra. Ko juinéma sen cuerpoe nchra ko bake e sen nchra ti piso yuxin noi.

³⁸ A tjanya Jope jii tjanya tjenka tjanya Lida, nti a bake e ndo Pedro. Ko sen titikaon Ncháina no e sen ixí nti a jii ndo. Ko tjume e xruan an sen yuu sen xronache sen ndo ixí tuinxin tsii ndo ko tsonchrjen a ndo.

³⁹ Ko tjume e sabikao sen ndo Pedro. Ko kuiji sen nti a ko tuinxin bikao sen ndo ti jii cuerpoe nchri tsiken en. Nti a ste kain nchri ka an tsango tsjanga nchra ko juako nchra kain manta tsijaon nchri Dorcas nchakon xrabakechón nchra.

⁴⁰ Tjume e kuetuan an ndo Pedro ixí kain na tsachrje na nduja. Ko bake exin ntatuchi in ndo ko nichje e ndo ndo Dio. Ko jitsje e ndo nchri tsiken en ko ndachro ndo:

—Tabita, tayá.

Ko je e nchra kuantje e ikon nchra ko bikon nchra ndo Pedro ko bake e nchra nunte.

⁴¹ Ko tjume e itsé ndo itja nchra ko juinchengatjen ndo nchra. Ko kuiye e ndo kain sen titikaon Ncháina ko kaxon kain nchri ka an ixí tsikon sen ó tsixechón nchra.

⁴² Tjume e kain ni jii tjanya Jope kono e na nge e juinche e ndo Pedro ko itsjé na kuitikaon na Ncháina Jesús.

⁴³ Tjume e ndo Pedro kuitu e ndo itsjé nchakon tjanya me e ko bake e ndo ndo a ndo Simón, naa ndo kuanchexema tjue é iko.

10

Ndo Pedro ko ndo Cornelio

¹ Tjajna Cesarea bake e naa ndo ndatin in Cornelio. Ndo me e ndo capitán tetuen en xi soldado kuixin Italia.

² Tsango jian ndo ko kain sen ndo a ndo xraxaon na ndo Dio ko tajon ndo kueya tomi ixi tjaun ndo tsingijna ndo sen judío ko kain nchakon nichje e ndo ndo Dio.

³ Tjume e naa nchakon hora nínxin ó kóndo tuinxin bikon ndo naa ndo ángel nche e ixra ngajin ndo Dio, ndo me e kuixin in ndo ti jii ndo Cornelio ko ndachro ndo:

—Cornelio.

⁴ Ko ndo Cornelio jitsje e ndo ndo ángel ko xronka ndo ko juanchangi ndo:

—¿Nge e tjaunnta?

Ko ndachro ndo ángel:

—Ndo Dio bake e juaxruxin ixi ti nichje é ndo ko jian nche e tingijna ni nóa.

⁵ Méxin, tetuen én naa ngisen satsji tjajna Jope ixi tsikao na ndo Simón kaxon ndatin in Pedro.

⁶ Ko ndo me e jii ndo ndo a naa xi kaxon ndatin in xa Simón. Xi me e kuanchexema tjue é ko. Ndo a xa jii tjenka ndachaon.*

⁷ Hora sakjui ndo ángel, ndo nichje e ndo Cornelio, je e ndo Cornelio kuiye e ndo yuu xi nchexra ko kaxon naa xi soldado xraxaon xa ndo Dio ko jian tjento ndo xa.

⁸ Beki e ndo xa kain ti bikon ndo ko tjume e kuetuen en ndo xa satsji xa tjajna Jope.

⁹ Ngusine nchakon íngo steyá xa cha o tjenka tjajna Jope, ko ndo Pedro kuajin in ndo ngata a nchia ixi nti a xronichjexin ndo ndo Dio.

* **10:6 ndachaon** mar

10 Ko tjume e tsango kuen en ndo jinta ko tjaun ndo sine ndo. Nandá stenchekonchjian nã nge e sine ndo, tuinxin bikon ndo naa nge e.

11 Bikon ndo ixi xitje e ngajní ko nti a xingajinxin naa manta ijié. Jixrite e kanoó ikon manta.

12 Ko ngaxin in manta jitjinga iko chónnda noó tutée kao kunchee ko kain iko tjanga.

13 Ko tjume e kuin en ndo nichja naa ngisen ndachro:

—Pedro, taya, ton iá iko me e, ko inte ba.

14 Ko ndo Pedro juate e ndo:

—Nchána. Jan an nai a ine nge e tjúá i.

15 Ko ndo ángel nichja íjngo ko ndachro ndo:

—Ti ó juinchetjúá ndo Dio, ndachro a ixi tjúá i.

16 Níi kon en jaña ko tjume e tuinxin sakjui manta ngajní.

17 Tjume e ndo Pedro xraxraon ndo nge e xrondachro ti bikon ndo, tuinxin xi xruan an ndo Cornelio kuiji xa ngandangi nduja nchia me e ko tsijanchangi xa ti no jii ndo a ndo Simón.

18 Tjume e séen juanchangi xa:

—¿Á nti i jii ndo Simón kaxon ndatin in Pedro?

19 Xra jixraxaon ndo Pedro nge e bikon ndo, ko Espíritue ndo Dio ndachro:

—Tsje é ó kuij níi sen tjanchangi ixi ja a.

20 Taya, xingajian ko satiko a xa ko ta ia juachjaon, ixi jan an xruan an sen ñã ngajian.

21 Tjume e xingajin ndo Pedro ti ste xa ko ndachro ndo:

—Jan an Pedrona. ¿Inge e tjéexinntana?

22 Ko juate e xa:

—Kuetuan an ndo capitán Cornelio jui ina nti i. Je e ndo naa ni tsango jian ko xraxaon ndo ndo

Dio. Kain ni judío chónde e ña ndo juasaya ko tjue e ña ndo. Naa ndo ángel tsixrua an ndo Dio nichje e ndo ko chronga ndo ángel ixi xrojirua ananta ixi itsjinta ndo a ndo ko tsin en ndo nge e xrondachronta.

²³ Ko ndo Pedro ndachro ixi chao tsitu e xa nti a tiie me e. Ko ndúyaxin sabikao xa ndo Pedro kaxon kaxin ni titikaon Ncháina ste tjajna Jope.

²⁴ Tjume e inaa nchakon kuiji sen tjajna Cesarea. Nti a jichón en ndo Cornelio ko kaxon kain ni ndo a ndo ko ni chúxin ndo tsikiye e ndo.

²⁵ Ko nchakon kuiji ndo Pedro ndo a ndo Cornelio, tjume e ndo Cornelio kuachrjexin ndo nchia ko nichje e kichuu ndo. Ko bake exin ntatuchi in ndo Cornelio ngajin ndo Pedro ixi tjaun ndo xrokuajon ndo juasaya ngajin ndo Pedro.

²⁶ Tjume e ndo Pedro juinchengatjen ndo ndo Cornelio ko ndachro ndo:

—Tingatjen. Takexin a ntatuchi ian. Jan an naa chujni xranchi ja a.

²⁷ Ko jitjao kichuu sen kuixin in sen ndo a ndo Cornelio ko bikon ndo Pedro ixi kueya ña ste ña nti a.

²⁸ Ko ndachro ndo Pedro:

—Ja anta no anta ixi jan anna xro judíona jua i tsjentona chujni je a judío ko chonda ina juachaxin tsixin inna ndo a ni me e. Ko je e ndo Dio juako na ndo ixi jua i xrondachrjan tjúa i ngixe i chujni.

²⁹ Méxin, nchakon kuiya nanta, tuinxin jui i. Tja on tsonóna sonda kuiya nantana.

³⁰ Tjume e juate e ndo Cornelio ko ndachro ndo:

—Ó kuatsinga noó nchakon, xranchi hora i nti i ritjén nía rintakatséña o jinta ko rinichja a ndo Dio. Ko tuinxin bikon naa ngisen jiyá manta tjúá jítóngíxin.

³¹ Ndachro sen me e: “Cornelio, ó kuin en ndo Dio nge e nichje é ndo ko ó no e ndo ixi tsango tingijna ni nóa.

³² Méxin, tetuen én naa ngisen satsji tjajna Jope ixi tsika o sen ndo Simón kaxon ndatin in Pedro. Jii ndo ndo a naa xi kaxon ndatin in xa Simón chjée xroan tjue é iko ko tjenka ndachaon jii ndo a xa”, ichro ndo ángel me e.

³³ Méxin, jaña tuinxin kuituan an ngisen kuiya a. Jian juinche e ixi jui ia nía. Ko jai ó no e ndo Dio ixi kain jan anna tja onna tsin anna nge e kuetuan an Ncháina Dio xrochronga ngajinna.

Ndo Pedro juinchekuen en ndo ndo Cornelio chijnie ndo Dio

³⁴ Tjume e ndachro ndo Pedro:

—Jai ó tianxin ixi ndo Dio xraje o tjue e ndo Dio kain chujni,

³⁵ ixi je e ndo tayé e ndo kain sen ngixe i tjajna titikaon ko tajon sen juasaya ngajin ndo.

³⁶ Ndo Dio nichje e ndo sen tjajna Israel ko kuin en sen chijni tajon juaxruxin chronga Ncháina Jesucristo. Je e ndo Nchée kain chujni.

³⁷ Ja anta ó no anta jian kain nge e tsikon en nchijí ti ste ni judío xrangíxinxín nunte Galilea nchakon ndachro ndo Juan xrokonda tsikitée kain chujni.

³⁸ Ja anta ó no anta ixi ndo Dio kuajon ndo juachaxien Espíritue ndo kuayé e ndo Jesús, ndo

tsiki xin tjajna Nazaret ko ó no anta kaxon ixi ndo Jesús jian juinche e ndo ko juinchexruen en ndo kain ni tangi ste kondeexin Xixron anxrée. Jaña jian juinche e ndo Jesús ixi ndo Dio jii ngajin ndo.

³⁹ Tjume e jan anna nduaxin bikona kain nge e juinche e ndo Jesús nunte Judea ko tjajna Jerusalén. Tjume e juankanito na ndo ntacru ko naakóñaxón na ndo.

⁴⁰ Tjume e ndo Dio juinchexechón ndo ndo Jesús nchakon nínxin ko kuajon ndo juachaxin bikona ndo íjngo.

⁴¹ Je a kain chujni bikon na ndo. Je o sen kuinche e ndo Dio ixi tsikon sen nduaxin xechón ndo. Jan anna juinekianna ndo ko kuikiana ndo nchakon xechón ndo.

⁴² Kuituan an ndo ixi jan anna sintakuan anna ko xrochra ngana ixi je e ndo sinchéña ndo ijie ngajin kain chujni, ni stechón ko ni tsiken en.

⁴³ Kain sen chronga chijnie ndo Dio chronga sen ixi ngujngu chujni titikaon ndo Jesús, sen me e sinchemé e ndo jíee sen.

Ni je a tjajna judío kuayé e na Espíritue ndo Dio

⁴⁴ Xrajinichja ndo Pedro, tjume e kain ni jitin en nge e juako ndo kuayé e na Espíritue ndo Dio.

⁴⁵ Tjume e sen judío tsikika o ndo Pedro xronka sen ixi ndo Dio kuajon Espíritue ndo, kuayé e sen je a judío.

⁴⁶ Méxin, kuin en sen judío jinichja ndo Cornelio ko sen jikao ndo jée ngigua ko stetajon sen juasaya† ngajin ndo Dio.

⁴⁷ Tjume e ndachro ndo Pedro:

† **10:46 juasaya** respeto, honor

—Sen ji i ó kuayé e sen Espíritue ndo Dio xranchi kuayé e jaina. Jai ó chao tsikitée sen.

⁴⁸ Tjume e kuetuan an ndo Pedro tsikitée kain sen ixi juachaxien ndo Jesucristo. Ko sen bik-itée juanchia sen tsitu e ndo Pedro nti a kaxin nchakon.

11

Nichja ndo Pedro ngajin sen Jerusalén

¹ Tjume e sen kuinche e Ncháina Jesús ko kain sen titikaon Ncháina ste nunte Judea, sen me e kuin en sen ixi ni je a judío ó titikaon na chijnie ndo Dio.

² Ko nchakon ikjan ndo Pedro tjajna Jerusalén kaxin sen ste nti a tjaun sen ixi kain sen xrochóna sen chji e ni judío, ko tjakaxin sen ndo Pedro.

³ Juanchangi e sen ndo ko ndachro sen:

—¿Sonda ikjuinta kuitsje enta ni je a judío, ko juinekuunta na?

⁴ Ko ndo Pedro kuaxi chronga ndo kain nge e tsikon en ko ndachro ndo:

⁵ —Jan an bake e tjajna Jope rinichja a ndo Dio ko tuinxin bikon naa manta ijié xingajinxin ngajni. Jixrite e kanoó ikon manta ko kuji manta ti ritjén jan an.

⁶ Tjume e tsja a jian ko bikon ngaya manta jitjinga iko chóna noó tutée, ko jie e, kao kunchee ko kain ko tjanga.

⁷ Kaxon kujin an téa naa ngisen ndachijina: “Pedro, taya ton iá iko me e ko inte.”

⁸ Ko juata a: “Na i, Nhána. Nai a ine jan an ninaa nge e tjúa i.”

⁹ Ko íjngo nichja téé kuixin ngajní ko ndachro: “Ti nge e juinchetjúá ndo Dio ndachro a ja a ixi tjúá i.”

¹⁰ Jaña kon en nínxin. Ko tjume e kain ji in ikjan ngajní.

¹¹ Ko tuinxin ní xi kuiji nchia ritjén. Tsiki xin xa tjajna Cesarea ko tjéena xa.

¹² Ko Espíritue ndo Dio kuetuanna chao tsiki an xa ko kaxon biki an ikjaon sen kichuuna. Kainna kuixi inna ndo a naa ndo ndatin in Cornelio.

¹³ Tjume e ndo Cornelio chronga ndo ixi bikon ndo naa ndo ángel siin, ja in nichja: “Tetuen én ngisen satsji tjajna Jope tsika o sen naa ndo ndatin in Simón ko kaxon ndatin in Pedro.

¹⁴ Je e ndo xrochronga ndo xranchi ja anta ko kain sen ndointa xrochondanta juachaxin tsarichonnta kain nchakon.”

¹⁵ Tjume e jan an kuaxi nichja a sen ko tuinxin kuayé e sen Espíritue ndo Dio xranchi kuayé e jaina seno.

¹⁶ *Tjume e xraxa on ti kuanichja Ncháina Jesús, ti kuandachro ndo: “Nduaxin ndo Juan je o inda bikitéexin ndo chujni, ko jai ja anta tsaye enta Espíritue ndo Dio.”

¹⁷ Xranchi jan anna nchakon kuaxi kuitikaonna Ncháina Jesucristo, tjume e kuajon ndo Dio Espíritue ndo kuaye ena, jaña jai kuajon ndo Dio Espíritue ndo kuayé e sen ji in. ¿Ngisen jan an ixi xrokuitikaon a nge e juinche e ndo Dio?

¹⁸ Tjume e sen kichuuna, sen ste tjajna Jerusalén, kuin en sen nge e tsikon en ko tenko

sen ko kuajon sen juasaya ngajin ndo Dio ko ndachro sen:

—Kuajon ndo Dio juachaxin kaxon ngajin ni je a judío ixi tsayé e n̄a juachaxin tsitikaon n̄a ndo Dio ko xrochón̄da n̄a juachaxin tsechón̄ n̄a kain nchakon.

Ni ngo tjajna Antioquía

¹⁹*Nchakon naakóñaxón̄ n̄a ndo Esteban, kuaxi n̄a rué e n̄a ko ningakon en n̄a sen titikaon Ncháina Jesucristo. Xrokonda sakjui sen nunte Fenicia ko Chipre, ko tjajna Antioquía. Nti a juinçekuen en sen je o ni judío chijni jian.

²⁰Tjume e ikaxin sen titikaon Ncháina tsiki x̄in sen tjajna Chipre ko kaxin sen tjajna Cirene sakjui sen tjajna Antioquía ko nchakon kuiji sen nti a juinçekuen en sen ni je a judío chijni jian ne e Ncháina Jesucristo.

²¹Juachaxien Ncháina Jesús chonda sen; méxin, kueya ni nti a kuayé e n̄a chijni jian ko kuitikaon n̄a Ncháina Jesucristo.

²²Ko tjume e sen titikaon Ncháina Jesús tjajna Jerusalén kuin en sen nge e tsikon en tjajna Antioquía ko xruan an sen ndo Bernabé nti a.

²³Ko nchakon kuiji ndo Bernabé bikon ndo xranchi ndo Dio tsango bingijna ndo ni nti a kaxon. Ko tsango bake e juaxruxin aséen ndo. Tjume e nichje e ndo n̄a ixi nichijí aséen n̄a tsitikaon n̄a Ncháina ko soji tsake e n̄a.

²⁴Ixi ndo Bernabé me e naa ngisen tsango jian aséen ko chón̄da ndo juachaxien Espíritue ndo Dio

ko jian chuntia* ndo ndo Jesús; méxin, kueya na kuitikaon na Ncháina Jesús.

²⁵ Tjume e ndo Bernabé sakjui ndo tjajna Tarso bijée ndo ndo Saulo.

²⁶ Nchakon kuitja ndo ndo Saulo, sakjui sen tjajna Antioquía. Ko bake e sen ngajin sen titikaon Ncháina nchijí naa nano ko juinchekuen en sen itsjé chujni. Méxin nti a xrangixixín kuiye e na sen titikaon ndo Cristo: “sen Cristiano.”

²⁷ Tjume e kaxin sen chronga sen chijnie ndo Dio sajuixin sen tjajna Jerusalén ko kuiji sen tjajna Antioquía.

²⁸ *Naa ndo ndatin in Agabo kuíxin ndo ti tsixra o sen titikaon ndo Jesús ko xixi juachaxien Espíritue ndo Dio chronga ndo xixi tsijí jinta nchijí nunte nti a. Ko ti chronga ndo nduaxin kon en nchakon baketuan an naa xi ndatin in Claudio.

²⁹ Ko tjume e sen titikaon Ncháina tjajna Antioquía xraxaon sen xixi je e sen tsingijna sen sen titikaon ndo Cristo jii nunte Judea. Ko ngujngu sen kuajon sen nge e kuachónnda sen.

³⁰ Jaña xraxaon sen ko kuajon sen tomi sabikao ndo Bernabé ko ndo Saulo xrokuayé e sen tituan an ni ngo nunte Judea.

12

Kuen en ndo Jacobo, ko xraxin in na ndo Pedro ndo ndo achiso

¹ Nchakon me e xi rey Herodes kuaxi xa bengi xa sen titikaon ndo Jesús xixi tjaun xa xrotsé xa sen.

* **11:24 chuntia** tener fe **11:28** Hch. 21:10.

² Ko kuetuan an xa tsenxin ndo Jacobo ixi chika espada, ndo Jacobo me e ndo kichuu ndo Juan.

³ Ko bikon xi Herodes ixi juinche e ni judío juaxruxin ixi kuen en ndo Jacobo, me e itsé xa ndo Pedro. Ji i kon en nchakon kia Pascua ti ine na nutja chóna i nge e nchetja in nio.

⁴ Itsé xi Herodes ndo Pedro ko xraxin in xa ndo ndo achjiso. Ko nti a jii noó grupo xi soldado ko jii noó xi soldado ngujngu grupo. Jixraxaon xi Herodes ixi tsatsingaja kia pascua, tsantsje xa ndo Pedro ixi tsikon nchijí tjanya israelita xranchi tsen en ndo.

⁵ Xrajíi ndo Pedro ngaxin in ndo achjiso ko jinda xi soldado ndo, ko kain sen titikaon Ncháina jinichje e sen ndo Dio ixi tsingijna ndo ndo Pedro.

Ndo Dio bingijna ndo ndo Pedro

⁶ Tiie me e xraxaon xi Herodes ixi ndúyaxin tsantsje xa ndo Pedro tsjako xa ndo ngajin ni tjanya. Ko ndo Pedro jijua ndo ngusine yuu xi soldado ko jichroaxin ndo yuu chika cadena. Ko ikaxin xa jindaa xa ntachja ndo achjiso.

⁷ Ko tuinxin konoxin naa ndo ángel ne e Ncháina, ko ngaxin in ndo achjiso tsango kongíxin ko bake e ndo ángel itja ndo chjiyéé ndo Pedro me e xingame e ndo. Ko ndachro ndo ángel:

—Taka xingama a.

Ko tjume e chika cadena jitséxin itja ndo Pedro kue e chika nunte.

⁸ Ko kuetuan an ndo ángel:

—Taritsía ko takée kateá.

Ko kuitikaon ndo Pedro me e ndachro ndo ángel íjngo:

—Taritsía noxráa ko ruana na sachjina.

⁹ Ko tjume e ndo Pedro rué e ndo ndo ángel ko noe a ndo á nduaxin jaña jiton en o je o naa nge e jitikon ndo.

¹⁰ Ko juexin kuatsinga sen ti ste xi sa ó stendáa ko kuatsinga sen ti ste xi yuxin stendáa. Tjume e kuiji sen ti jii ntachja chika ijié tjenka cha o. Ko ntachja chika je o ntachja xitje e ntachja ko kuachrje sen ko kuatsinga sen naa cha o ko tuinxin ndo Pedro í bikon a ndo ndo ángel je o ndo kuitu e ndo.

¹¹ Ko tjume e ndo Pedro kono e ndo ixi nduaxin kon en ji i ko ndachro ndo:

—Ó nóna jai ixi nduaxin Ncháina tsixrua an naa ndo ángel ixi tsingijnana ndo ixi tsóña ina xi Herodes ko xruan an nge e tsónna xranchi tjaun ni judío.

¹² Ko jixraxaon ndo nge e kon en ndo, me e sakjui ndo ndo a jan María, janée ndo Juan, kaxon nchekin in sen Marcos. Nti a tsixra o itsjé sen titikaon ndo Jesús ko stenichje e sen ndo Dio.

¹³ Ko binga ndo ntachja cha o ko nichja ndo. Ko naa nchrichajan ndatin in Rode kuachrje nchrichan kuitsje e nchrichan ngisen kuii.

¹⁴ Ko hora juatsuan nchrichan nichja ndo Pedro, tjume e taka i kuantje e nchrichan ntachja ixi tsango ché e nchrichan. Ko binga nchrichan sakjuichronga nchrichan ixi ngandangi nduja nchia jii ndo Pedro.

¹⁵ Ko ndachro sen:

—Tsiijnchetjáña jáa.

Ko je e nchrichan ndachro:

—Nduaxin je e ndo Pedro —ichro nchrichan.

Ko je e sen ndachro sen:

—Je a je e ndo. Je o espíritue ndo.

¹⁶ Ko ndo Pedro ícha jitinga ndo ntachja ko hora kuantje e sen ntachja bikon sen ndo ko xronka sen.

¹⁷ Ko tjume e juakoxin ndo Pedro itja ndo ixi xrotenko sen ixi chronga ndo xranchi Ncháina kuantsjexin ndo ndo ndo achjiso. Ko ndachro ndo:

—Teki énta ndo Jacobo ko kain sen kichuuna nge e kónna —ichro ndo ko tjume e sakjui ndo jée tjajna.

¹⁸ Ko ndúyaxin tsango xrakon xi soldado ixi noe a xa ti no satsikji ndo Pedro.

¹⁹ Ko xi Herodes kuetuen en xa xi soldado satsijée xa ndo Pedro, ko kuitja i xa ndo, ko xi Herodes juankata a xa xi soldado ijie ko kuetuan an xa ixi tsen en xi soldado. Ko tjume e xi Herodes kuachrjexin xa nunte Judea ko sakjui xa tjajna Cesarea ko nti a bake e xa.

Kuen en xi Herodes

²⁰ Xi Herodes ningakon en xa ni tjajna Tiro ko tjajna Sidón. Ko je e na jua kichuu na ixi satsjitsje e na xa. Nti a jii naa xi ndatin in Blasto ko kuayakon en xa ndo a xi Herodes, ko tjume e juanche e na xa xronichjaxin xa na ngajin xi tetuan an. Ko juanchia na ixi tsetokau a xi Herodes je e na ixi tjajnée xa ti xin nge e ine na.

²¹ Tjume e xi Herodes ndache xa na ixi xroxra o na naa nchakon. Ko je e xa kuéyá xa manta chaxro tsje e ko tjintee ko kueta a xa ntaxitaon ne e chujni tetuan an. Ko tjume e kuaxi xa nichje e xa kain ni tsixra o nti a.

²² Ko tjume e kuaxi na kuyako na, ko ndachro na:

— ¡Je a chujni jinichja! Naa dio jinichja.

²³ Tjume e tuinxin naa ndo ángel ne e ndo Dio juincheni e xi Herodes ixi kuajon a xa juasaya ngajin ndo Dio. Ko kutsindo juine ngaya tse e xa ko ndakuen en xa.

²⁴ Ko itsje na kuin en na chijnie ndo Dio nguixin nti a ko konkueya ni kuitikaon Ncháina Jesús.

²⁵ Ko ndo Bernabé ko ndo Saulo ó juinchejexin ixra kuachóna sen tjajna Jerusalén, tjume e ikjan sen tjajna Antioquía ko sabikao sen ndo Juan, ndo kaxon nchekin in sen Marcos.

13

Xruan an sen ndo Pablo ko ndo Bernabé

¹ Ni ngo Antioquía ste sen nichja chijnie ndo Dio. Sen me e ndo Bernabé ko ndo Simón, kaxon nchekin in na ndo Negro, ndo Lucio, ndo tjajna Cirene, ndo Manaén, naa ndo tsikajikao xi Herodes, xi tetuan an nunte Galilea, ko ndo Saulo.

² Naa nchakon tsixra o sen tsajon sen juasaya ngajin ndo Dio, nchakon me e tsijinchekatse ñao sen jinta. Tjume e Espíritue ndo Dio ndache ndo sen:

— Tantsjendáanantana ndo Bernabé ko ndo Saulo ixi jan an ó kuincha a sen xrotjá a sen naa ixra sinche e sen.

³ Ko juexin nichje e sen ndo Dio ko juinchekatse ñao sen jinta, bake e itja sen ngata a jaa sen me e ko ndachro sen ixi chao satsji sen.

Ndo Pablo ko ndo Bernabé ste sen nunte Chipre

⁴ Ko tjume e Espíritue ndo Dio xruan an ndo Bernabé ko ndo Saulo sakjui sen tjajna Seleucia. Ko nti a kuajin in sen naa ntábarco ko sakjui sen nunte Chipre.

⁵ Ko kuiji sen naa tjajna ndatin in Salamina ngande e nda, nti a xingajinxin sen ntábarco ko nti a juangíxin sen juako sen chijnie ndo Dio ningue ni judío. Kaxon bikao sen ndo Juan ixi tsingijna ndo sen.

⁶ Ko tjume e sakjui sen nchijíi nunte Chipre kuijija sen tjajna Pafos. Nti a kuetan sen naa xi tuso, xi me e naa xi judío ndatin in Barjesús. Je e xa ncheya xa ixi ndachro xa kaxon nichja xa chijnie ndo Dio.

⁷ Ko xi me e bakekao xa xi tetuan an ndatin in Sergio Paulo. Ko je e xi tetuan an tsango jian xraxaon xa, me e kuiye e xa ndo Bernabé ko ndo Saulo ixi je e xa tjaun xa tsin en xa chijnie ndo Dio.

⁸ Tjume e xi tuso, kaxon ndatin in xa Elimas, ningakon en xa sen tjako chijnie ndo Dio ixi tjaun a xa ixi xi tetuan an xrochuntia xa ndo Dio.

⁹ Tjume e ndo Saulo, kaxon nchekin in na Pablo, tsango chónnda ndo Espíritue ndo Dio. Ko jian tsje e ndo xi tuso

¹⁰ ko ndachro ndo:

—Ja a naa chujni ncheya, chjen en Xixron anxrée ja a, ningakon en kain nge e jian. ¿Sonda nchetjáñajian chujni ixi tjaun a tsitikaon na Nchána Jesús?

¹¹ Jai tangi tson an. Tsontakutsian ko kaxin nchakon tsikon a chjiixrué nchakon.

Ko tuinxin xi Elimas í bikon a xa ko juée xa naa ngisen tsingatse e xa ko satsikao na xa ixi ítikon a

xa.

¹² Tjume e jaña bikon xi tetuan an nge e kon en ko kuaxi kuitikaon xa Ncháina ixi bake e xa juaxruxin ti juako sen ngajin xa.

Ndo Pablo ko ndo Bernabé ste sen nunte Pisidia

¹³ Tjume e ndo Pablo ko sen chrikao ndo sajuixin sen tjajna Pafos. Kuixin in sen naa ntabarco sakjui sen ko kuiji sen tjajna Perge nunte Panfilia. Ko ndo Juan Marcos kuintu e ndo sen ko ikjan ndo tjajna Jerusalén.

¹⁴ Tjume e sajuixin ndo Pablo ko ndo Bernabé tjajna Perge ko kuiji sen tjajna Antioquía tjenka tjajna Pisidia. Ko nchakon tjoké e sen kuixin in sen ningue ni judío ko nti a bake e sen.

¹⁵ Ko juexin juinchekuanxin sen xroon jitaxin ley ko nge e tsikjin sen kuachronga chijnie ndo Dio ó sa ó, tjume e ni tetuan an ni ngo kuiye e na sen tjako ko ndachro na:

—Kichianna siá chondanta nge e xrochron-ganta ixi ícha tsake ena juaxruxin, ndachronta, jai tsin anna.

¹⁶ Ko tjume e ndo Pablo bingatjen ndo ko itja ndo juanchiixin ixi xrotenko sen. Ko ndachro ndo:

—Tin ennta ja anta sen israelita ko kaxon tin ennta ja anta ti tsikixinnta jée tjajna ko ja anta sen titikaonnta ndo Dio.

¹⁷ Ndo Dio titikaon sen tjajna Israel kuinche e ndo sen tachrí ina. Ko tjume e ndo Dio kuajon ndo juachaxin ixi konkueya sen ti xrabake e sen tjajna Egipto. Xranchi ngisen tsiki xin inaa tjajna jaña bake e sen nti a ko juachaxien ndo Dio bingijna sen kuachrxexin sen nunte Egipto.

¹⁸ Ndo Dio bingijna ndo sen yuu kán nano bake e sen ntajie nchese.

¹⁹ Ko tjume e juinchetjáña ndo yaato tjajna ti bake e nunte Canaán, ixi sen tsikachrjenixinna xrokuayé e sen nunte me e.

²⁰ Ko kain nano bake e sen nti a xranchi cuatrociento cincuenta nano. Ko tjume e ndo Dio baketuen en ndo sen ixi kaxin xi bancheña ijie ti kuijija ndo Samuel, naa ndo kuachronga chijnie ndo Dio.

²¹ Tjume e juanchia sen israelita naa ndo rey tsetuen en sen. Ko ndo Dio kuinche e ndo ndo Saúl, kuetuan an ndo yuu kán nano. Ko ndotée ndo Saúl, ndo Cis, ko kuachrjenixin ndo ndo Benjamín.

²² Tjume e ndo Dio kuantsje e ndo ndo Saúl ti ixra rey kuachóna ndo ko ndo David kuayé e ti xra rey me e. Ko ndachro ndo Dio: “Ó kuitja ndo David, chjen en ndo Isaí. Je e ndo naa ngisen chjana jíe juaxruxin ko titikaon ndo kain nge e tja on.”

²³ Ndo Jesús me e naa chujni kuachrjenixin ndo David ko ndo Dio xruan an ndo ixi je e ndo sinchemé e ndo jíee sen israelita xranchi tsindachro ndo.

²⁴ *Xrati a ndo Jesús, ndo Juan bajako ndo chijni jian ngajin ni israelita ko ndachro ndo ixi xrokjan na tsitikaon na ndo Dio, tjume e tsikitée na.

²⁵ *Ko ó xrokuiji nchakon xrokuen en ndo Juan, me e ndachro ndo: “Jan an je a ngisen xraxaon ja anta ixi tjume e tsii inaa ngisen ko jan an

chonda i juachaxin tsoxindanga tjuée katée ndo ixi je e ndo ícha tetuan an ndo ixi najan an.”

²⁶ 'Ja anta kichianna tsikachrjenixinnta ndo Abraham tin ennta, ko kainnta ni tsikí xín ikjín titikaonnta ndo Dio, tin ennta chijnie ndo ixi sinchemé e ndo ti ndako a juinche enta.

²⁷ Méxin, ni ste tjajna Jerusalén ko ni tetuan an nti a konoe a nā ngisen ndo Jesús ko kuienxin a nā nge e tsikjin sen kuachronga chijnie ndo Dio ó sa ó ti juinchekuanxin nā xroon ngaxin in ni ngo ngujngu nchakon tjoké e nā. Jaña je e nā, nchakon tangi juinchekao nā ndo Jesús, tsijinche e nā xranchi nichja xroon.

²⁸ *Ko maski kuitja i nā xrojan nge e ndako a juinche e ndo Jesús juanche e nā xi Pilato ixi tsetuan an xa tsen en ndo.

²⁹ *Ko nchakon juexin kon en kain ji i, tjume e sen kuitikaon ndo Jesús juinchenganjinxin sen cuerpo e ndo ntacru ko juabaa sen ndo.

³⁰ Ko ndo Dio juinchexechón ndo ndo Jesús íjngo.

³¹ *Ko itsjé nchakon bikon sen ndo Jesús, sen chrikao ndo nchakon kuixin sen nunte Galilea sakjui sen tjajna Jerusalén. Kō jai sen me e nichja sen xranchi juako ndo Jesús ko nchekuen en sen itsjé chujni.

³² 'Jai jan ana tjakona chijni jian, nge e tsikajon ndo Dio kuayé e sen tsikachrjenixinna ó sa ó.

³³ Jaña kon en, jan ana kuayá ana xranchi tsindachro ndo Dio tsayé e sen tsachrjenixin sen bake e sa ó. Tjume e ndo Dio juinchexechón

13:28 Mt. 27:22, 23; Mr. 15:13, 14; Lc. 23:21-23; Jn. 19:15. **13:29** Mt. 27:57-61; Mr. 15:42-47; Lc. 23:50-56; Jn. 19:38-42. **13:31** Hch. 1:3.

ndo ndo Jesús xranchi nichja xroon Salmo yuxin ko ndachro: “Ja anta chjan na, jan an tjá anta juachaxin tsarichonnta.”

³⁴ Ko tsindachro ndo Dio ixi sinchexechón ndo ndo Jesús ixi cuerpoe ndo xroenga i. Jaña chronga xroon chijnie ndo Dio, ndachro: “Jan an tsajon nge e jian ngajin ndo David.”

³⁵ Ko inaa Salmo ndachro ja in: “Ja anta tsintue anta xroenga cuerpoe ndo tsango tjúá.”

³⁶ Ko ndo David kuitikaon ndo xranchi tsiketuan an ndo Dio nchakon bake e ndo ko tjume e kuen en ndo ko tsixrabaa ndo, jaña kuaxrabaa ni tsikachrjenixinna ko renga cuerpoe ndo.

³⁷ Ko cuerpoe ndo juinchexechón ndo Dio renga i.

³⁸ Méxin, kichianna, xrokonda tsono anta xranchi tsumé e jíanta ixi ndo Jesús me e kuenxin ndo ixi ja anta.

³⁹ Tjume e kain sen titikaon ndo Jesús ó juinchetjúá ndo aséen sen ixi ley kuetuan an ndo Moisés chóna i juachaxin tsantsjen jíee sen.

⁴⁰ Tsje enta jian ixi tsuan inta xranchi tsikjin sen kuachronga chijnie ndo Dio ó sa ó:

⁴¹ Tsje e ja anta ti tjanonta ko titikaon anta.

Jai xronkanta ko satinganta ixi nge e tson en

ixi jan an ndo Dio tsjáko naa ixra ijié* jai

ko ja anta tsitikaon anta maski inaa ngisen xrontatjunta.

⁴² Tjume e ndo Pablo ko sen chrikao ndo kuachrjexin sen ni ngo, ko ni je a judío juanche e

* **13:41** *naa ixra ijié* milagro

na ndo ixi xrokjan sen nchakon íjngo tjoké e na ixi ícha xrojuinchekuen en ndo na.

⁴³ Nchakon juexin sajuixin sen ni ngo, tjume e kueya ni judío ko ni je a judío, ni baktikaon xranchi ni judío ko baxraxaon na ndo Dio, tsango bake e na juaxruxin ixi nge e juako ndo Pablo ko ndo Bernabé ko rué e na sen. Ko je e sen kuetuan an sen ixi ícha jian tsitikaon na ndo Dio ixi je e ndo tsango tjue e ndo na.

⁴⁴ Tjume e inaa semana nchakon tjoké e na, xra o kain ni jii tjajna nti a ixi tjaun na tsin en na chijnie ndo Dio.

⁴⁵ Ko bikon ni judío ixi kueya na tsixra o na, ko tsango kochjio na, tjume e kaxin na nichjangí e na ndo Pablo.

⁴⁶ Tjume e ndo Pablo ko ndo Bernabé soji nichja sen ko ndachro sen:

—Xrokonda sa ó ja anta ni judíonta xrokuin ennta chijnie ndo Dio. Ko ja anta tjaun anta tsin ennta nge e jian tsajon juachaxin tsechón chujni kain nchakon. Ko jai tsintu ananta ja anta ni judíonta ko satsjina sintakuan anna ni je a judío.

⁴⁷ Jaña tsiketuan an Ncháina:
Jan an bakéenta ja anta xranchi xro i tsingasáñaxin
kain tjajna
ixi tsiku unta chijni tajon juachaxin tsechón chu-
jni nguixin nunte.

⁴⁸ Tjume e kuin en ni je a judío ji in ko bake e na juaxruxin ko ndachro na ixi jian chijnie Ncháina Jesús.

Tjume e kuaxi kuitikaon kain ni tikinixin en xrochóna juachaxin tsechón kain nchakon.

⁴⁹ Ko jaña xrangíxin juinçekuen en sen na chijnie Ncháina nchiji tjanya nti a.

⁵⁰ Ko tjume e ni judío nichje e na kaxin nchri nche e jian ko ngajin xi tetuan an tjanya nti a ixi ndachro na ndako a nche e ndo Pablo ko Bernabé ixi tsango toña e na sen ko bengixin na sen nti a.

⁵¹ *Ko je e sen kontsjenga sen katée sen, jaña juakoxin sen ixi je e na ndako a xraxaon na ixi je e sen. Tjume e sakjui sen tjanya Iconio.

⁵² Ko sen titikaon Ncháina Jesús tsango bake e sen juaxruxin ko ícha chóna sen juachaxien Espíritue ndo Dio.

14

Ndo Pablo ko ndo Bernabé ste sen tjanya Iconio

¹ Tjume e kuiji ndo Pablo ko ndo Bernabé tjanya Iconio ko kuixin in sen ningue sen judío ko nti a juinçekuen en sen chujni. Ko itsjé sen judío ko sen je a judío kuitikaon sen.

² Tjume e kaxin ni judío, ni kuitikaon a, kuaxi na kuajon na chijni ngajin ikaxin ni je a judío ixi xronichjangí e na ndo Pablo ko ndo Bernabé.

³ Ko je e sen itsjé nchakon kuitu e sen nti a ko ícha chuntia sen Ncháina Jesús ko xronka i sen nichja sen chijnie ndo. Ko juachaxien ndo Jesús ícha bakingijna sen ixi nge e kuanichja sen xranchi ndo Dio tjue e ndo chujni, ko kuajon ndo juachaxin sinchexrjuen en sen chujni ko tsjako sen ijié ixra.

⁴ Ko chujni tjajna nti a je a xraje o xraxaon na. Kaxin na kuitikaon na ni judío ko ikaxin na kuitikaon na sen kuinche e Ncháina Jesús.

⁵ Ko tjume e ni judío ko ni je a judío xraxaon na naakua naa nge e, kao xi tetuan an, ixi tjaun na sinchexronka na sen kuinche e ndo Jesús ko xrokuaxin na sen ixro.

⁶ Ko ndo Pablo ko ndo Bernabé kono e sen nge e xraxaon na, me e sakjui sen tjajna Lистра ko tjajna Derbe nunte Licaonia ko nguixin no nti a

⁷ ko juako sen chijni jian ne e Ncháina Jesús.

Ni tjajna Lистра tjanke e na ndo Pablo ixro

⁸ Ko tjajna Lистра jii naa xi xratsijongléxióon xa jua i itji xa.

⁹ Xi me e jii xa nunte ko jitin en xa nge e juako ndo Pablo. Tjume e ndo Pablo jian jitsje e ndo xa ko kono e ndo ixi je e xa chuntia xa Ncháina ko chao xrokoxruen en xa.

¹⁰ Ko je e ndo Pablo séen ndache ndo xa:

—Tingatjen, ndako take é tutáa.

Ko tuinxin bingatjen xa ko chrinka xa, bake exin xa tutée xa ko chao kuaxi kuaji xa.

¹¹ Tjume e kain ni tjajna nti a bikon na nge e juinche e ndo Pablo, ko kuaxi na kuyako na ixi ngigue e ni Licaonia ko ndachro na:

—Ndo Dio tsikjan chujni tsiki xin ngajní, steku una nti i.

¹² Ko je e na juinchekin in na ndo Bernabé dio Júpiter ko ndo Pablo dio Mercurio ixi ícha juako ndo chijni.

¹³ Ko xitaana ne e dio Júpiter chónnda ni ngo ngande e tjajna ko bika o xa kuxinta ko itsjo, ko

je e xa ko kain ni rué e xa tjaun na xrokuajon na juasaya ngajin ndo Pablo ko ndo Bernabé ko tjaun na xrokóñe e na sen kuxinta.

¹⁴ Ko ndo Pablo ko ndo Bernabé kono e sen nge e tjaun na sinche e na, me e kuinchje sen mantée sen ko juike e sen ngakjen en chujni ste nti a ko kuyako sen ndachro sen:

¹⁵ —¿Sonda nche enta jii? Jan anna chujnina xranchi ja anta. Jan anna jui ina ixi sintakuan annta chijnie ndo Dio ko tintu enta kain nge e xro an tjintee ko ikjannta tsitikaonnta ndo Dio, ndo jichón. Je e ndo juinchéña ndo ngajni ko nunte xasintajni* ko ndachaon ko kain nge e jii ngataon nche.

¹⁶ Sa ó ndo Dio kuintu e ndo chujni ixi sinche e na xranchi tjaun na.

¹⁷ Ko ndo Dio juako ndo ixi je e ndo tetuan an ndo ixi juinchéña ndo kain nge e jii. Je e ndo tetuan an ndo ixi tsij ichrin, me e tenga na ko jian toñe e na, ko kain nchakon je e ndo tajon ndo nge e sine na, ko je e ndo tajon ndo juachaxin juaxruxin ste na.

¹⁸ Maski jaña ichro ndo Pablo ko ndo Bernabé, je e na titikaon a na ixi tjaun na tsajon na juasaya ngajin sen ko xrokóñe e na sen kuxinta.

¹⁹ Tjume e kujj kaxin ni judío kuixin tjajna Antioquia ko tjajna Iconio. Nichje e na ni ste nti a ixi tsintu e na ti nge e tjako ndo Pablo ko ndo Bernabé, méxin kuaxi na ixro ndo Pablo. Ko xraxaon na kuen en ndo, me e bingakjin na ndo ngande e tjajna.

* **14:15 xasintajni** mundo

²⁰ Ko tjume e sen titikaon Ncháina Jesús xra o sen ngandajin ndo Pablo ko je e ndo bingatjen ndo ko ikjan ndo tjajna nti a íjngo. Ko ndúyaxin sabikao ndo Pablo ndo Bernabé tjajna Derbe.

²¹ Ko ó juexin chronga sen chijni jian ko juacha sen kueya nā kuitikaon nā Ncháina Jesús, tjume e ikjan sen tjajna Listra ko tjajna Iconio ko tjajna Antioquía.

²² Kain tjajna kuatsinga sen nichje e sen sen kuitikaon Ndo Jesús ko kuetuan an sen ixí soji xrochuntia sen Ncháina ko ndachro sen ixí siá tsixin inni ti tetuan an ndo Dio, xrokonda tangi tson enni.

²³ Ko ngujngu ni ngo kuinche e sen ngisen tsetuen en sen ti sen titikaon ndo Jesús ko nichje e sen ndo Dio ko juinche katse ñao sen jinta ko tjume e ndache sen Ncháina ixí tsayakon en ndo sen kuitikaon je e ndo.

Ndo Pablo ko ndo Bernabé ikjan sen Antioquía

²⁴ Tjume e kuatsinga sen nunte Pisidia ko kuiji sen nunte Panfilia.

²⁵ Ko tjajna Perge juako sen chijnie Ncháina ko tjume e sakjui sen tjajna Atalia.

²⁶ Nti a kuixin in sen ntabarco ko sakjui sen tjajna Antioquía, tjajna me e tsinichje e sen ndo Dio ko tsijanchia sen ixí ndo Dio xrobingijna ndo sen ti ixra juinche e sen.

²⁷ Ko nchakon kuiji sen tjajna Antioquía xra o kain sen titikaon ndo Jesús ko kuaxi chronga ndo Pablo xranchi bingijna ndo Dio ngajin sen ko xranchi kuajon ndo Dio juachaxin sinchekuen en sen ni je a judío ixí kaxon xrochuntia nā Ncháina Jesús.

²⁸ Ko ndo Pablo ko ndo Bernabé kuitu e sen ngajin sen titikaon Ncháina Jesús itsjé nchakon.

15

Xra o sen kuitekaon ndo Jesús tjajna Jerusalén

¹ Kaxin sen tsiki x̄in nunte Judea kuiji sen tjajna Antioquía. Kuaxi sen juinchekuen en sen sen kichuuna nti a ixi jua i tsoomé e jíee sen siá chóna i sen chji e sen ti tsiketuan an ndo Moisés.

² Tjume e ndo Pablo ko ndo Bernabé ko je e sen judío kuaxi juakaxin kichuu sen. Méxin, juao sen ixi ndo Pablo ko ndo Bernabé ko ikaxin sen xrokuji sen tjajna Jerusalén. Nti a tsjao sen apóstol ko sen tetuan an ni ngo ixi á xrokonda xrochóna na chji e ti tsiketuan an ndo Moisés.

³ Jaña sen titikaon Ncháina tjajna Antioquía xruan an sen kichuu sen, ko tjume e kuatsinga sen nunte Fenicia ko nunte Samaria ko nti a chronga sen xranchi itsjé sen je a judío kuayé e sen chijnie ndo Dio. Ko kain sen kichuuna kuin en me e, tsango juaxruxin bake e sen.

⁴ Tjume e kuiji ndo Pablo ko ndo Bernabé tjajna Jerusalén ko sen titikaon Ncháina ko sen apóstol ko sen tetuan an ne e ni ngo kuajon sen juachaxin tsintee sen nti a. Ko chronga sen xranchi ndo Dio tsango bingijna ndo sen.

⁵ Tjume e ikaxin ni fariseo tsikitikaon Ncháina Jesús bingajen na ko ndachro na:

—Ni je a judío titikaon na Ncháina xrokonda tsaa na chji e ni judío, ko xrokonda tsitikaon na nchiji ley tsiketuan an ndo Moisés.

⁶ Ko tjume e kain sen apóstol ko sen tetuan an ni ngo xra o sen ko xraxaon sen xranchi tson en ixi jaña ichro ikaxin sen judío.

⁷*Sée juakaxin kichuu sen ko tjume e bingatjen ndo Pedro ndachro ndo:

—Ja anta kichuuna, ó no anta ixi seno ndo Dio kuinchena ndo jan an ixi tsjako ngajin kain ni je a judío ixi tsin en nã chijni jian ne e ndo Cristo ko kaxon je e nã tsitikaon nã.

⁸*Ndo Dio chúxin ndo aséen chujni, juako ndo ixi kuayé e ndo ni je a judío, me e kuajon ndo Espíritue ndo kuayé e nã xranchi jaina.

⁹ Ndo Dio tikon ndo kain chujni naxraje o xranchi jaina. Ko juinchetjúá ndo aséen sen ixi ó chuntia sen Ncháina Jesús.

¹⁰ Méxin, ¿sonda titikaon anta nge e juinche e ndo Dio ko tetuen ennta nã tsitikaon nã kain ley tangi? Ko jaina ko sen tsikachrjenixinna jua i kuitikaon sen kain ji i.

¹¹ Ó nojna ixi juasie Ncháina Jesús koméexin jéina ko kaxon jaña komé e jíee sen je a judío, sen kuitikaon.

¹² Ko kain sen tsixra o tenko sen ko tjume e kuin en sen xranchi ndachro ndo Bernabé ko ndo Pablo ixi ndo Dio bingijna ndo sen juinche e sen itsjé ixra ijié, jaña bikon kaxon ni je a judío.

¹³ Juexin nichja ndo Pablo ko ndo Bernabé, tjume e kuaxi nichja ndo Jacobo ko ndachro ndo: —Kichuuna, jian tin ennta nge e xrondachrjan.

¹⁴ Ndo Simón Pedro chronga ndo xranchi juako ndo Dio ixi tjue e ndo ni je a judío ko xranchi kuinche e ndo ikaxin nã ixi tsitikaon nã ndo.

15 Jaña nduaxin chronga xroon tsikjin sen kuachronga chijnie ndo Dio ó sa ó:

16 Jan an xrokjanna ixi sintakonchjian íjngo ni ngo tsichjejin ne e ndo David ko jan an tsingijna ixi tsetuan an naa sen ndo a ndo David.

17 Ixi kain nã tsjéena nã ko kaxon kain ni jée tjajna kuiya a nã ixi tsitikaon nã jan an.

18 Jan an ndo Dio, ndo ndachro sa ó tson en ji i.

19 'Méxin, ndachrjan jan an ixi ni je a judío xrokonda i tsitikaon nã nchijí ley ixi je e nã ó kuintu e nã nge e kuitikaon nã sa ó.

20 Méxin, xroxruen enna nã naa xroon ixi sincheno ena sine a nã ntao ti tikinixin en ídolo ko xrochóna i nã inaa nchri je a nchrinchri e nã ko sine a nã ntau e iko tsikintji a jnié ko sine a nã jnié ba.

21 Méxin, ngujngu tjajna jii ngisen chronga ley tsiketuan an ndo Moisés ngaxin in ni ngo ngujngu nchakon tjoké e nã.

22 Tjume e kain sen kuinche e Ncháina Jesús ko sen tetuan an ni ngo ko kaxin sen titikaon Ncháina juao sen ixi kaxin sen satsji sen tjajna Antioquía. Ko sen itsji me e ndo Judas, ndo nchekin in sen Barsabás, ko ndo Silas, kayui sen jian titikaon sen, satsikao sen ndo Pablo ko ndo Bernabé.

23 Ko ja in ndachro xroon tsikao sen:

“Jan anna, ni kuinche e Ncháina Jesús ko ni tetuan an ni ngo nti i nichja ananta ja anta kichuuna ni je a judío, ti stenta tjajna Antioquía ko nunte Siria ko nunte Cilicia, taye énta juajna.

24 Ó nóna ixi ikaxin sen kichuuna tsikí xín tjananana maski kuachóna i sen juachaxin, kuiji sen juntaxronkanta sen ixi xrokonda tsaanta chji e ni judío ti tsiketuan an ndo Moisés.

25 Tjume e juaona ixi kaxin sen ste nti i tsitsja anta sen, je e sen ko ndo Bernabé ko ndo Pablo, sen tsango tjua ana.

26 Je e sen tsango tangi juinchekaon na sen ixi ti titikaon sen Ncháina Jesucristo.

27 Méxin, xroxruan annanta ndo Judas ko ndo Silas ixi kaxon xronichja anta sen ko xrochronga sen kain ji i.

28 Ixi Espíritue Dio jian bingijnana ko ja in juaona ixi tsitikaon anta nge e tsango tangi. Ko nti i jitaxin nge e xrokonda tsitikaonnta:

29 Nte anta iko tikinixin en ngajin ídolo ko kaxon sinte anta jnié ba ko nte anta ntau e iko tsikin-tji a jnié ko kaxon xrochonda inta inaa nchri je a nchri anta. Titikaonnta kain ji in ko jaña chao tsintenta.”

30 Ko tjume e je e sen sakjui sen tjajna Antioquía. Ko nchakon kuiji sen nti a xra o sen titikaon ndo Jesús ko je e sen kuajon sen xroon me e.

31 Ko nchakon juinchekuanxin sen kichuuna xroon me e, tsango juaxruxin bake e sen ixi nge e chronga xroon.

32 Tjume e ndo Judas ko ndo Silas kaxon chronga sen chijnie ndo Dio, ko nichja sen jian ko juaxruxin bake e sen kichuuna.

33 Ko nti a kuintee sen kaxin nchakon, ko nchakon ó satsji sen, kain sen titikaon Ncháina Jesús jian nichje e kichuu sen ko ikjan sen ti no tsikí xín sen tjajna Jerusalén ti ste sen kichuu sen.

³⁴ Ko ndo Silas xraxaon ndo ixí nti ao xrokuitu e ndo.

³⁵ Ko kaxon ndo Pablo ko ndo Bernabé kuitu e sen tjajna Antioquía. Je e sen ko ikaxin sen juako sen ko chronga sen chijnie Ncháina Jesús.

Ndo Pablo sakjui ndo yuxin viaje

³⁶ Tjume e ndo Pablo nichje e ndo ndo Bernabé ko ndachro ndo:

—Ichjina titsje ena sen kichuuna ti kain tjajna juakona chijnie ndo Dio ó sa ó ixí tsonojna xranchi ste sen nti a.

³⁷ Ko ndo Bernabé kaxon tjaun ndo xrobikao sen ndo Juan, ndo kaxon nchekin in sen Marcos.

³⁸ *Ko ndo Pablo juinche a ndo juaxruxin ixí xrobikao sen ndo Juan Marcos ixí je e ndo juinche a ndo ixra, ixra juinche e sen nunte Panfilia.

³⁹ Méxin, je a naxraje o xraxaon sen, méxin chjeya sen. Ndo Bernabé sabikao ndo ndo Juan Marcos ko kuixin in sen inaa ntábarco sakjui sen nunte Chipre.

⁴⁰ Ko ndo Pablo kuinche e ndo ndo Silas satsikao ndo, ko sen kichuu sen nti a juanche e sen ndo Dio ixí jian tsingijna ndo sen ko jaña sakjui sen.

⁴¹ Tjume e kuatsinga sen nunte Siria ko nunte Cilicia ko jian nichje e sen sen titikaon Ncháina ni ngo nti a.

16

Ndo Timoteo sabikao ndo ndo Pablo ko ndo Silas

¹ Tjume e kuiji ndo Pablo tjajna Derbe ko tjajna Lистра. Nti a bake e inaa ndo titikaon ndo Jesús

ndatin in ndo Timoteo. Janée ndo naa nchri tjajna judío titikaon nchra Ncháina Jesús ko ndotée ndo naa xi tjajna griego.

² Sen kichuuna jii tjajna Listra ko tjajna Iconio nichja sen jian ixí ndo Timoteo.

³ Méxin, ndo Pablo tjaun ndo xrobikao ndo ndo Timoteo. Sa ó kuetuan an ndo ixí ndo Timoteo xrokua ndo chji e ni tjajna judío ixí xroningakuen a nã ndo kain ni judío ti tjajna xrokjui sen ixí no e nã ndotée ndo Timoteo naa xi griego.

⁴ Tjume e kuatsinga sen kain tjajna ko chronga sen nge e tsiketuan an sen apóstol ko sen tetuan an ni ngo tjajna Jerusalén.

⁵ Sen chuntia Ncháina ícha konsoji sen ko ngu-jngu nchakon ícha konkueya sen.

Juachaxien espíritue ndo Dio bikon ndo Pablo naa ngisen nunte Macedonia

⁶ Tjume e Espíritue ndo Dio kuajon a juachaxin tsjako sen chijnie ndo Dio nunte Asia, me e kuatsinga sen nunte Frigia ko nunte Galacia.

⁷ Ko nchakon kuiji sen nunte Misia xraxaon sen xrokjui sen nunte Bitinia. Ko Espíritue ndo Jesús kuajon a juachaxin satsji sen nti a.

⁸ Méxin, xrakuatsingako sen nunte Misia ko kuiji sen tjajna Troas ngande e ndachaon.

⁹ Ko naa tiie ixí juachaxien espíritue ndo Dio bikon ndo Pablo naa xi nunte Macedonia, siin xa jitinóatée xa ko ndachro xa: “Tatsinga nunte Macedonia ko tingijnana.”

¹⁰ Jaña tsikikon ndo Pablo, méxin tuinxin konchjianna ixí satsjina nunte Macedonia ixí jian

nónana ixi ndo Dio kuetuan an ndo nti a tsjakona chijni jian xranchi tsoomé e jíee nã. [Jan an ndo Lucas ikjin xroon ji i sabiki an sen kaxon.]

Ndo Pablo ko ndo Silas bake e sen tjajna Filipos

¹¹ Tjume e nti a tjajna Troas kuixi inna inaa ntãbarco ko xrajuikona naa nunte nchíin ngataon inda ndatin in Samotracia. Ko ndúyaxin juasona tjajna Neápolis.

¹² Nti a sajuixinna ko juasona tjajna Filipos. Tjajna me e tetuan an ni romano, ko tjajna me e naa tjajna ícha tjintee ixi ikaxin tjajna nunte Macedonia. Nti a kuinteena kaxin nchakon.

¹³ Ko nchakon tjoké e ni israelita kuachrjexinna tjajna Filipos ko sakjuina ngande e ndarío ko nti a nanaunka xra o nã nichje e nã ndo Dio. Me e nti a kuinteena nunte ko kuaxina juntakuan anna kaxin nchri ste nti a.

¹⁴ Ko nti a jii naa nchri ndatin in Lidia tsikí xín tjajna Tiatira. Je e nchra nchekji nchra manta chaxro játse tiie. Ko je e nchra xraxaon nchra ndo Dio ko jitin en nchra nge e tjako ndo Pablo ko Ncháina bingijna nchra ixi tsiexin nchra jian chijnie ndo Dio.

¹⁵ Je e nchra ko kain ni ndo a nchra bikitée nã. Tjume e kuinóatée nchra ngajin ndo Pablo ko ndachro nchra:

—Síá titikaonnta ixi nduaxin titika onna Ncháina, tituan anta nía nti i.

Ko kuitunãna nti a.

¹⁶ Tjume e inaa nchakon sakjuina ti no nichje e sen ndo Dio ko kuetanna naa nchrichajan chónnda nchrichan espíritue Xixron anxrée tonuexin nchrichan kaxin nge e ko jii naa ngisen tetuen en

nchrichan ko kueya tomi tjacha ni me e ixi ti chronga nchrichan.

¹⁷ Ko nchrichajan me e kuaxi nchrichan rué e nchrichan ndo Pablo ko jan anna ko tjume e séen nichja nchrichan:

—Sen ji i nche e sen xrée ndo Dio jii ngajni ko tjako sen cha o tsechónxin chujni.

¹⁸ Jaña juinche e nchrichan itsjé nchakon. Tjume e tsango koñao ndo Pablo ko ngatjia ndo nichje e ndo espíritue Xixron anxrée chónnda nchrichan, ko ndachro ndo:

—Juachaxien nombrée ndo Jesucristo tetuan an ixi tsachrjexian nchrichan ji i.

Tjume e tuinxin kuachrjexin nchrichan espíritue Xixron anxrée.

¹⁹ Ko tjume e ni tetuan an nchrichan bikon na nge e kon en nchrichan ko kono e na ixi ítsjacha i na ícha tomi ixi ixra kuanche e nchrichan. Méxin koñao na ko itsé na ndo Pablo ko ndo Silas ko bingakjina sen ti ste ni tetuan an ntaasien tjajna.

²⁰ Ko tjume e bikona na nti a ti jii xi nchéña ijie ko ndachro na:

—Ni ji i ni judío tsango nchexronka na ni tjaj-naina

²¹ ko tjako na nge e jua i tsitikaonna ko jua i sintu una ixi jan anna ni romanona.

²² Ko kain ni nti a koñao e na sen. Tjume e xi nchéña ijie kuetuan an xa tsantsje e na sen manta steyá sen ko tsóña na sen ixi ntasé.

²³ Ko tsango kóña na sen, tjume e xraxin in na sen ndo achjiso ko kuetuan an na ngajin xi jindaa ndo achjiso ixi xrotsje e xa satsinga i sen.

²⁴ Ko kuitekaon xa ko xraxin in xa sen ti ícha yaso e ndo achjiso ixi tsachrje a sen. Ko kuintexin xa tutée sen ixi naa ntaa chóna tuye ixi satsji a sen.

²⁵ Tjume e ngusine tiie ndo Pablo ko ndo Silas nichje e sen ndo Dio ko itsje sen ngajin ndo Dio. Ko ikaxin ni jii ndo achjiso kuin en na ixi jaña jitsje sen.

²⁶ Tuinxin kontengí nunte me e kontsjenga nchijí tjatuée ndo achjiso ko kain ntachja xitje e ko kuitsinga chika cadena ti stetséxin kain ni ste nti a.

²⁷ Tjume e xi jindaa ndo achjiso kuaya xa ko bikon xa ixi tsixitje e ntachja, méxin kuantsje xa naa chika espada, ko xroxrantu u xa chika me e ntakuin xa ixi ndaxrokuen en xa ixi xraxaon xa sabinga kain ni jii ngaxin in ndo achjiso.

²⁸ Ko ndo Pablo séen kuyako ndo ndachro ndo:

—Na i, xruan an nge e nchekua asáan ixi kainna stena nti i.

²⁹ Tjume e xi jindaa ndo achjiso juanchia xa naa xro i ko nteeto kuixin in xa ko jixranga xa ixi xronka xa ko bake exin ntatuchi in xa tutée ndo Pablo ko ndo Silas.

³⁰ Ko tuinxin kuantsjexin xa sen nti a ko juanchangí e xa sen:

—¿Nge e sinta a ixi tsechón aséenna kain nchakon?

³¹ Ko je e sen ndachro sen:

—Titikáoan Nchánana Jesucristo ko jaña tsomé e jiá ko jíe ni ndúya.

³² Tjume e juinchekuen en sen xa ko kao kain ni ste ndo a xa chijnie Ncháina Jesucristo.

³³ Ko maski naxixe e, hora me e sabikao xa sen ko juné ma xa kain ti no juincheni e na sen. Ko tuinxin je e xa ko kain ni ste ndo a xa bikitée na.

³⁴ Ko tjume e je e xa sabikao xa sen ndo a xa íjngo; nti a kuajon xa nge e juine sen. Je e xa ko kain ni ndo a xa bake e na juaxruxin ixi kuitikaon na ndo Dio.

³⁵ Tjume e ndúyaxin xi nchéña ijie kuetuen en xa xi policia tsitsje e xa xi jindaa ndo achjiso ixi tsantsje xa ndo Pablo ko ndo Silas.

³⁶ Tjume e xi jindaa ndo achjiso ndache xa ndo Pablo nge e ndachro xipolicia:

—Xi nchéña ijie kuetuan an xa ixi tsachrjenta. Juaxruxin satsjinta.

³⁷ Tjume e ndo Pablo ndache ndo xi policia:

—Jan anna ni romanona, juaya na ngajinna ko bikon kueya chujni ko ndachro a xa nge e ijie junta ana. Ko jaña xraxin inna xa ndo achjiso ko jai, ¿á imao tsajandana xa? Na i. Tsii je e xa ko je e xa tsantsjena xa.

³⁸ Tjume e xipolicia sakjui xa ko ndache xa xi nchéña ijie nge e ndachro sen ste ngaxin in ndo achjiso. Ko tsango xronka xi nchéña ijie ixi kuin en xa ixi je e sen romano sen.

³⁹ Tjume e ikjui xi nchéña ijie ko kuinóatée xa ngajin ndo Pablo ko ndo Silas ixi tsoñao a sen ixi nge e kon en sen, ko tjume e kuachrjexin sen nti a ko juanchia xa ixi satsjixin sen tjajna nti a.

⁴⁰ Tjume e ndo Pablo ko ndo Silas, hora kuachrjexin sen ndo achjiso, kuiji sen ndo a jan Lidia. Ko nti a bikon sen sen kichuu sen ko juinchechaxin kichuu sen ko sajuixin sen nti a.

17

Kuintee ni tjajna Tesalónica

¹ Tjume e ndo Pablo ko ndo Silas kuatsinga sen tjajna Anfípolis ko tjajna Apolonia ko sakjui sen tjajna Tesalónica. Nti a jii naa ni ngo judío.

² Ko tjume e ndo Pablo sakjui ndo ni ngo ixi jaña xrakuen en ndo ko ní semana ngujngu nchakon tjoké e ni judío juako ndo xranchi ndachro xroon chijnie ndo Dio.

³ Juako ndo ixi ndo Cristo xrokonda xrokuen en ndo ko tjume e xroxechón ndo íjngo. Jaña ndachro ndo:

—Ndo Jesús, ndo ntatjunta, me e ndo Cristo.

⁴ Tjume e kaxin ni judío kuitikaon na ko rué e na ndo Pablo ko ndo Silas. Ko kaxon kuitikaon itsjé ni griego, ni ó chóxin ndo Dio, ko kaxon kaxin nchri ícha chúxin na tjajna nti a, kuitikaon nchra.

⁵ Ko ikaxin ni judío kuitikaon a na nge e nichja ndo Pablo ko tsango kochjio na me e juée na kaxin xi ña i, xi nai a nche e xra ko juincheKateya na ni tjajna. Tjume e kuixin in na ndo a naa xi ndatin in Jasón ixi chrijitjée na ndo Pablo ko ndo Silas ko tjaun na tsikaan na sen ti jii ni tetuan an.

⁶ Ko kuitja i na sen me e itsé na xi Jasón ko ikaxin sen titikaon Ncháina ko bingakjin na sen sabikao na sen ti jii xi tetuan an tjajna nti a. Ko kuintee na ko kuyako na ko ndachro na:

—Ni ji i juincheye e na chujni nchijíi nunte ko jai ó kuii na tjajnaína nti i.

⁷ Xi Jasón kuajon xa juachaxin ixi kuitu e na ndo a xa. Kain ni ji in titikaon a na ley tetuan an

xi romano ko ndachro n̄a ixi jii inaa ngisen ícha tetuan an ndatin in Jesús.

⁸ Hora kuin en n̄a ji in kain ni tsixra o ko xi tetuan an tsango koñao n̄a.

⁹ Ko xi Jasón ko sen titikaon Ncháina juenga sen n̄a méxin xi tetuan an kuintu e xa sakjui sen.

Ndo Pablo ko ndo Silas sakjui sen tjajna Berea

¹⁰ Ko tuinxin tiie me e sen kichuuna xruan an sen ndo Pablo ko ndo Silas satsji sen tjajna Berea. Ko nchakon kuiji sen nti a kuixin in sen ningue ni judío.

¹¹ Ko ni judío nti a ícha jian nche e n̄a ixi ni tjajna Tesalónica. Ko ícha juinche e n̄a juaxruxin kuin en n̄a chijnie ndo Dio ko ngujngu nchakon nchekuanxin n̄a xroon chijnie ndo Dio ixi tsono e n̄a á nduaxin ti juako e n̄a sen.

¹² Méxin, itsjé ni nti a kuitikaon n̄a, ko ikaxin nchri griega ícha chúxin n̄a kuitikaon nchra ko kaxon ni xi.

¹³ Ko ni judío tjajna Tesalónica kono e n̄a ixi ndo Pablo juako ndo chijnie ndo Dio tjajna Berea ko sakjui n̄a nti a ko juinche Kateya n̄a ni nti a.

¹⁴ Méxin sen kichuuna titikaon Ncháina xruan an sen ndo Pablo satsji ndo no ngande e ndachaon. Ko ndo Silas ko ndo Timoteo xrakuitu e sen tjajna Berea.

¹⁵ Tjume e kaxin sen nti a sabikao sen ndo Pablo tjajna Atenas. Ko ikjan sen tjajnée sen ixi kuetuan an ndo Pablo xrochronga sen ngajin ndo Silas ko ndo Timoteo ixi jaiko satsji sen ti jii ndo ixi nti a tsetan sen ndo Pablo.

Ndo Pablo jii ndo tjajna Atenas

¹⁶ Xrajichon en ndo Pablo ixi tsiji ndo Silas ko ndo Timoteo tjajna Atenas, tsango koni e aséen ndo ixi bikon ndo nti a jii kueya ídolo ko chujni tajon juasaya ngajin ídolo me e.

¹⁷ Ko ni ngo judío nti a juako ndo ngajin kaxin ni judío ko ikaxin nā chúxin nā ndo Dio, ko kain nchakon bake e ndo ti ntaasin, juako e ndo ni jii nti a.

¹⁸ Ko kaxin chujni tikinixin en chujni ndatin in epicúreos ko ikaxin ni tikinixin chujni ndatin in estoicos kuaxi nā juao nā ndo Pablo. Kaxin nā ndachro nā:

—¿Nge e xrondachro ti nichja xi ji i?

Ko kaxin nā ndachro nā:

—Jinichja xa ixi inaa dio.

Jaña ichro nā ixi juako ndo Pablo chijni jian kondee ndo Jesús ko ndachro ndo ixi ndo Jesús maski kuen en ndo, xechón ndo íjngo.

¹⁹ Tjume e sabikao nā ndo Pablo naa ijnā ndatin in Areópago. Nti a nichje e nā ndo ko ndachro nā:

—Tja onna xrondachijiana nge e natjúá tjakoa ja a.

²⁰ Itsjé nge e jée tjakoa, ko tja onna tsonónana nge e xrondachro me e.

²¹ Ko kain ni tjajna Atenas ko ni tsiki x̄in jée tjajna ste nti a, je o baki en nā ko bakeki nā nge e natjúá kuin en nā.

²² Tjume e ndo Pablo bake exin tutée ndo ti ste nā nti a ti Ijnā Areópago ko ndachro ndo:

—Ja anta ni tjajna Atenas tin ennta. Jan an tikon ixi ja anta titikaonnta itsjé dio tsikoña tjatu o.

²³ Ko hora kuatsinga nti a jan an bikon ti no tájonxinnta juasaya ngajin ídoloanta ko bikon naa altar ja in tsikjinnta: “Nti i xraxaonxinna naa Dio chuxin ani.” Méxin, ti Dio xraxaonnta maski xrachuxin anta, me e ndo Dio tjako jan an.

²⁴ *’Ndo Dio me e juinchéña ndo nunte xasintajni ko kain nge e jii ngata a nunte. Je e ndo me e Nchée ngajní ko nunte nti i. Ndo Dio ji a ndo ngaxin in naa ni ngo tsikonchjianxin itja chujni.

²⁵ Ko xrokonde a ndo ixi xrojan chujni xrobingijna ndo ixi je e ndo tajon ndo juachaxin tsechón kain chujni ko tajon ndo chrinto ko kain nge e jii ngata a nunte.

²⁶ Naakua ngisen kuantsjenixin ndo kain tjajna ixi tsake e na nguixin ngata a nunte. Ko kaxon ndachro ndo Dio tinó ko ngisa tsake e na.

²⁷ Jainna xrokonda tsjéena ndo Dio ixi indao tsienxinna xranchi tsitjana ndo. Ko nduaxin je e ndo kjín a jii ndo.

²⁸ Ixi je e ndo stechónxinna ko tontengina ko tayakuina ndo. Ko tsindachro naa xi tjajnánta sa ó: “Jaina kuachrjenixinna ndo Dio.”

²⁹ Nduaxin jaina kuachrjenixinna ndo Dio, méxin jua i xroxraonna ixi ndo Dio, je e ndo naa chika oro o naa chika plata o naa ixro xranchi xraxaon ni nchéña ídolo.

³⁰ Sa ó ndo Dio tjáñe e ndo ti kuanche e chujni ixi no e ndo xrakuachuxin a na ndo. Ko jai tituan an Dio ngajin kain chujni jii ngata a nunte xrokonda tsitikaon na ndo.

³¹ Ndo Dio kuinche e ndo naa nchakon sinchéña ndo ije ngajin chujni jii ngata a nunte ko

kuinche e ndo naa ndo juakoxin kain juachaxin, ndo me e maski kuen en ndo, xechón ndo íjngo.

³² Ko nchakon kuin en nã ixi xroxechón chujni tsiken en, kaxin nã juanoa nã ndo Pablo. Ko ikaxin nã ndachro nã:

—Íjngo nchakon tsin anna nge e ndachrua.

³³ Tjume e ndo Pablo sakjui ndo.

³⁴ Ko ikaxin nã rué e nã ndo ko kuitikaon nã Ncháina. Ko naa xi kuitikaon ndatin in Dionisio, me e naa xi kuanchéña ijie ngajin chujni ngata a ijnã Areópago, ko naa nchri kuitikaon nchra ndatin in nchra Dámaris ko ikaxin nã kaxon kuaxi nã kuitikaon nã Ncháina.

18

Sakjui ndo Pablo tjajna Corinto

¹ Tjume e ndo Pablo sajuixin ndo tjajna Atenas ko ikjui ndo tjajna Corinto.

² Nti a kuetan ndo naa xi judío ndatin in Aquila. Je e xa xi tjajna nunte Ponto ko sé a nchakon je e xa ko janchri e xa tsikixin sen tjajna Italia ixi xi tetuan an nti a, xi Claudio, kuetuan an xa ixi kain ni judío tsachrjexin nã tjajna Roma. Tjume e ndo Pablo ikjui ndo kuitsje e ndo sen me e.

³ Ko xraje o ixrã kuanche e sen, ti kuanchéña sen nchia manta. Méxin, nti ao kuitu e ndo Pablo ixi xrojuinche e sen xrã.

⁴ Ko kain nchakon tjoké e ni judío, ndo Pablo bakji ndo ni ngo nichje e ndo ni judío ko ni je a judío ixi tjaun ndo kain nã tsitikaon nã Ncháina.

⁵ Ko nchakon ndo Silas ko ndo Timoteo kuixin sen nunte Macedonia, tjume e ndo Pablo í kuanche a ndo xrã, je o bajako ndo chijnie ndo

Dio ixi tsono e ni judío ixi ndo Jesús me e ndo Cristo.

⁶ Ko je e ni judío kuaxi n̄a ningakon en n̄a ndo Pablo ko tsango nichjangí e n̄a ndo. Ko je e ndo kontsjenga ndo manta jitsáa ndo ixi jaña juakoxin ndo je a juaxruxin jii ndo. Ko ndachro ndo:

—Ja onta tamanta ijie tsitjáñaxinnta. Jan an íxro an ijie tama ixi ó juintano anta chijni jian, ko ja anta kuitikaon anta. Méxin, jai satsji sintakuan an ni je a judío.

⁷ Tjume e kuachrjexin ndo ni ngo judío ko sakjui ndo ndo a naa sen ndatin in Justo, ndo me e xraxaon ndo ndo Dio. Ko tjenka ndo a ndo jii ni ngo.

⁸ Ko ndo Crispo, ndo tetuan an ni ngo judío, ko kain sen ndo a ndo, kuitikaon sen Ncháina Jesús. Ko kaxon kueya ni tjajna Corinto kuin en n̄a chijnie ndo Dio ko kuaxi n̄a kuitikaon n̄a Ncháina* Jesús ko bikitée n̄a.

⁹ Tjume e naa tiie bikon ndo Pablo Ncháina Jesús ko ja in ndachro ndo Jesús:

—Tjakua chijnina ko xronka ia. Nai a tintu e nichja chijnina

¹⁰ ixi jan an tjenka ritjén ko xro an ngisen ndako a sinta a ixi jan an chonda itsjé sen titikaonna tjajna nti i.

¹¹ Méxin, ndo Pablo kuitu e ndo naa nano ko tu o nti a tjajna Corinto, ko juinchekuen en ndo n̄a chijnie ndo Dio.

* **18:8 Ncháina** Señor Ncháina Jesús o Ncháina Dio

¹² Nchakon baketuan an xi Galión nunte Acaya, itsjé ni judío ningakon en nã ndo Pablo ko bikao nã ndo ti ste xi tetuan an.

¹³ Ko ndache nã xi tetuan an:

—Xi ji i ichrji xa nchekateya xa chujni ixi tjaun xa jée xronichjexin nã ndo Dio, je a xranchi ndachro ley.

¹⁴ Ko ndo Pablo ó tjaun ndo xronichja ndo, ko tuinxin xi Galión ndache xa ni judío:

—Siá nduaxin naa ijié tsango ijié juinche e xi ji i, jan an xrokonda tsin an nge e xrondachronta.

¹⁵ Ko ji i je o chijni ko nombre ko ley na anta tətəxinnta. Méxin, ja onta nchekonchjiannta ji i ixi jan an tjaun a tsjitexin nge e tətəxinnta.

¹⁶ Tjume e kuetuan an xa ixi satsjixin nã nti a.

¹⁷ Ko ni griego koñao nã ko itsé nã xi Sóstenes, xi tetuan an ni ngo judío, kō nti a juaya nã ngajin xa ko stetsje e kain xi tetuan an, ko xi Galión xro an nge e ndachro xa.

Ikjan Ndo Pablo tjajna Antioquía

¹⁸ Ndo Pablo xrakuitu e ndo itsjé nchakon tjajna Corinto ko tjume e chjée ndo sen juajna sen kichuuna ko kuixin in ndo naa ntābarco ixi sakjui ndo nunte Siria ko kao jan Priscila ko ndo Aquila. Tjume e kuiji sen tjajna Cencrea ko nti a ikjín jaa ndo Pablo ixi juakoxin ndo juinche e ndo ti nge e tsindachro ndo.

¹⁹ Nchakon kuiji sen tjajna Éfeso kuintu e ndo Pablo jan Priscila ko ndo Aquila ko sakjui ndo naa ni ngo ko juao ndo ni judío tsixra o nti a.

²⁰ Ko je e nã kuinóatée nã ixi xrokuitu e ndo nti a, ko je e ndo chro a ndo.

²¹ Méxin, nichje e ndo n̄a ko ndachro ndo:

—Xrokonda tsake é t̄ajna Jerusalén nchakon tsij̄ kia. Ko xrokjanna íjngo xrotsja anta siá tsituexin ndo Dio.

Tjume e kuintu e ndo n̄a ko kuixin in ndo n̄tabarco sakuix̄in ndo t̄ajna Éfeso.

²² Nchakon kuiji ndo t̄ajna Cesarea sakjui ndo t̄ajna Jerusalén ko bikitsje e ndo sen titikaon Ncháina nti a. Ko tuinxin bingajin ndo t̄ajna Antioquía.

²³ Kuatsinga kaxin nchakon, kuachrjexin ndo nti a ko bakji ndo kaxin t̄ajna nunte Galacia ko Frigia ko nichje e ndo kain sen titikaon Ncháina Jesús ixi juaxruxin tsintee sen.

Ndo Apolos juako ndo ngajin ni t̄ajna Éfeso

²⁴ Nchakon me e naa ndo judío ndatin in Apolos kuiji ndo t̄ajna Éfeso, ndo me e tikinixin ndo t̄ajna Alejandría. Je e ndo jian tjako ndo ko jian chúxin ndo xroon chijnie ndo Dio.

²⁵ Je e ndo no e ndo cha o ne e Ncháina ko juaxruxin banichja ndo kondee ndo Jesús maski je o no e ndo xranchi batikitée ndo Juan chujni.

²⁶ Ko ndo Apolos juako ndo ti ni ngo ko xrakon a ndo. Ko nchakon kuin en jan Priscila ko ndo Aquila ti juako ndo, tjume e kuachrjendaka o sen ndo ko juinchekuen en sen ndo ti nge e xranoe a ndo cha o ne e ndo Dio.

²⁷ Tjume e nchakon t̄jaun ndo Apolos satsji ndo nunte Acaya, sen kichuuna bingijna sen ndo ko ikjin sen naa xroon ngajin sen titikaon Ncháina ste nti a ixi xrokuayé e sen ndo jian. Ko nchakon kuiji

ndo nunte Acaya bingijna ndo ngajin sen ixi juasie ndo Dio ó tsikitikaon sen.

²⁸ Ko stetin en kain chujni, juakoxin ndo ixi ndako a titikaon ni judío ko juacha ndo juako ndo ixi xroon chijnie ndo Dio chronga ixi nduaxin ndo Jesús ndo Cristo.

19

Ndo Pablo bake e ndo tjajna Éfeso

¹ Xrabake e ndo Apolos tjajna Corinto, ndo Pablo bakaji ndo tjajna ste nganito jnā ko tjume e kuiji ndo tjajna Éfeso ko nti a kuetan ndo kueya ni titikaon chijnie ndo Dio.

² Ko tjume e juanchangi e ndo sen me e:

—¿Á kuaye enta Espíritue ndo Dio nchakon kuitikaonnta Ncháina?

Ko je e sen juate e sen:

—Na i, jan anna xratian ina á jii Espíritue ndo Dio.

³ Tjume e juanchangi ndo Pablo:

—¿Ngisen juachaxien bikitéexinta?

Ko je e sen juate e sen:

—Xranchi kuachronga ndo Juan, jaña bikitéena.

^{4*} Ndachro ndo Pablo:

—Ndo Juan kuanchekitée ndo chujni ixi xrok-jan nā xrokuitikaon nā ndo Dio ko juako ndo ixi xrokuitikaon nā ngisen tsij tuenxin ndo, ko ndo xrokuji ndo me e ndo Jesús, ndo Cristo.

⁵ Kuin en sen ji i, me e bikitée sen; ixi juachaxien Ncháina Jesús.

⁶ Tjume e ndo Pablo bake e itja ndo ngata a jaa sen ko kuu Espíritue ndo Dio ngajin sen ko kuaxi sen nichja sen jée ngigua ti chúxin a sen ko nichja sen nge e kuajon ndo Dio.

⁷ Ko sen xi me e xranchi teyuu sen.

⁸ Ko ní nchanitjao, ndo Pablo bake e ndo ni ngo judío nti a ko bajako ndo ko baxronka i ndo. Ko nichje e ndo sen ko jian banhekuen en ndo na xranchi jii juachaxin tetuan an ndo Dio.

⁹ Ko kaxin na tsango icha aséen na ko tjaun a na tsitikaon na Ncháina Jesús ko chaxro a kuanichja na ixi chijnie Ncháina ngajin kain chujni. Tjume e ndo Pablo kuachrjendáa ndo ko sabikao ndo sen titikaon chijnie Ncháina ko kain nchakon bajako ndo ti jii naa escuela ndatin in Tiranno.

¹⁰ Jaña bajako ndo yuu nano, ko kain ni bake e nti a nunte Asia kuin en na chijnie Ncháina Jesús, ni judío ko kaxon ni je a judío.

¹¹ Ko ndo Dio ícha juinche e ndo ijié ixra ixi ti kuanichja ndo Pablo.

¹² Ko itsjé na bakikao na pañuelo ko manta ngajin ndo Pablo ixi tsake e itja ndo ko jaña bakikao na ngajin ni ni e ko kain ichin chóna na kuachrje ichin ko espíritue Xixron anxrée kuachrje kaxon.

¹³ Ko kaxin ni judío bakaji na ko tjaun na tsantsje na espíritue Xixron anxrée ko je e na je o ncheye e na chujni ixi tjaun na xronichja na ixi juachaxien ndo Jesús. Ko bandache na espíritue Xixron anxrée:

—Juachaxien ndo Jesús, ndo tjako ndo Pablo, tetuan anna ja a espíritue Xixron anxrée tachrjexian nti i.

14 Jaña banche e yaato chjen en naa xi judío ndatin in Esceba, xitaana tetuan an.

15 Tjume e naa nchakon nichje e na espíritue Xixron anxrée. Ko espíritu me e ndachro:

—Chuxinna ndo Jesús ko nónana ngisen ndo Pablo. Ko ja a, ¿ngisen ja a?

16 Ko jaña xi chóna espíritue Xixron anxrée chringanito xa na ko tsango soji xa juacha xa juincheni e xa kain na. Ko turuchu na kuachrxjin na nchia ko tsikoni e na.

17 Ko kain ni judío ko ni je a judío ste na tjajna Éfeso kuin en na nge e tsikon en ko tsango xronka na ko ndachro na ixi tsango ijié juachaxien Ncháina Jesús.

18 Kaxon itsjé ni kuitikaon Ncháina bakiji na ko kuachronga na kain ti ixra ndako a banche e na.

19 Ixi itsjé na banche e xra tuso, ni me e bakika o na xroon banchekuanxixin na xra tuso ko juaaka na xroon stetsje e kain chujni ste nti a. Ko ti tjintee kain xroon me e xranchi yuu ikánte mil tomi chika plata.

20 Ko chijnie Ncháina Jesús ícha jitingangi ko tjakoxin ixi nduaxin chóna chijni ijié juachaxin.

21 Ko ndo Pablo xraxaon ndo tsitsje e ndo sen tjajna Jerusalén ko tsatsinga ndo nunte Macedonia ko Acaya. Ko tsjexinja tsake e ndo tjajna Jerusalén, satsji ndo tjajna Roma.

22 Ko xruan an ndo yuu sen tingijna ndo satsji sen nunte Macedonia, sen me e ndo Timoteo ko ndo Erasto, ko je e ndo Pablo xrakuitu e ndo nunte Asia kaxin nchakon.

Koñao ni tjajna Éfeso

23 Ko nchakon me e itsjé ni tjajna Éfeso koñao na ixi juaxruxin a ste na ixi chijnie Ncháina Jesús.

24 Ixi nti a jii naa xi ndatin in Demetrio ko je e xa bancheckonchjian xa ixi chika plata kaxin ni ngo nchínchín kondee naa nchri diosa ndatin in Diana, ko kueya tomi bajacha xa ko kaxon ni ché e xré e xa.

25 Tjume e jua o xa ikaxin ni kuanche e xra me e ko ndache xa na:

—Ja anta no anta ixi ti ixra nche ena tjachana jian ko jaña juaxruxin stena.

26 Ko xranchi tikonnta ko tin ennta ixi xi Pablo tjako xa ixi ídolo nchéñana je a dio. Ko jaña ndache xa itsjé chujni ko je a je o nti i tjajna Éfeso, kaxon nguixin nunte Asia.

27 Tsango chaxro a ji i ixi xraña tsitjáña xra ko kaxon ningue nchri diosa Diana ba tsitjáña, ko ísitikaon a na nchra ko tsitjáña juachaxien nchra nguixin nunte Asia ko nchijí xasintajni.

28 Ko hora kuin en na ji in, tsango koñao na ko séen kuyako na:

—Tsechón nchri Diana, santoe ni tjajna Éfeso.

29 Tjume e tsango koñao kain ni tjajna Éfeso ko ningakon en na ndo Gayo ko ndo Aristarco, sen me e yuu sen tsiki xin nunte Macedonia. Ko itsé na sen ko bingakjin na sen bikao na sen ngaxin in ti tóñaxin junta.

30 Tjume e ndo Pablo tjaun ndo tixin in ndo nti a ixi xronichje e ndo na, ko sen titikaon Ncháina kuintue a sen ndo itsji ndo.

31 Kaxon ikaxin ni tetuan an nunte Asia, ni chúxin ndo Pablo, xrueen en na chujni ixi xron-dache sen ndo Pablo ixi tsixin a ndo nti a.

³² Ko tjume e ni tsixra o nti a ndachro n̄a naa nge e, ko ikaxin n̄a j̄e chro n̄a ko koñāo n̄a ko itsjé n̄a noe a n̄a sonda xra o n̄a nti a.

³³ Ko ikaxin ni judío ndache n̄a naa xi ndatin in Alejandro nge e jiton en ko bak̄e e n̄a xa ngusine ko je e xa juakoxin itja xa ixi xrotenko n̄a ixi xronichjaxin xa ni judío ngajin ni ste nti a.

³⁴ Ko hora juatsuan n̄a xi Alejandro ixi kaxon xa ni judío xa, kain n̄a kuyako n̄a xranchi yuu hora ko ja in ndachro n̄a:

—Tsechón nchri Diana, santoe ni tjajna Éfeso.

³⁵ Tjume e xi secretarioe ni tjajna nti a kuetuan an xa xrotenko n̄a ko ndachro xa:

—Chujni tjajna Éfeso tin ennta. Nchijí nunte xasintajni no e n̄a ixi ni tjajna Éfeso tayakon en n̄a ningue nchri diosa Diana, tsikoña ixro kuix̄in ngajní.

³⁶ Xro an ngisen ndachro ixi nduaxin a ji in. Méxin, tenkonta, ko xraxaonnta nge e nche enta

³⁷ ixi ni bikuunta nti i nichjangíe a n̄a ningoina ko nichjangíe a n̄a santoina Diana.

³⁸ Ko siá xi Demetrio ko ni nchexrée xa tjankata a n̄a ijię xrojan ngisen jii nti i, méxin jii ni nchéña ijię, je e n̄a xrokuin en n̄a nge e xrondachro xi Demetrio ko jaña sinchéña n̄a ijię.

³⁹ Ko siá jii inaa nge e nta inta juaxruxin, xrokonda xronichjanta nchakon xroxra o kain n̄a ko nchakon me e tsoña ijię.

⁴⁰ Xrokonda i tsjakaxin kichuuna ko sincheke-tona chujni ixi b̄a tsjangiina xi tetuan an ixi ndako a stentu una.

⁴¹ Ko tjume e kuetuan an xi secretario ixi satsji na ko jaña juexin sakjui ni tsixra o nti a.

20

Sakjui ndo Pablo nunte Macedonia ko nunte Grecia

¹ Nchakon juexin kain ji in, tjume e ndo Pablo kuiye e ndo kain sen titikaon Ncháina Jesús nti a ko ndachro ndo kaxin chijni ixi ícha xrochuntia sen Ncháina ko tjume e sakjui ndo no nunte Macedonia.

² Ko nchijí ti no kuatsinga ndo, chaxro nichje e ndo sen titikaon Ncháina ixi juaxruxin tsintee sen. Ko tjume e kuiji ndo nunte Grecia.

³ Nti a kuitu e ndo ní nchanitjao ko tjume e xrokua ndo naa ntábarco saxrokjui ndo nunte Siria. Ko kono e ndo ixi kaxin ni judío ningakon en na ndo ko xraxaon ndo cháña xrokjanxin ndo tutée ndo ko tsatsinga ndo nunte Macedonia.

⁴ Ko sen bikao ndo Pablo, me e ndo Sópater, ndo tjajna Berea, ndo Aristarco, ndo Segundo, ndo tjajna Tesalónica, ndo Gayo, ndo tjajna Derbe, ndo Timoteo, ko kaxon ndo Tíquico, ko ndo Trófimo, sen nunte Asia.

⁵ Sen kichuuna kuitaon sen nti a ko chonna na sen tjajna Troas.

⁶ Ko juexinja kuatsinga kia ine sen nutja chón da i ti tja in nio, tjume e kuixi inna naa ntábarco ko kuachrjexinna tjajna Filipos ko kuatsinga na ó nchakon, tjume e juasona tjajna Troas ko nti a kuetanna sen kuitaonxin ko nti a kuitunana yaato nchakon.

Ndo Pablo sakjui ndo tjajna Troas

7 Ko nchakon xrangíxixín semana xra ona ixi xrochrijin nutja xraxaonxinna Ncháina Jesucristo. Ko ndo Pablo nichje e ndo kain sen titikaon Ncháina Jesús ixi tjaun ndo saxrokjui ndo ndúyaxin, méxin xrajitjako ndo chjéja ngusine tiie.

8 Ko piso noi nchia nti a xrauxinna ko nti a steche kueya xro i.

9 Ko nti a jii naa chajan ndatin in chán Eutico, chán me e bake e chán nunte ngata a ventana. Ko ndo Pablo tsango sée nichja ndo, méxin, tsango chjée chán kotachrin. Ko ndatsikejua chán ko kue e chán nunte ti nínxin piso ko hora kuatsi in sen chán, ndatsiken en chán.

10 Méxin, ndo Pablo xingajin ndo ko kuitsingata a ndo chán ko joa ndo chán. Ko ndache ndo sen kichuuna:

—Xronka inta, jichón chán.

11 Tjume e ndo Pablo ikjan ndo bajin in ndo ixi tsonchrijin ndo nutja sine sen, xroxraonxin sen Ncháina Jesucristo. Ko nichja ndo bingasáñajan ko tjume e sakjui ndo.

12 Ko chán tsike e nunte sabikao sen chán jichón chán, ko kain sen juaxruxin kuitu e sen.

Sajuixin ndo Pablo tjajna Troas ko kuiji ndo tjajna Mileto

13 Jan anna kuitaonxinna nti a ko kuaana naa ntábarco ko juasona tjajna Asón ixi nti a tsetanna ndo Pablo ixi ndachro ndo tsjixin ndo tutée ndo.

14 Nchakon kuetanna ndo tjajna Asón, kuixin in ndo ntábarco stetji jan anna ko sakjuina tjajna Mitilene.

¹⁵ Ko kuachrjexin na nti a, ndúyaxin kuatsingana nunte Quío ko nchakon yuxin juasona tjajna Samos ti no tachrje ikaxin ntábarco ko tjume e sakjuina tjajna Trogilio ko nti a jokéna. Ko kuatsinga naa nchakon juasona tjajna Mileto.

¹⁶ Jaña junta ana ixi ndo Pablo tjaun a ndo sée xrobake e ndo nunte Asia ko tjaun a ndo xrokjui ndo tjajna Éfeso ixi tjaun ndo taka tsiji ndo tjajna Jerusalén ixi nti a tsake e ndo nchakon kia Pentecostés.

Nichje e ndo Pablo sen tetuan an ni ngo tjajna Éfeso

¹⁷ Hora bake e ndo Pablo tjajna Mileto kuituan an ndo ixi tsij sen tetuen en ni ngo tjajna Éfeso.

¹⁸ Ko nchakon kuiji sen ndachro ndo:

—Ja anta ó no anta xranchi kuantá a nchakon xrangíxixín juaso nunte Asia.

¹⁹ Ó no anta ixi kain nchakon bake é ngajinnta ko junta a ixra ngajin Ncháina Jesucristo ko juinjajé a aséenna ko tsjanga ixi kueya juachjaon kua ixi ni judío tjaun na xrojuinchenina na.

²⁰ Ko jan an kuíntua i juáko kain nge e jian xrokonda xrokono anta. Ko juako anta ti xra o kain itsjé chujni ko kaxon ndointa.

²¹ Juinktuan an kain ni judío ko kain ni je a judío ixi xrokonda tsintu e na ti ndako a nche e na ko xrochuntia na ndo Dio ko Ncháina Jesucristo.

²² Ko jai satsji tjajna Jerusalén ixi Espíritue ndo Dio kotuanna ko nóna i nge e tsónna nti a.

²³ Je o nóna ixi kain tjajna tsatsinga, Espíritue ndo Dio ndachijina ixi ni tjajna Jerusalén xrox-raxin inna nã ndo achjiso ko tangi sinchenãna.

²⁴ *Ko ta i juachjaon ixi maski tangi tsónna. Je o juaxruxin tsake é ixi sintajexin ti kotuanna Ncháina Jesús ixi tsjáko chijnie ndo, xranchi ndo Dio tjue e ndo chujni.

²⁵ 'Ko jai nóna ixi ninaáanta, ni juako anta juachaxien ndo Dio, ítsikon aninta íjngo.

²⁶ Méxin, jai ntatjunta ixi xro an ijie chónnda siá xrojannta ítsitikaon anta.

²⁷ Ixi ó juako anta kain nge e tjaun ndo Dio, ko ítitjáña i tsjáko xrojan nge e.

²⁸ Tsje enta xranchi jian take énta ko tsje enta sen kichuunta, sen ni ngo, ixi Espíritue Dio tjáanta ndo ixra tayakon ennta sen ste ningue Ncháina, sen kuenaxin ndo ixi jnié ndo.

²⁹ Ko ó nóna nchakon satsji jan an, tsji kaxin ni sincheke to sen ni ngo xranchi kundanaxra tinche ba kutuchjon.

³⁰ Ko kaxin nã ste nã ngakjen ennta sincheya nã ko jaña sen ni ngo xrorué e sen nã ko ítsitikaon a sen Ncháina.

³¹ Méxin, tsje enta, ko xraxaonnta ixi xranchi ní nano jan an juintakuan annta tiie ko nchakon ko tsjanga ko kuíntua i juintakuan annta ti jian.

³² 'Ko jai ja anta kichianna, ngaya itja ndo Dio takéenta ko kaxon tsingijnaxinnta ndo chijnie ndo ixi je e ndo tjua anta ndo. Ko je e ndo tsango chónnda ndo juachaxin tsingijnanta ndo ixi tsaye enta kain nge e ti tjaun ndo ti xrochjée ndo kain sen chujnie ndo ti tjúá aséen sen.

³³ Jan an tjaun a tomie na ni mantée na.

³⁴ Ja anta no anta jian ixi jan an tjána junta axin ixra ko kuenaxin nge e xrokondana ko kaxon nge e xrokonde e sen riki an.

³⁵ Jaña juako ngajinnta ixi sinche enta ixra ko tsingijnanta ni xro an nge e chóna nge e. Ko xraxaonnta ti tsindachro Ncháina Jesús: “Ícha juaxruxin take e sen tajon, ixi sen tayé e.”

³⁶ Ko juexin ndachro ndo Pablo ji i, bake exin ntatuchi in ndo ko nichje e ndo ndo Dio ko kaxon kain sen.

³⁷ Tjume e kain sen tsjanga sen, joa sen ndo ko kuitoxin sen ndo.

³⁸ Ko tsango koni e aséen sen ixi chronga ndo ítsikon a sen ndo íjngo. Tjume e bikao sen ndo ti no jii ntabarco ko sakjui ndo.

21

Sakjui ndo Pablo tjajna Jerusalén

¹ Nchakon kuintu ana sen kichuuna, tjume e kuixi inna ntabarco ko sakjuina nunte Cos. Ko ndúyaxin sakjuina tjajna Rodas, ko nti a sakjuixinna tjajna Pátara.

² Tjajna Pátara kuitjana naa ntabarco satsjixinna no nunte Fenicia ko kuixi inna ntabarco me e ko sakjuina.

³ Nchakon kuatsingana nti a bikona nunte Chipre ko kuatsingana ndatsjonxin ikjon ko xrabikonna nunte Siria. Tjume e ntabarco sakjui ntaa tjajna Tiro ixi xrokonda xroxingajin nge e tjinga ntaa ti tjajna me e, ko nti a kuixi inna tjajna.

⁴ Ko kuitjana sen titikaon Ncháina ko nti a kuitunana ngajin sen yaato nchakon. Ko Espiritue

ndo Dio juincheno e sen ixi xronache sen ndo Pablo satsji a ndo tjajna Jerusalén.

⁵ Ko juexin kuatsinga ti yaato nchakon me e, kuachrjexinna nti a kaina ko kain sen titikaon Ncháina Jesús ko janchri e sen ko chjen en sen bikaanxina sen ngande e tjajna ko ngande e ndachaon bake exinna ntatuchi inna nichja ana ndo Dio.

⁶ Ko tjá ana sen juajna ko bajína ntabarco ko je e sen ikjan sen ndo a sen.

⁷ Ko juasona tjajna Tiro ko tjajna Tolemaida. Nti a tjá ana juajna sen titikaon Ncháina ko nti a kuitunana ngajin sen naa nchakon.

⁸ *Ko ndúyaxin ndo Pablo ko jan anna sajuixinna nti a, sakjuina tjajna Cesarea. Nti a ikjuina ndo a ndo Felipe, naa ndo tjako chjnie Ncháina Jesús. Je e ndo naa sen yato sen tingijna kuinche e Ncháina Jesús ko kuitunana ndo a ndo.

⁹ Ndo Felipe kuachóna ndo noó nchrichajen en ndo, nchri xratutee a, nchri me e tayé e nchrichan chjnie ndo Dio ti tjaun ndo tsono e chujnie ndo.

¹⁰ *Nti a kuinteena itsjé nchakon ko tjume e kuiji naa ndo tayé e chjnie ndo Dio ko ndo me e ndatin in ndo Agabo, ndo nunte Judea.

¹¹ Kuiji ndo kuitsjenana ndo ko itsé ndo tjuā tingatóxin ndo Pablo ko tjuā me e kuintexin ndo tutée ndo ko itja ndo ko ndachro ndo:

—Espíritue ndo Dio ndachro ixi ni judío ja in sinchekao nā nchéé tjuā ji i ko tsikao nā ndo ngajin ni je a tjajna judío.

12 Juexin kuin anna ti ndachro ndo Agabo, tjume e jan anna ko ni tjajna Cesarea kuinóatánana ngajin ndo Pablo ixí tsji a ndo tjajna Jerusalén.

13 Ko juatingíexin ndo Pablo:

—¿Sonda ncheni enta aséenna ixí ritsjanganta? Jan an je a je o xrochon an tsinteenana, kaxon jan an tsenxinna kondeexin Ncháina Jesús nti a tjajna Jerusalén.

14 Ko jan anna juacha ina xrokuitikaonna ndo, méxin kuintu ana ndo satsji ndo ko ntatjanna ndo:

—Tson en ti tjaun Ncháina Jesús.

15 Ko kuatsinga kaxin nchakon xakonnana ko sakjuina tjajna Jerusalén.

16 Ko biki ana kaxin sen titikaon Ncháina, sen tjajna Cesarea. Sabiki anna sen ndo a naa ndo tjajna Chipre ndatin in ndo Mnasón. Je e ndo ó sa ó titikaon ndo Ncháina Jesús ko kuajon ndo ndo a ndo kuitunana.

Ndo Pablo kuitsje e ndo ndo Jacobo

17 Nchakon juasona tjajna Jerusalén sen kichuuna jian nichja nana sen.

18 Ko ndúyaxin biki ana ndo Pablo bikitsja ana ndo Jacobo, ndo kichuu Ncháina Jesús, ko kaxon nti a ste kain sen kichuuna tetuan an ni ngo.

19 Ndo Pablo chjée ndo sen juajna ko beki e ndo sen kain nge e juinche e ndo Dio nchakon juako e ndo ni je a judío.

20 Juexin kuin en sen ji in, kuajon sen juasaya ngajin ndo Dio, ko ndache sen ndo Pablo:

—Kichianna, ja anta ó bikonta ixí jii itsjé mil ni judío ó titikaon na ndo Jesús ko kain na ndachro

na ixi xrokonda kaxon tsitikaonna ley kuajon ndo Moisés.

²¹ Ko jai tsikin en na ixi ja anta juinchekue ennta ni judío ste tjajna ícha ikjín ixi tsitikaon a na ti ley juako ndo Moisés ko kaxon ndachenta na ixi xrochjé a na chji e ni judío chjen en na ko xrokonda i tsitikaon na ti titikaon ni judío.

²² ¿Nge e sinta ana ixi tsin en na ixi ó jui inta?

²³ Méxin, cháña ja in nche enta. Nti i jii noó sen tjaun sinche e sen ti ó ndache sen ndo Dio.

²⁴ Tiku unta sen ko tjenganta na kain nge e xrokonda sinche e sen ti tontjúá aséen sen ko ti ikjín jaa sen, tjenganta na ti tsoxienxin ko jaña tsono e kain sen kichuuna ixi nduaxin a kain ti nichja na ti ja anta nche enta ko jai tsikon sen ixi ja anta titikaonnta ley.

²⁵ *Ko ni je a judío, ni ó tsikitikaon Ncháina Jesús ó kjin anna na naa xroon ixi tsa i na juachjaon ixi kain ji in. Je o sine a na ntao tsikinixin en ídolo ko sine a na ijni ko ntau e iko tsikintji a jnié ba, ko xrochóna i na inaa nchri o xi je a ndoxi e o janchri e na.

Itsé na ndo Pablo ti ni ngo

²⁶ Tjume e ndo Pablo sabikao ndo sen noó ko ndúyaxin juexin kontjúá sen kao je e ndo. Ko tjume e kuixin in ndo ni ngo ixi xrochronga ndo ixi juexin kontjúá sen ko xrobikao ngujngu sen nge e tikinixin en ndo Dio tsayé e xitaana.

²⁷ Ó xroxetja yaato nchakon, tjume e kaxin ni judío tsikj xin nunte Asia bikon na ndo Pablo

ngaxin in ni ngo. Ko tjume e juinchekateya na kain chujni tjajna ko itsé na ndo Pablo.

²⁸ Ko stekoyako na ko ndachro na:

—Kainnta, ni tjajna Israel, tingijnananta. Xi ji in ichrji xa nguixin nunte ko tjako xa nge e je a jian kondee tjajnaina, ko titikaon a xa ley kuetuan an ndo Moisés, ko titikaon a xa ningoina. Ko jai tsixraxin in xa kaxin ni griego ko nchekitja xa ngaxin in ni ngo tjuá.

²⁹ *Jaña ndachro na ixi seno tsikikon na chrikao ndo Pablo ndo Trófimo tjajna Éfeso ko xraxaon na ixi ndo Pablo tsikikao ndo xa ni ngo.

³⁰ Ko nchijí tjajna koñaon na ko kain na ikjui na itsé na ndo Pablo ko bingakjin na ndo ngandangi nduja ni ngo ko bije e na ntachja ni ngo.

³¹ Ko tjaun na naaxrokónaxón na ndo ko naa xi comandante tetuan an xi soldado romano kuin en xa ixi nchijí tjajna Jerusalén stekoñaon na.

³² Tjume e xi comandante bikao xa xi soldado ko ni tetuen en xa ko binga na ikjui na ti ste kain na. Ko hora bikon na ixi ó kuiji xi comandante ko xi soldado kuintu e na ndo Pablo, ko í juaya i na ngajin ndo.

³³ Ko xi comandante konchjiñe e xa ko itsé xa ndo Pablo ko kuetuan an xa ixi tsinteexin na ndo yuu chika cadena. Ko tjume e juanchangi e xa na ngisen je e ndo ko nge e tsijinche e ndo.

³⁴ Ko chujni tsixra o nti a, kaxin na kuyako na naa nge e ko ikaxin na íngo nge e. Ko xi comandante tienxin a xa sonda jaña stenche e na ixi tsango tuyako na. Tjume e kuetuan an xa ixi satsikao xa ndo Pablo ti no jii cuartel.

³⁵ Ko bijikao xa ndo ti tjasoxinni nchia, xrokonda kuama xa ndo Pablo ixi tjaun na xrojuaya na ngajin ndo.

³⁶ Ko kain ni sterué e ja in stetoyako na:
—Naatóñaxónnta xa.

Ndo Pablo chronga ndo ngajin na ixi chóna i ndo ijie

³⁷ Ko hora xroxraxon in na ndo Pablo ti jii cuartel, juanchangi e ndo Pablo xi comandante ko ndachro ndo:

—¿Á chao xronichja ngajinnta?

Ko je e xa juatingíexin xa ko ndachro xa:

—Ja a, ¿á no a nichja ngigua griego?

³⁸ Méxin, ¿á je a ja a xi tjanya Egipto, xi juincheKateya chujni ko sabikao noó mil ni ña i ntajie?

³⁹ Tjume e juate e ndo Pablo ko ndachro ndo:

—Na i, jan an naa xi judío jongínaxin tjanya Tarso, nunte Cilicia. Jan an juixin naa tjanya tsango tjintee. Ko tjancha a ixi tintunana xronichja a chujni ji i.

⁴⁰ Tjume e xi comandante kuajon xa juachaxin ko ndo Pablo bake exin tutée ndo ti jii ti tajixinni nchia ko itja ndo juakoxin ndo ixi xrotenko na. Tjume e kuita na ko kuaxi ndo nichjexin ndo na ngigua hebreo ko ndachro ndo:

22

¹ —Ja anta kichuuna ko sen tachríi, tin ennta nge e xrondachrjan ixi jan an chonda i ijie.

² Ko kuin en na ixi nichja ndo ngigua Hebreo ko ícha tenko na. Ko ndachro ndo Pablo:

³ *—Jan an naa xi judío jongínaxin tjajna Tarso nunte Cilicia. Ko nti i bangíxin tjajna Jerusalén ko juintakuanxin ngajin ndo Gamaliel ko titika on kain ti tjako ley tsikitikaon sen xranchrjen. Ixi jan an ícha junta a jian xrée ndo Dio ixi nchijí aséenna xranchi ja anta nche enta jai.

⁴ *Jan an sa ó bakengi ko bakoña uan sen titikaon Ncháina Jesús ko naabakóñaxón sen ko baxraxin in xi ko nchri ndo achjiso.

⁵ Ko xitaana tetuan an ko kain ni tachríi tayakon en ni ngo judío no e nã kain ji i ixi je e nã chjána nã xroon tsayé e sen kichuuna judío ste tjajna Damasco. Tjume e sakjui nti a ixi bijée sen titikaon Ncháina ixi xrobikian sen nti i tjajna Jerusalén ixi tangi xrobikaon sen.

*Xranchi kuaxi kuitikaon ndo Pablo Ncháina
(Hch. 9:1-19; 26:12-18)*

⁶ Nchakon juaso tjenka tjajna Damasco xranchi ngusine nchakon tuinxin ngandajinna tsango bingasáña naa xro i kuixin ngajní.

⁷ Ko kuaritsinga nunte ko tuinxin kuin an naa téé sen nichja ko ndachro: “Saulo, Saulo, ¿sonda rua nana ko sonda ningakonnana?”

⁸ Ko jan an juanchangi: “¿Ngisen ja anta?” Ko juate e ndo: “Jan an ndo Jesús tjajna Nazaret, ndo ja a tengia ko ningakon én.”

⁹ Ko sen biki an bikon sen xro i ko xronka sen ko je e sen tsikien a sen téé sen nichja.

¹⁰ Ko jan an juanchangi: “¿Nge e tjauannta sinta a?” Ko juate e ndo ko ndachro ndo:

“Taya satjia ko tixin ia tjajna Damasco ko nti a xrontatjua kain nge e sinche e.”

¹¹ Ko kondeexin xro i me e í bikon a, méxin, sen biki an bingatséna sen ko sabiki an sen tjajna Damasco.

¹² Nti a bake e naa ndo ndatin in ndo Ananías, ndo me e jian kuitikaon ndo ley tsikajon ndo Moisés. Ko kain ni judío jii tjajna Damasco tsango chónde e na ndo juasaya.

¹³ Ko ndo Ananías kuij ndo kuitsjena ndo ko hora kuiji ndo ndachijina ndo: “Kichian Saulo, taye é juachaxin ixi íjngo tsikuan.” Ko nduaxin tuinxin bikon.

¹⁴ Ko ndachijina ndo: “Ndo Dio kuitikaon sen xrachrjeina kuincha a ndo ja a ixi tsono a nge e tjaun ndo ko ixi tsikuan ndo tsango jian ko tsin en ti xronichja ndo.

¹⁵ Ko ja a xrochronga nge e nduaxin bikuan ko nge e kuin en ngajin kain ni jii ngata a nunte.

¹⁶ Ko jai í chuen a ícha. Taya ko tikitéexian nombrée Ncháina Jesucristo ixi me e tsijmaxin jáa.”

Ndo Dio tajon ndo ixra ngajin ndo Pablo

¹⁷ Ko nchakon ikjanna tjajna Jerusalén tjume e ikjui ni ngo kuinichja a ndo Dio ko bikon Ncháina,

¹⁸ ko ja in ndachijina ndo: “Jaiko tachrjexian tjajna Jerusalén ixi chujni nti i tsitikaon a na chijnina tsjakoa ja a.”

¹⁹ Tjume e jan an ndachrjan: “Ncháina, je e na no e na ixi seno jan an bakji kain ni ngo ko kuatse sen titikáoa ja a ko baxraxin in sen ndo achjiso ko bajaya ngajin sen.

²⁰ *Nchakon naakóñaxón n̄a ndo Esteban, ndo nche e xráa, banichja chijnia, jan an kaxon nti a bake é ko ndachrjan ixi chao ndatsen en ndo ko jan an tsj̄a a mantée ni kóña ndo.”

²¹ Ko Ncháina ndachijina ndo íjngo: “Satjia ixi xroxruan an ikj̄in sinchekuen én ni je a judío.”

Ndo Pablo jichón en ndo nge e xichro xi comandante

²² Ni tsixra o je o kuin en n̄a kain ji i ko tjume e kuaxi n̄a kuyako n̄a:

—Tsen en xi ji i, jan anna tjaun ana tsechón xa.

²³ Ko ícha stetoyako n̄a ko stetjánka n̄a mantée n̄a ko kaxon stetjánka n̄a inche.

²⁴ Ko xi comandante kuetuan an xa ixi xrox-raxin in n̄a ndo Pablo ngaxin in cuartel. Ko kuetuan an xa ixi tsande e n̄a ndo ixi jaña tsono e xa sonda ningakon en n̄a ndo.

²⁵ Ko juexin kuintee n̄a ndo ixi tsjaya n̄a ngajin ndo, tjume e ndo Pablo ndache ndo xi capitán jii nti a:

—¿Á jii juachaxin tsjayanta ngajin naa xi romano, xratóñe a xa ijje?

²⁶ Ti kuin en xi capitán ji i, ikjui xa kuichronga xa ngajin xi comandante ko ndachro xa:

—Tsje é nge e sinche e ixi xi ji i naa xi romano xa.

²⁷ Tjume e xi comandante konchjiñe e xa ngajin ndo Pablo ko juanchangi xa:

—¿Á nduaxin ja a naa xi romano?

Ko Ndo Pablo juate e ndo:

—Jaán, nduaxin.

²⁸ Xi comandante ndachro xa:

—Jan an juenga na itsjé tomi ixi kóñana naa xi romano.

Tjume e ndachro ndo Pablo:

—Jan an jongínaxin nti a.

²⁹ Ko tjume e ni xrojuaya ngajin ndo Pablo bingaxinton na ko kaxon xi comandante ixi kuin en na ixi ndo Pablo naa xi romano. Ko xronka na ixi tsixraxin in na ndo ndo achjiso.

Ndo Pablo nichje e ndo ni tetuan an ni judío

³⁰ Ko ndúyaxin xi comandante tjaun xa tsono e xa nge e ijię juankata a ni judío ngajin ndo Pablo. Tjume e koxindanga xa chika cadena jichroaxin ndo ko kuetuan an xa ixi xroxra o kain xitaana tetuan an ko kain xi tetuan an ni judío, ko tjume e kuantsje xa ndo Pablo ko bake e xa ndo ti ste kain na.

23

¹ Tjume e ndo Pablo jian tsje e ndo ni tituan an ni judío ko ndachro ndo:

—Kichuuna, ndo Dio jitsje e ndo ixi jian junta a jan an kain nchakon.

² Ko xi Ananías, xitaana tituan an, kuituan an xa ngajin ni ste tjenka ndo Pablo ixi tsande e na itja na ro a ndo.

³*Ko juate e ndo Pablo:

—Ndo Dio tsjaya ndo ngajinnta kaxon ixi ndako a nche enta. Ja anta ritjénnta ixi sinchéñanta jię xranchi tituan an ley. Méxin, ¿sonda titikaon anta ley ko kuituan annta bikaonna?

⁴ Tjume e ni ste nti a ndachro na:

—¿Á jaña nichjangí e xitaana tetuan an ne e ndo Dio?

⁵ Ko ndachro ndo Pablo:

—Kichuuna, jan an nóna i á xi ji i ndotaana ícha tetuan an, ixi ndachro xroon chijnie ndo Dio: “Xronichjangíe a chujni tituen en tjajnána.”

⁶ *Ko ndo Pablo kono e ndo ixi kaxin ni jii nti a ni partidoe xi saduceo, ko ikaxin na ni partidoe xi fariseo. Ko séen ndachro ndo:

—Kichuuna, jan an naa ni fariseo ko sen nía kaxon fariseo sen. ¿Sonda ja anta nchekamaninta ijie ixi jan an titika on xroxechón ni tsiken en?

⁷ Ko juexin ndachro ndo ji i, tjume e ni fariseo ko ni saduceo kuaxi juakaxin kichuu na ko je a naxraje o xraxaon na, méxin chjeya na.

⁸ *Ixi ni saduceo ndachro na xroxechón a ni tsiken en ko kaxon ndachro na xro an sen ángel jii ko xro an espíritu. Ko ni fariseo titikaon na kain me e.

⁹ Tjume e kain na kuintee na, ko kaxin xi fariseo tjako ley bingatjen xa ko ndachro xa:

—Xi ji in, jan anna xro an nge e ti ndako a kuitjána juinche e xi ji in. Á nchéxin naa espíritu o naa ángel nichje e xa.

¹⁰ Ko tsango koñao chujni ste nti a. Méxin xi comandante xronka xa ixi batsoña na ndo Pablo, ko kuetuan an xa ixi satsikao xa ndo ti jii cuartel.

¹¹ Ko tiie me e konoxin Ncháina ngajin ndo Pablo, ko ja in ndachro ndo:

—Xronka ia Pablo ixi xranchi juakua chijnina nti i tjajna Jerusalén, jaña kaxon tsjakoja tjajna Roma.

Juaon na ixi naatsóñaxón na ndo Pablo

¹² Ndúyaxin kaxin ni judío xraxaon na xranchi naatsóñaxón na ndo Pablo. Ko ndachro na ixi nombrée ndo Dio nduaxin tson en ji i ko xro an nge e sine na ko xro an nge e tsi i na tsjexinja tson en ti xraxaon na.

¹³ Ko xranchi yuu ikán* na xraxaon na ixi jaña sinche e na.

¹⁴ Tjume e ikjui na ti ste xitaana tituan an ko ni tetuan an ni judío ko ndachro na:

—Jan anna juaona ixi nombrée ndo Dio tson en ji in, sine ana ko tsi ana tsjexinja naatsóñaxónna xi Pablo.

¹⁵ Méxin, ja anta ko kaxin ni tituen en ni judío tjanche enta xi comandante ixi tsika o xa xi Pablo ndúya ngajinnta, xrondachronta ixi tjaunnta ícha tsono anta kondee je e xa ko jan anna xrochon anna ngatja cha o ko naatsóñaxónna xa ko ítsi a xa nti i.

¹⁶ Ko naa chán kueen ndo Pablo tsikin en chán nge e tjaun na sinchekao na ndo Pablo, méxin ikjui xjan ti cuartel kuichronga chán nge e kuin en chán stetjao na.

¹⁷ Tjume e ndo Pablo kuiye e ndo naa xi capitán ko ndachro ndo:

—Tiku a chán ji i ngajin xi comandante ixi chónda chán naa nge e xrochronga chán ngajin xa.

¹⁸ Ko xi capitán sabikao xa chán ti jii xi comandante ko ndachro xi capitán:

—Xi Pablo jii ndo achjiso ndachijina xa ixi tsikian chán ji in nti i ixi tjaun chán xrontatjua chán naa nge e.

* **23:13** *ikán* veinte

19 Tjume e xi comandante itsé xa itja chán ko kuachrjendaka o xa chán ko juanchangi xa:

—¿Nge e tjaun xrondachijiana?

20 Tjume e ndachro chán:

—Ni judío tjaun n̄ tsjancha a n̄ ixi ndúya ndúyo tsiku a ndo Pablo ti ste ni judío tituan an. Ko xrondachro n̄ ixi tjaun n̄ tsjanchangí e n̄ ndo Pablo ikaxin nge e.

21 Titikaon a ja a ti ndachro n̄ ixi xranchi yuu ikán xi imao xrochon en xa ngatja cha o ko nduaxin nombrée ndo Dio sine a xa ko tsi a xa nge e tsjexinja naatsóñaxón xa ndo Pablo. Ko jai stehón en xa nge e xichrua ja a.

22 Ko xi comandante kuetuen en xa chán xron-dache a chán ninna ngisen nge e chronga chán ngajin xa.

Xro an n̄ ndo Pablo ngajin xi gobernador Félix

23 Tjume e xi comandante kuiye e xa yuu xi capitán ko kuetuan an xa ixi tsjejo xi capitán yuu ciento chujni tsjixin tutée ko yuu ikán ko ní ite xi tseta a kunxin ko yuu ciento xi tsikao chika lanza, ko satsji xa tjajna Cesarea xranchi hora n̄ tiie.

24 Ko kuetuan an xa sinchekama n̄ kunxin tseta a ndo Pablo ko ndachro xa ixi xro an nge e tson en ndo ko jian tsiji ndo ti jii xi gobernador Félix.

25 Ko xi comandante ikjin xa naa xroon, ndachro:

26 “Jan an xi Claudio Lisias xruan an juajna ngajinnta Félix gobernador.

27 Ni judío nti i itsé n̄ xi jii ko tjaun n̄ naaxrokóñaxón n̄ xa. Ko hora konóna jan an

ixi je e xa naa xi romano, biki an xi soldado ko bingijna xa.

²⁸ Ko tja on tsonóna nge e ijie chóna xa, méxin, biki an xa ngajin ni tetuan an ni judío.

²⁹ Ko konóna ixi tjankata a na xa ijie ixi ley chóna na. Ko xro an ijie chóna xa tsikinixin en ixi naaxrokóñaxón na xa o xroxraxon in na xa ndo achjiso.

³⁰ Tjume e kujn an ixi ni judío xraxaon na naaxrokóñaxón na xa, méxin xruan an xa ngajian ko kuetuan an kain ni me e itsji na ngajian ko xrontatjua na nge e ijie chóna xa.”

³¹ Ko ni soldado juinche e na xranchi kotuen en na ko sabikao na ndo Pablo tiie me e tjajna Antípatris.

³² Ko ndúyaxin xi soldado kui xin tutée ikjan xa ti cuartel. Ko xi steta a kunxin sabikao xa ndo Pablo.

³³ Ko nchakon kuiji na tjajna Cesarea kuajon na xroon tsikjin xi gobernador ko kaxon kuajon na ndo Pablo ngajin xa.

³⁴ Ko juexin juinchekuanxin xi gobernador xroon, tjume e juanchangi xa no tjajnéé ndo Pablo ko kono e xa ixi tjajnéé ndo tjajna Cilicia,

³⁵ ko ndachro xa:

—Tjume e tsin an nge e xrondachrúa tsija ni tjankata a ijie.

Ko kuetuen en xa ikaxin xi soldado tsikao xa ndo Pablo naa nchia tsijinchéña xi Herodes.

24

Ndo Pablo nichja ndo ngajin xi Félix

¹ Kuatsinga na ó nchakon, tjume e xi Ananías, xitaana tsango tituan an, kuiji xa tjajna Cesarea.

Kaxon bikao xa kaxin ni tetuan an ni ngo ko naa xi nchéña ijię ndatin in Tértulo. Xi me e nichje e xa xi gobernador ko tjankata a xa ijię ngajin ndo Pablo.

² Nchakon bikao na ndo Pablo, xi Tértulo kuaxi xa bankata a xa ijię ngajin ndo Pablo ko ndache xa xi Félix:

—Gobernador ixi juasianta tsango juaxruxin stena ko juasiaa ja anta ixi tsango jian no anta tituan annta tjajnanana.

³ Tsango jian ja anta Félix. Ko juasianta ixi kain nge e chjánananta.

⁴ Tjaun ana sintachrjan ananta, méxin, tinóatánana ixi nchion tin ennta nge e xrondachrjana.

⁵ Xi ji in jii xa xranchi naa ichin tinga nguixin no ko ncheye e xa ni judío ko ncheketo xa na. Je e xa tituen en xa ni titikaon chijnie naa xi tsiki xin tjajna Nazaret.

⁶ Je e xa kaxon xrojuinchekitja xa ni ngo ko jan anna itséna xa ko xrojuintañana ijię ngajin xa xranchi tituan an ley chondana.

⁷ Ko tjume e xi comandante Lisias juike e xa ko kuantsjenana xa xi Pablo.

⁸ Tjume e kuetuan an xi comandante ixi ni tjankata a ijię ngajin xi Pablo tsii na ngajinta. Ja anta chao tjanchangí enta xi Pablo, me e tsono anta jian nge e ijię chóna xa.

⁹ Ko ndachro kain ni judío jii nti a:

—Kain ji i nduaxin.

¹⁰ Tjume e xi gobernador juakoxin itja xa ixi xronichja ndo Pablo. Ko ndachro ndo Pablo:

—Juaxruxin xrontatjunta ixi xro an ijie chonda ixi nóna ja anta nduaxin jian nchéñanta ijie kondee tjajna nti i ko itsjé nano tituan annta nti i.

¹¹ Ja anta kaxon xrokono anta ixi nandá chóna teyuu nchakon juaso tjajna Jerusalén ixi nti a tsajonxin juasaya ngajin ndo Dio.

¹² Ko ni tjankata ana na ijie jai, kuitja ina na ritetoki an xrojan chujni, ko nichjangía i chujni ste ni ngo ijié ko kaxon ni ste ni ngo nchín ko chujni tjajna xro an nge e ntatjanna.

¹³ Ko ni ji i jua i xrondachro na ixi jaña junta a.

¹⁴ Ti nduaxin ndachrjan ixi nta a ixra ngajin ndo Dio, ndo baktikaon sen tachrí nana xranchi tetuan an cha o jian. Ko je e na ndachro na ixi ndako a nge e titika on. Ko kaxon titika on kain nge e jitaxin ley ko titika on nge e tsikjin sen kuanichja chijnie ndo Dio ó sa ó.

¹⁵ Kaxon titika on ndo Dio xranchi titikaon je e na ixi ndo Dio sinchexechón ndo kain ni jian ko kaxon kain ni ña i.

¹⁶ Méxin, taa juachjaon ixi kain nchakon tjúa tsake e aséenna ngajin ndo Dio ko ngajin chujni.

¹⁷ *'Kuatsinga kaxin nano kuaji jée tjajna, ko jai ikjanna tjajnána ixi tsajon tomi ngajin ni nóa jii tjajnána ko kaxon tsajon juasaya ngajin ndo Dio.

¹⁸ Ko bake é ngaxin in ni ngo, ko tjume e kaxin ni judío tsiki xin nunte Asia kuitjana na nti a ko hora me e juexin juntatjúá aséenna ko tsjé a chujni riki an ko xro an ngisen kuətoki an.

¹⁹ Ko siá me e xrojuinta a, ni me e xrokuji na nti i xrokjuankata ana na ijie.

²⁰ Ko ni ste nti i xrochronga na nge e ijię ri-chonda siá nduaxin xrojan ti ndako a junta a.

²¹ *Ánchéxin xrondachro na xixi nchakon bake e ngajin na séen kuyako ko ndachrjan jan an: “Jai stenchéñantana ijię xixi titika on xroxechón ni tsiken en.”

²² Ko juexin kuin en xi Félix nge e ichro na, ko je e xa jian no e xa nge e xrondachro chijni tjako ndo Pablo, méxin juinchéña i xa ijię ngajin ndo Pablo ko ndachro xa:

—Tsija xi comandante Lisias me e tsjexin tsonóna nge e ijię tsama xi ji i.

²³ Ko kuetuen en xa xi capitán xixi tsendáa xa ndo Pablo ko chao tsaji ndo ko tsayé e ndo sen chúxin ndo, tsiji sen tsitsje e sen ndo.

²⁴ Ko kuatsinga kaxin nchakon, bijikao xi Félix janchri e xa nchri Drusila, nchri me e naa nchri judía. Ko kuetuan an xa tsjirué e na ndo Pablo xixi xrochronga ndo xranchi chao xrochuntia na ndo Jesucristo.

²⁵ Ko ndo Pablo juako ndo xranchi sinche e na jian ko xranchi tsetuen en na aséen na ko sinche a na ti ndako a ko xranchi tsji nchakon ndo Dio sinchéña ndo ijię ngajin kain chujni. Ko xi Félix kuin en xa, me e xronka xa, ko ndachro xa:

—Jai satjia ko tjume e tsiya a naa nchakon ti xro an ixra xrochondana.

²⁶ Ko xi Félix tjaun xa xixi ndo Pablo xrokuajon ndo tomi ngajin xa; me e xrokuajanda xa ndo, méxin, nanaó bakiye e xa ndo.

²⁷ Ko jaña kon en ko kuatsinga yuu nano, ko xi Félix juinche e xa nge e tjaun ni judío, méxin

kuintu e xa ndo Pablo ngaxin in ndo achjiso ko tjume e kuintu e xa ti ixra kuanche e xa ko naa xi ndatin in Porcio Festo kuayé e xa ixra me e.

25

Ndo Pablo jii ndo ngajin xi Festo

¹ Xi Festo kuiji xa tjajna Cesarea ixí tsjangixin xa sinche e xa ixra gobernador ko nchakon nínxin sakjui xa tjajna Jerusalén.

² Ko xitaana tetuan an ko kaxin ni judío tsango tetuan an juankata a na ijię ngajin ndo Pablo.

³ Ko kaxon kuinóatée na xrokuetuan an xa xrokjui ndo Pablo tjajna Jerusalén ixí ó tsijao na ixí xroxruan an na kaxin xi xrochon en xa ngatja cha o ko naatsónaxón xa ndo Pablo.

⁴ Ko xi Festo juate e xa ixí ndo Pablo jii ndo ngaxin in ndo achjiso tjajna Cesarea ko kaxon je e xa tuinxin xrokjan xa tjajna Cesarea.

⁵ Ko ndachro xa:

—Kaxin ja anta xro ícha tetuan annta itsjina tjajna Cesarea. Ko siá nduaxin chóna xi Pablo ijię, nti a sintaña ijię.

⁶ Ko xi Festo bake e xa tjajna Jerusalén xranchi ijní o ite nchakon ko tjume e ikjan xa tjajna Cesarea. Ko ndúyaxin bake e xa nunte ti nchia tetuanxin xa ko kuetuan an xa tsika o na ndo Pablo.

⁷ Ko hora kuixin in ndo Pablo, ni judío kuixin tjajna Jerusalén konchjiñe e na ngandajin ndo ko bankata a na ndo ijię. Ko ti ndachro na nduaxin a ixí je o nchekamaxón na ndo ijię.

⁸ Ko nichja ndo Pablo ko ndachro ndo:

—Xro an ijię junta a ngajin ni ngo Jerusalén ko xro an nge e ndachrjan kontree xi emperador ne e Roma ko jian kuiteka on ley ne e sen judío.

⁹ Ko xi Festo tjaun xa jian xrokuitu e xa ngajin ni judío, méxin, juanchangi e xa ndo Pablo ko ndachro xa:

—¿Á tjauan tsjia tjajna Jerusalén ixi nti a sin-tañaxian ijię?

¹⁰ Ko ndo Pablo juate e ndo:

—Na i, jan an ó ritjén ti tóñaxin ijię kondee xi gobierno romano ko chao nti ó tsóñaxin ijię ko ó no anta xro an ijię junta a ngajin ni judío.

¹¹ Siá nduaxin xrojan nge e ti ndako a junta a tikinixin en tsen enna, jan an xrakon a ixi tsen enna. Ko siá nduaxin a ijię tjankata antana chujni ji i, xro an ngisen chónnda juachaxin tsajonna ngajin ni tjankata ana ijię. Jan an tjánchíá ixi xi tsango tetuan an jii tjajna Roma sinchéñana xa ijię.

¹² Tjume e xi Festo juexin juao xa ni tingijna nchéña xa ijię, ja in ndache xa ndo Pablo:

—Ja a juanchia ixi xi tsango tituan an sintáña a xa ijię. Itjia ngajin xi me e.

Ndo Pablo jii ndo ngajin xi rey Agripa

¹³ Ko kuatsinga kaxin nchakon, tjume e xi rey Agripa ko janchri e xa nchri Berenice kuiji na tjajna Cesarea ixi tsajon na juajna xi Festo.

¹⁴ Ko nti a bake e na itsjé nchakon, me e xi Festo beki e xa xi rey ixi ndo Pablo ko ndachro xa:

—Nti i jii naa xi tsikintu e xi Félix ngaxin in ndo achjiso.

¹⁵ Ko nchakon bake é tjanya Jerusalén xitaana tetuan an ko ni tetuen en ni judío kuij na ngajin ko juankata a na ije ngajin xi me e ko juanchia na tsen en xa.

¹⁶ Ko jan an juata a: “Jaina ni romano jua i xron-dachrjanna ixi tsen en naa chujni; xrokonda sa ó chujni me e tsikon ko tsin en ni tjankata a ije ko chao xrondachro na á nduaxin chóna jje ni me e.

¹⁷ Ko nchakon kuij ni judío nti i, jan an í chuan i ícha, tuinxin ndúyaxin ikjui nchia tónaxin ije ko kuituan an tsika o na xi Pablo.

¹⁸ Tjume e konchjiñe e ni judío ko xro an ije juankata a na xa xranchi jan an xraxa on xron-dachro na.

¹⁹ Je o bakoñao e na xa ixi xranchi bakajon xa juasaya ngajin ndo Dio ko ningakon en na xa ixi kondeexin naa xi ndatin in Jesús ó tsiken en xa ko xi Pablo ndachro xa ixi tsixechón xa.”

²⁰ Jan an nóna i xranchi xrojuintaña ije, méxin juanchangi a xa á tjaun xa itsji xa tjanya Jerusalén ixi nti a sinchéña na ije ngajin xa.

²¹ Ko je e xa juanchia xa ixi xi tsango tetuan an Roma xrojuinchéñe e xa ije. Me e jan an kuetuan an ixi nti ó tsitu e xa ngaxin in ndo achjiso tsjija nchakon xroxruan an xa tjanya Roma.

²² Tjume e xi Agripa ndache xa xi Festo:

—Kaxon jan an tja on tsin an inge e xrondachro xi me e.

Ko ndachro xi Festo:

—Ndúya tsin en nge e xrondachro xa.

²³ Ko ndúyaxin xi Agripa ko nchrinchri e xa nchri Berenice kuixin in na nchia tónaxin ije ko bikao

na xi soldado tetuan an ko kaxon kaxin ni tetuan an tjajna nti a. Tjume e kuetuan an xi Festo ixi tsixrakua ndo Pablo.

²⁴ Tjume e ndachro xi Festo:

—Ja anta rey Agripa ko kainnta xrastenta nti i. Nti i jii xi ji i. Tsango itsjé ni judío bankata a na xa ijie tjajna Jerusalén ko kaxon tjajna Cesarea ko séen stetoyako na tjanchia na tsen en xa.

²⁵ Ko xro an ijie kuitjá tikinixin en tsen en xa. Ko je e xa juanchia xa ixi xi César sinchéne e xa xi ijie. Méxin, xraxa on xroxruan an xa tjajna Roma.

²⁶ Ko jan an nóna i nge e ijie chóna xa ixi xrokjin xroon tsayé e xi César, méxin, kuetuan an bika o na xa nti i ngajin ja anta rey Agripa ko kainnta ti stenta nti i, tjanchangíenta xa xranchi kuaxi kon en ji i ixi tja on tsonóna nge e xrokjin

²⁷ ixi jua i xroxruan an naa xi jije e ndo achjiso satsji tjajna Roma ko nóna i nge e ti ndako a juinche e xa.

26

Ndo Pablo jii ndo ngajin xi rey Agripa

¹ Tjume e xi rey Agripa ndache xa ndo Pablo:

—Chao xronichja ixi tsóña a ijie.

Tjume e ndo Pablo juatsin in tja ndo ko kuaxi nichja ndo, ko ndachro ndo:

² —Juaxruxin ritjén ixi xronichja ngajinnta, rey Agripa, ko xrondachrjan kain ijie tjankata ana ni judío.

³ Ko ja anta jian no anta ley ko nge e nche e ni judío, ko ja anta no anta nge e tjakaxin kichi-anna. Méxin, tjancha anta tsin ennta jian nge e xrondachrjan.

Ndo Pablo teki ndo xranchi kuanche e ndo sa ó

⁴ 'Kain ni judío ó no e na xranchi bake e seno tjajnána ko tjajna Jerusalén ti xranchiona.

⁵ *Kaxon no e na jian ko chao xrochronga na ixi xranchiona, jan an fariseona. Ko ni fariseo ícha titikaon na ley.

⁶ Ko jai jitoñana ijié ixi jan an titika on nge e tsindachro ndo Dio tsajon ndo ngajin sen tachrí ina.

⁷ Sen teyuu tjajna tsikachrxjin ndo Israel stechón en sen ixi tsikon sen ixi tsayé e sen nge e tsindachro ndo Dio. Je e sen tajon sen juasaya ngajin ndo Dio tiie ko nchakon. Jai tin ennta, rey Agripa, jan an kaxon richon an ji in, ko kondeexin me e tjankata a na ijié ni judío.

⁸ ¿Á titikaonnta ja anta ixi ndo Dio sinchexechón ndo chujni tsiken en?

Ndo Pablo kuaningakon en ndo ni titikaon Ncháina Jesucristo

⁹ *'Jan an sa ó kuaxraxa on xranchi xrokon ín ni titikaon ndo Jesús, ndo tjajna Nazaret,

¹⁰ ko jaña juntekian chujni tjajna Jerusalén ixi juachaxien xitaana tetuan an, kuaxraxin in itsjé ni baktikaon ndo Jesús ngaxin in ndo achjiso. Ko nchakon naabakóñaxón na sen kaxon jan an jaña xraxa on.

¹¹ Ko nanaó bajintani a sen titikaon Ncháina* ixi í xrokuitikaon a sen ndo. Kain ji i kuenta a ngu-jngu ni ngo ixi tsango baningakon an sen, méxin barua a sen tjajna sabinga sen.

26:5 Hch. 23:6; Fil. 3:5. **26:9** Hch. 8:3; 22:4, 5. * **26:11** *Ncháina* Señor *Ncháina* Jesús o *Ncháina* Dio

Beki ndo Pablo xranchi kuaxi ndo kuitikaon ndo Ncháina Jesucristo

(Hch. 9:1-19; 22:6-16)

¹² 'Jaña rixraxa on sakjui tjajna Damasco ixi juachaxien xitaana tituan an.

¹³ Ko ja anta rey, tsono anta ixi ngusine nchakon me e ngatja cha o bikon naa xro i bingasáña nguixin ngandajinna, ko tsango jitóngíxin xroi ícha ixi chjiixrué chjiixro.

¹⁴ Ko kainna kuari ina nunte ko jan an kuin an nichja naa ngisen ngigua hebreo ko ja in ndachijina sen: “Saulo, Saulo, ¿sonda tsango ningakonnana ko ritengiana? Ja ua rincheni e asáan xranchi naa kuxinta tjanka tutée ikon chika tikao ntagarocha.”

¹⁵ Ko jan an juanchangi: “¿Ngisen ja anta?” Ko sen me e juate e sen: “Jan an ndo Jesús, ngisen ja a ningakon én ko tengia.

¹⁶ Jai tingatjen, take exian tutáa ixi jan an kua-jon juachaxin kuin en nge e ndachrjan ixi jan an kuincha a sinche e ixra ngajin ko tsekia nge e kuin en ko tjume e tsikuan nge e sinta a jan an.

¹⁷ Jan an tsingijna ixi xro an nge e sinta a ni tjajnáa ko ni jée nunte. Ko jai tetuan an satsjia tsjako e na nge e xrontatjua.

¹⁸ Méxin, tetuan an satsjia ti ste ni titikaon a ixi tsakintje e ikon na ko ítsaji a na cha o naxixe e ixi chao me e xrokjan cha o tingasáña ko íxrochóna i Xixron anxrée juachaxin tsetuen en xa aséen na. Ko jai xrochuntiana na jan an ko jan an tsayá a na ko sintama a ijié chóna na ko tsayé e na juachaxin tsake e na ti no tsake e kain sen titikaonna”, ichro Ncháina Jesucristo.

Ndo Pablo titikaon ndo nge e kuin en ndo

¹⁹ 'Méxin, rey Agripa, jan an kuitika on nge e kuin an ti kuixin ngajní.

²⁰ *Sa ó juntakuan an ni tjajna Damasco ko tjume e ni tjajna Jerusalén, ko nchijíi nunte Judea ko kaxon juntakuan an ni je a judío. Juako a na ixi tsintu e na ti ndako a nche e na ko xrokjan na tsitikaon na ndo Dio, ko sinche e na ti jian.

²¹ Kondeexin ji in, ni judío tséxinna na ngaxin in ni ngo ko tjaun na naatsóñaxónna na.

²² Ko juasie ndo Dio bingijnana ndo me e jian ritjén jai, ko xrantakuan an ni nóa ko ni tetuan an ko xro an inaa nge e nichja, je o tjako chijni bajako sen profeta ko ndo Moisés.

²³ *Ndo Cristo, xrokonda xrokuen en ndo ko xroxechón ndo nchakon nínxin ixi jaña tsjakoxin ndo xranchi tsingasáñaxin ni ste nti i ko ni ste ikaxin tjajna ixi tsitjáña i aséen na.

Nge e juatingíexin xi Agripa ngajin ndo Pablo

²⁴ Ndo Pablo jaña beki ndo ti kon en ndo ko tjume e xi Festo séen kuyako xa:

—Pablo, ja a tsijinchetjáña jáa ixi tsango nchekuanxian xroon.

²⁵ Ko juatingíexin ndo Pablo:

—Na i, juntatjáña i jáana. Festo, nge e ndachrjan me e jian ko nduaxin.

²⁶ Nti i jii xi rey Agripa. Je e xa chúxin xa jian kain nge e kon en. Méxin, chao rinichja ixi je e xa ó no e xa kain ji i ko kain ji i ti kon en, je a imao kon en.

²⁷ Ja anta, rey Agripa, ¿á titikaonnta ti bajako ni kuachronga chijnie ndo Dio ó sa ó? Nóna ixi ja anta titikaonnta nge e bajako sen.

²⁸ Juate e xi Agripa ko ndachro xa:

—Bananchichjaon ko jan an kaxon xrokuitika on xi Jesús.

²⁹ Tjume e ndachro ndo Pablo:

—Á bananchichjaon nge e xrondachrjan o itsjé nge e, ndo Dio tjaun ndo je a ja onta xrokuitikaonnta ndo. Kaxon tjaun ndo ixi kain ni stetin en nti i xrokjan nã xranchi jan an titika on ndo ko je e nã tsechruaxin a nã chika cadena xranchi jan an.

³⁰ Ko juexin nichja ndo Pablo, tjume e bingatjen xi rey, ko xi gobernador, ko kaxon nchri Berenice, ko kain ni ste nti a.

³¹ Ko kain nã kuachrje nã ko juintejao kichuu nã ko ndachro nã:

—Xro an ijie chóna xi ji i, tikinixin a tsen en xa ko xrobake a xa ndo achjiso.

³² Tjume e xi Agripa ndache xa xi Festo:

—Chao xrokuajandani xa saxrokjui xa siá xrojuanchia i xa ixi xi tsango tituan an sinchéña xa ijie ngajin xa.

27

Ndo Pablo xruan an nã ndo tjajna Roma

¹ Tjume e kuetuan an nã ixi satsjina nunte Italia. Ko je e nã ndache nã naa xi capitán ndatin in Julio ixi tsikao xa ndo Pablo ko ikaxin ni jii ngaxin in ndo achjiso. Je e xa naa xi policía nche e xrã ngajin xi Augusto César.

² Tjume e kuixi inna naa nt̄abarco tsiki x̄in no puerto Adramitio, ko nt̄abarco me e ó satsji nt̄aa ti jii puerto nunte Asia. Kaxon steki anna xi Aristarco tikinixin en xa t̄ajna Tesalónica kondee nunte Macedonia.

³ Ko ndúyaxin juasona puerto t̄ajna Sidón. Ko xi Julio jian juao xa ndo Pablo ko tjume e kuajon xa juachaxin ixi tsitsje e ndo ngisen chúxin ndo nti a ixi tsingijna sen ndo.

⁴ Ko tjume e sajuixinna t̄ajna Sidón ko juasona naa isla ndatin in Chipre no ndatsjonxin kjon, kondeexin chrinto soji.

⁵ Tjume e kuatsingataonna ndachaon ko juasona tjenka t̄ajna Cilicia ko Panfilia ko tjume e juasona t̄ajna Mira nunte Licia.

⁶ Ko nti a xi capitán kuitja xa naa nt̄abarco tsiki x̄in t̄ajna Alejandría ko nt̄aa me e satsji nt̄aa nunte Italia ko ndachro xa tsixin inna nt̄aa ixi satsiki anna nt̄aa t̄ajna me e.

⁷ Itsjé nchakon yao kuintekjina ko tsango tangi juasona tjenka t̄ajna Gnido ixi chrinto tintuna ina itsjina taka, méxin kuatsingana ngandajin isla Creta ko juasona tjenka t̄ajna Salmón.

⁸ Ko jaña tsango tangi kuatsingana nguixin nunte me e ko juasona naa t̄ajna ndatin in Puerto Jian tjenka t̄ajna Lasea.

⁹ Ko juintatjáñana itsjé nchakon, ko jai ícha tangi bajinxinni nt̄abarco ngata a ndachaon ixi ó tsii nchakon tonkin. Méxin, ndo Pablo ndache ndo na:

¹⁰ —Kainnta tin ennta nge e xrondachrjan. Tikon ixi tsatsingana itsjé juachjaon siá satsjina ixi sinchetjáñana nt̄abarco ko kain nge e jitinga nt̄aa ko kaxon jaina.

¹¹ Ko xi capitán tetuan an ícha kuin en xa ti ndachro xi teka ntabarco ko nchéé nta̱a ko kuitikaon a xa ti ndachro ndo Pablo.

¹² Ixi puerto me e je a jian tsitu eni nchakon tonkin, méxin kain na xraxaon na ixi ícha jian tsachrjexinna nti a ixi tjaun na tsijina tjajna Fenice, naa puerto nunte Creta ti ndatsjonxin chuya ko níjin, ko nti a xrokuitunana tsatsingaja nchakon tonkin.

Chrinto soji ngata a ndachaon

¹³ Tjume e kuaxi binga chrinto kuixin no níjin ko soji a chrinto, méxin xraxaon na chao satsjina.

Tjume e kuachrjexinna nti a ko juasona ngande e isla Creta.

¹⁴ Ko tuinxin kujj naa chrinto soji ndatin in noroéste kuande e ntabarco.

¹⁵ Ko kuaxi chrinto me e kuncheka ntabarco ko jua i sakjuina ixi ti tjaun xi teka nta̱a ixi konchekana chrinto. Méxin, kuintu e xa ntabarco bikao chrinto.

¹⁶ Tjume e juasona naa isla nchín ndatin in Clauda ixi nti a je a soji jitinga chrinto. Ko tsango tangi juentakajinna ntabarco nchínchín jitenixin tuenxin ntabarco ijié.

¹⁷ Ko juexin juasitianna ntabarco nchínchín ngande e ntabarco ijié ko kuintexinna ino ntabarco ijié ixi xro an nge e tson en nta̱a. Ko stexronkana ixi xroké e nchese ntabarco ti xrojuasona nunte Sirte. Ko juinchexingajin xa manta tikao ntabarco ko kuintu e xa je o chrinto satsikao nta̱a.

18 Ko ndúyaxin xra tsanga jitinka chrinto, kuaxi xa kuintjí xa kain nge e jitikao ntábarco chringi ndachaon.

19 Ko nchakon nínxin tjánana juankaxinna nge e xrokonde a ntábarco ngangí ndachaon.

20 Itsjé nchakon kondeexin itjuí bikon ana chji-ixro ko nchanotsé ixi tsango jitinga chrinto ko xraxa onna xrokunteken enna.

21 Ko kuatsinga itsjé nchakon juine ana ko ndo Pablo bingatjen ndo ko ndachro ndo:

—Xrokuitikaonnta nge e ntatjunta ko xrokuachrjexin ana nunte Creta, ko jaña xrokuen a kain ji i.

22 Ko jai ta inta juachjaon ixi xro an ngisen tsen en maski ntábarco tsitjáña ntáa.

23 Ixi nakonkjin bikon naa ndo ángel tsixrua an ndo Dio, ndo titika on ko nta a xrée.

24 Ko ndo ángel ndachijina ndo: “Xrakon a Pablo. Xrokonda tsjasua ti jii xi César tetuan an ko kon-daxian ja a, ndo Dio tsingijna ndo kain ni stetii ngaya ntábarco, tsen a na.”

25 Méxin, xrakon inta ixi jan an chuntia ndo Dio ko nóna ixi tson en xranchi ndachro ndo ángel.

26 Xrokonda tsituina naa nunte jii ngusine ndachaon.

27 Juexin kuatsinga yuu semana, tjume e naa tiie juasona ndachaon ndatin in Adriático ko nti i, ndá a tiki anna chrinto. Ko ngusine tiie xi teka ntábarco bikon xa ixi ó stetjasona ti jii inche xema.

28 Ko juaticho a xa ti yaso e inda ko xranchi ní ite* ko ikjaon metro yasoexin inda. Tjume e

* 27:28 *ite* diez

kjín a juasona ko íjngo juaticho a xa ko ikán ko yato metro yasoexin inda.

²⁹ Ko tsango xronka xa ixi xroké e ntábarco ixro, méxin banka xa noó chika gancho tuenxin ntábarco ko jaña chon anna bingasáñajan.

³⁰ Ko xi nche e ixra ntábarco xraxaon xa xrob-inga xa ko kuaxi xa juinchexingajin xa ntábarco nchínchín ngataon inda ko juinchexin xa xranchi xrobanka xa chika gancho chónda ikon ntábarco.

³¹ Tjume e ndo Pablo ndache ndo xi capitán ko kain xi soldado:

—Siá xi ste nti i me e tsintue a xa ngaxin in ntábarco, jua i tsjasona ti jii inche xema.

³² Méxin, xi soldado konchrinjin xa ino jichroaxin ntábarco nchínchín ko kuintu e xa kuitsinga ntaa ngangí inda.

³³ Ko jitingasáña ndo Pablo nichje e ndo kain ni ste nti a ko ndachro ndo sine na ko kaxon ndachro ndo:

—Ó chónda yuu semana tarichrin anta ko nte anta.

³⁴ Tinóatána ngajinnta intenta ko jaña chao tsinteenta ixi jaña xro an chujni ste nti i sinchetjáña na ninaa xrajaa na.

³⁵ Juexin ndachro ndo Pablo ji i, tjume e itsé ndo naa nutja ko kuajon ndo juasie ndo ngajin ndo Dio ko stetsje e ni ste nti a, ko konchrinjin ndo nutja ko kuaxi juine ndo.

³⁶ Tjume e juaxruxin bake e kain na ko kuaxi na juine na kaxon.

³⁷ Kain na xraste na ngaxin in ntábarco xranchi yuu ciento, ní ikán ko tekjaon na.

³⁸ Ko juexin juinena tjume e juankana noa trigo ngangí inda ixi ítsoyé a ntábarco.

Ntábarco konunte ntáa ngangí inda

³⁹ Ko ó bingasáña, xi tikao ntábarco juatsuan i xa tinó juasona ko bikon xa nche xema. Ko xraxaon xa ixi chao satsikao xa ntábarco nti a.

⁴⁰ Ko konchrinjin xa ino jixritexin chika gancho ko kuintu a xa chika sakjui chringi nda. Tjume e juinchendá xa ntáa timón tekáxin xa ntábarco ko juinchengajin in xa manta jii ikon ntábarco ko chrinto kuncheka ntáa ti jii inche xema.

⁴¹ Ko juasona ti tixin yuu ikon inda ko ntábarco ké e ntáa nchese. Ko í jua i kontengí ntáa, ko tuenxin ntábarco kuaxi kuixrato kondeexin chrinto soji.

⁴² Ko kain xi soldado tjaun xa naaxrokóñaxón xa ni steje e ixi tjaun a xa saxrokuinga na.

⁴³ Ko xi tetuen en tjaun a xa tsen en ndo Pablo, méxin kuajon a xa juachaxin jaña xrokon en. Ko kuetuan an xa ixi ngisen chao itsji ngataon inda tsitaon na ti jii inche xema

⁴⁴ ko ngisen noe a itji ngataon inda, sen me e tsjixin sen tu o ntábarco. Ko jaña kaina juasona ti jii inche xema ko ninaána xro an nge e kónnana.

28

Ndo Pablo jii ndo isla Malta

¹ Nchakon juachana juasona inche xema, konónana ixi isla me e ndatin in Malta.

² Ko ni tjajna nti a tsango jian na ko bingijnana na kaina ko juaaka na naa xro i ijié ixi xroxrxronana ixi tsango ikin ko jitania ichrin.

Tjume e ndachro n̄a ixi tsonchjiña ana kaina tjenka xro i.

³ Tjume e ndo Pablo jua o ndo kaxin ni o tsixema ko bake e ndo ni o ngata a xro i. Ko tuinxin kuachrje naa kunchee ti jii xro i ixi jichján ba ko kuitsía ba itja ndo Pablo.

⁴ Tjume e ni tjajna nti a bikon n̄a kunchee jitjia ngi ba itja ndo Pablo ko ndache kichuu n̄a:

—Nduaxin xi jii naa xi tóña chujni ko, maski kuen a xa ti ndachaon, ndo Dio ítjaun a ndo tsechón xa.

⁵ Ko ndo Pablo kontsjenga itja ndo ngata a xro i ixi tsitsinga kunchee me e ko je e ndo xro an nge e kon en ndo.

⁶ Ko kain n̄a stechón en n̄a ixi tsatjuya itja ndo o tuinxin xrokuen en ndo ko sée chón en n̄a ko bikon n̄a xro an nge e kon en ndo. Ko tjume e kuindoxin nge e xraxaon n̄a ko kuaxi n̄a ndachro n̄a ixi je e ndo Pablo naa xi dio.

⁷ Ko tjenka nti a jii nunte e naa xi tetuan an isla ndatin in Publio. Xi me e kuajon xa juachaxin kuitun̄ana ndo a xa ko kuajon xa juinena ní nchakon.

⁸ Ko ndotée xi Publio ni e ndo, méxin jitsinga ndo ixi chóna ndo súa ko pojo. Ko ndo Pablo kuitsje e ndo ndo ni e ko juexin nichje e ndo ndo Dio, tjume e bake e itja ndo ngata a jaa ndo ni e ko ndo ni e koxruen en ndo.

⁹ Jaña kaxon konchjiñe e ikaxin ni ni e jii nti a ko kain n̄a koxruen en n̄a.

¹⁰ Tjume e tsango chónde e n̄a ndo Pablo juasaya.* Ko nchakon kuaana inaa nt̄abarco

* **28:10 juasaya** respeto, honor

sakjuixinna nti a, kuajon na itsjé nge e xrokondanana.

Ndo Pablo kuiji ndo tjajna Roma

¹¹ Ko kuatsinga ní nchanitjao bake ena isla ko tjume e kuaana naa ntábarco tsikitu e nchakon juinche e ikin nti a. Ntábarco me e tsiki xin tjajna Alejandría ko nganito ntábarco me e tsikatsjéya na ikon xi dio Cástor ko Pólux.

¹² Kuachrjexinna nti a juasona puerto tjajna Sir-acusa ko nti a kuitunana ní nchakon.

¹³ Ko xrastexi inna ntábarco, kuatsingana ngande e inche ko juasona tjajna Regio. Ko ndúyaxin kuaxi kuij chrinto níjin, ko nchakon yuxin juasona tjajna Puteoli.

¹⁴ Nti a kuetanna kaxin sen kichuuna, ko juanchanana sen tsitunana nti a ko kuitunana naa semana ko tjume e sakjuina tjajna Roma.

¹⁵ Tjume e sen kichuuna tjajna Roma ó no e sen ixi tsjasona, me e bijiruanaxinna sen ngatja cha o tjajna Foro Apio ko ikaxin sen kuetanna sen tjajna Ní Tabernas. Nchakon ndo Pablo bikon ndo sen kuajon ndo juasaya ngajin ndo Dio ko tsango bake e ndo juaxruxin.

¹⁶ Ko nchakon juasona tjajna Roma, tjume e xi capitán kuajon xa ni tsije e bika o xa ko kuayé e xi tetuan an. Ko ndo Pablo inaa nchia nchíin kuintu e xa ndo ko naa xi soldado tsendáa xa ndo.

Ndo Pablo tjako ndo chijni ngajin ni tjajna Roma

¹⁷ Tjume e kuatsinga ní nchakon, ndo Pablo kuiye e ndo kain ni judío tetuan an jii tjajna Roma. Ko nchakon xra o kain na, tjume e ndachro ndo:

—Kichianna, xro an ti ndako a junta a ngajin ni judío ko ningakuan i nge e kuanche e sen tachrína xranchrjen ko maski bijéna nã tjanya Jerusalén ti tetuan an ni romano.

¹⁸ Ko ni me e kuitja i nã ijie ngajin, méxin tjaun nã xrokuajandana nã ixí kuitja i nã ijie xrokuenx-inna jan an.

¹⁹ *Ko ni judío tsango koñaao nã ko tjankata ana nã ijie. Méxin, juanchia ixí xi César xrojuinchéña xa ijie ngajin. Ko jan an xro an ijie tsjankata a sen tjanána.

²⁰ Méxin, kuiya anta ixí tja on xrobikonnta ko xronichja anta ixí jan an titika on ngisen stechón en kain ni israelita, méxin jai jixritexinna chika cadena.

²¹ Tjume e ndachro nã:

—Jan anna kuaya ina ninaa xroon kuixin Judea kondeexin ja a ko kui a ninaa ni kichuuna ndachijina nã nge e ndako a tsijinche e ja a.

²² Tja onna tsin anna xranchi xraxaoan ja a ixí ó nónana itsjé tjanya tjaun a nã nge e natjúá tjakoa ja a.

²³ Tjume e bake e nã naa nchakon tsin en nã nge e tjako ndo Pablo ko nchakon me e xra o kueya nã ti nchia bake e ndo ko ndúyo xrangíxixión nichja ndo hasta ti kóndo. Me e nichja ndo xranchi jii juachaxin tetuan an ndo Dio. Nichje e ndo nã ixí tsitikaon nã ndo Jesús, ko juakoxin ndo ixí ley kuajon ndo Moisés ko ti tsikjin sen kuachronga chijnie ndo Dio ó sa ó.

²⁴ Kaxin nã kuitikaon nã nge e ndachro ndo Pablo ko ikaxin nã kuitikaon a nã.

²⁵ Ko je a naáko naa nge e xraxaon n̄a ko sakuntekji n̄a, ko ndo Pablo ndachro ndo:

—Chao tsinichja Espíritue ndo Dio ngajin sen kuachrenixinna ó sa ó ti ndachro ndo profeta Isaías:

²⁶ Itjia nichje é ni tjajna israelita maski je e n̄a tin en n̄a, tienxin a n̄a, ko maski stetsje e n̄a, tikon a n̄a.

²⁷ Ixi aséen ni tjajna me e tsikoncha ko ndatsjon n̄a steje e ko steje e ikon n̄a ko jua i tsikonxin n̄a ikon n̄a ko tsien a n̄a ndatsjon n̄a ko tsitikaon a n̄a ixi aséen n̄a ko xrokjan i n̄a ngajin ixi sintaxruan an n̄a.

²⁸ Méxin, tsono anta ixi jai ni je a judío tsayé e n̄a nge e tajon ndo Dio ixi tsechón n̄a ko je e n̄a nduaxin tsin en n̄a.

²⁹ Jaña ndachro ndo Pablo, ko tjume e ni judío sakjui n̄a ko stetjakaxin kichuu n̄a.

³⁰ Ko ndo Pablo kuitu e ndo yuu nano nchia tsikjen ndo ko kuayé e ndo kain ni itji tikitsje e ndo.

³¹ Ko juinchekuen en ndo n̄a ixi ti tetuan an ndo Dio ko juako ndo nge e juinche e Ncháina Jesucristo ko xro an ngisen bakoñaao.

**Chijnie ndo Jesucristo
Popoloca, San Luís Temalacayuca: Chijnie ndo
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source files
dated 29 Jan 2022

ee37a138-f1b9-51ef-b60f-e89d6de4d06f